



國家圖書館藏古籍題跋叢刊

國家圖書館 / 編

GUO JIA TU SHU GUAN CANG
GU JI TI BA CONG KAN

第18冊



北京圖書館出版社

國家圖書館藏古籍題跋叢刊

第18冊

北京圖書館出版社

第十八冊目錄

儀顧堂題跋卷十二至卷十六	一
儀顧堂續跋卷一至卷十二	一一

儀顧堂題跋卷十二

歸安陸心源剛甫著

宋槧周益公集跋

周益文忠公集二十七種今存七種及附錄首行題各種之名下題周益文忠公集第幾宋刊宋印本省齋文藁存目錄卷一至卷八卷二十八至卷三十六版心文藁幾等字平園續藁存序目卷一至十五卷二十七至三十卷三十六至四十版心續藁幾等字玉堂類藁存卷六至八卷十一至十三版心玉堂幾等字歷官表奏存目錄卷一至卷五卷十至十二版

心表幾等字承明集存卷一至卷六版心承明集幾等字書藁存卷九至十一版心書藁幾等字附錄全版心附錄幾等字每頁二十行每行十六字版心皆有刻工姓名及字數事涉宋帝皆空一格有空二格者開禧丙寅其嗣子綸與曾無疑三異彭清卿叔夏許遠伯凌羅次方克宣所校刊故遇必大名及其曾祖衍祖誥父利建名皆缺末筆卽百宋一廬賦中所謂披益公而疏行者也是書自開禧後無重刊故宋本流傳極少卷帙旣重雖抄本亦往往不全國初惟崑山徐氏傳是樓有抄帙全部傳是之書後歸王聲

宏吳人宋賓王曾從王氏借抄兩部一歸文瑞樓今
歸豐潤丁氏其一今在頤宋樓後有賓王四跋李雁
湖之名宋史作壁與諸弟直屋等之從土者不類此
本有雁湖所撰益公行狀題名作壁不作璧可正宋
史之誤

孫尚書大全集跋

宋南蘭陵孫尚書大全文集七十卷宋鴻慶居士孫
覲字仲益撰明文淵閣書目始著于錄卷一至卷四
書卷五至十一啟卷十二至二十詩卷二十一二十
二表卷二十三二十四狀卷二十五至二十七外制
卷二十八劄子卷二十九至三十二記卷三十三三
十四序卷三十五三十六賀啓卷三十七至五十帖
卷五十一行狀卷五十二銘贊卷五十三文語頌傳
卷五十四題跋卷五十五墓表卷五十六至六十七
墓銘卷六十八挽詞卷六十九青詞卷七十祭文疏

文以

四庫所收鴻慶居士集互校此本有而鴻慶集無者
書四首啟三十九首詩八十五首表二十一首狀三
首外制兩首記二首序三首賀啟三首帖七百六十
二首跋語二首頌一首題跋二十四首墓誌三首挽
詞四首青詞一首疏九首此本無而鴻慶集有者亦
數十首鴻慶居士集四十二卷慶元中其子介宗所
編此本不著編輯姓氏首冠宋字當爲宋以後人不
應反有漏落意者觀人品污下介宗所編當時已不
甚行輯大全者不得見其全乎

鴻慶居士集跋

鴻慶居士集四十二卷題曰宋晉陵孫覲仲益舊抄本前有周必大序覲集先有閩蜀兩刻中間雜以翟汝文文慶元中其子興國守介宗始編爲是集以大全集互校此本所無者其文九百餘首詩八十五首翟忠惠之文或在其中今不可考矣此本有而大全本無者詩五首挽詞六首表四首啟三首記七首外制三首劄子兩首昏書兩首序四首題跋十四首贊一首墓誌十一首此本爲介宗所定必不羈入他人著述何以反有爲大全集所無者不可解也序首有

繡谷熏習四字朱文方印吳焯白文長印尺鳧朱文
方印末有西泠吳氏朱文方印蓋杭州吳尺鳧繡谷
亭藏書也

大典本緣督集跋

緣督集二十卷宋曾丰撰文瀾閣傳抄本館臣從永樂大典輯出者以振綺堂傳抄本互校卷一蠹書魚賦卷三甲申大水二首辛丑大水一首卷四壽陳龍圖一首卷六遊南山一首失題一首何熙績生墓一首壽林中書三首卷七滕王閣一首陳子尚滄州趣一首送楊子順二首卷八送曾仲卿一首以蟲鳴秋一首方稚川恕齋五首直候修學三首留別金陵故舊一首卷九聞蟬五首仙洲一首卷十代賀范參政得祠啟卷十七重修族譜序同班小錄序卷二十窮

客達主人問答說皆振綺傳抄本所無初疑羣入他人之作然譜族序編末皆題擢齋姓名則他作當亦不悞意者大典所據猶宋時原本乎

原本緣督集跋

搏齋先生緣督集四十卷題曰廬陵曾丰幼度舊抄
本前有虞集序卷一頌古賦楚詞卷二擬雅卷三至
卷六古詩卷七至十一律詩卷十三十四絕句卷十五
十六書卷十七十八序卷十九至二十二記卷二十三
至二十六墓誌卷二十七文二十八勸農文說銘
二十九贊疏三十青詞表疏卷三十一至三十六啟
卷三十七策問三十八至四十論自卷二十七至三
十皆有目無文案丰爲眞西山之師其集在宋已版
行至元而亡至元初五世孫德安重刊之虞集爲之

序卽此本也明以後流傳甚罕汪氏振綺堂有其書
乾隆中開

四庫汪氏以缺四卷不進呈故

四庫所收从永樂大典錄出原本則未之見也今以
大典本互校可補詩一百四十九首書五首序三首
記十七首啟三十三首墓誌十七首有目無文之四
卷按目求之大典本僅得祭京文忠文李翼行狀跋
邱軍判二十四詠跋王荆公帖跋山谷帖跋豪豬說
觥齋銘直齋銘鏡齋銘蘇瑩叟贊代但大夫謝表代
廣東漕賀表二代彭中散謝表知德慶府謝表十五

首而已然大典所收有出于此目外者意者大典所
收或宋時原本此則從元刊傳抄耳

[illegible]

竹軒雜箸跋

竹軒雜箸八卷宋林季仲撰文瀾閣傳抄大典本也
提要季仲字懿叔永嘉人登進士第歷官太常少卿
知婺因號蘆洲老人嘗僑居暨陽△中又稱濟南林
某者蓋其祖貫也宋史不爲立傳其行事不可概見
愚案季仲兄弟四人皆許景衡弟子而季仲與叔豹
尤著季仲宣和進士調婺州司兵曹出死囚之無罪
者建炎初遷仁和令紹興四年以趙鼎薦除祕書郎
明年除祠部員外郎奏請重牧民之選乞一今日效
等除太常少卿趙鼎罷季仲出知泉州鼎再相除

中書門下檢正諸房文字秦檜主和議季仲上疏引
夫差勾踐事爭之大忤檜意罷爲直龍圖閣主管洪
州玉隆觀久之起知婺州尋復以直祕閣奉祠見中
興館閣錄兩浙名賢錄繫年要錄

芸庵類藁跋

芸庵類稿六卷宋李洪撰文淵閣書目箸于錄注曰
一部五冊全誤題李正民則涉下文李正民大隱人
而誤也原本二十卷久佚此則館臣從永樂大典所
輯也案洪字子大江都人曾祖定宋史有傳父正民
箸有大隱人洪以建炎二年春試刑法入第三等累
官大理評事五年七月乞以扈蹕一官換祖母林氏
太孺人封號三十二年官大理少卿累官提舉兩浙
常平茶鹽公事見繫年要錄及陳貴誼序咸淳臨安
志洪與弟漳字子清泳字子永淦字子名淵字子秀

者皆以文鳴有官闕簪花萼詞五卷見直齋書錄解
題花菴絕妙詞選南渡後正民長民皆寓居海鹽見
陳世隆宋詩拾遺及樵李詩繫洪又嘗居湖州無居
廬陵者直齋以爲廬陵人蓋廣廬二字形近之訛也

三餘集跋

三餘集四卷宋黃次山撰永樂大典傳抄本案次山字季岑洪州分寧人庭堅族子也宣和元年試國學第一以庭堅名在禁錮復抑置第四歷信陽州學教授池州司理參軍靖康初遷博士坐與李綱厚善謫監虢州銅場建炎二年擢尙書員外郎未幾撫諭京東西路使還乞外補遂知筠州又乞監當以歸丁內艱終喪復吏部郎官入對陳日食之咎又進校旗大閱之法會金兵大至淮南告捷次山言策功行賞勸沮所係因條上三策乞解六將軍逗留者之節鉞授

偏裨立功者朝廷既罷劉光世兵枋命呂祉代之次
山言光世固可罷祉雖若可用然統師御眾非其所
長其言卒驗靖康以來學者宗程顥兄弟不能深明
其旨轉爲迂怪紹興初諫官極論其弊有旨戒飭學
者次山時權禮部郎官與重棻爭之於朝事雖直而
謗議起矣出提點荆湖南路刑獄居數月以言者罷主
管亳州明道宮凡九年卒

危太朴集

履齋遺集跋

履齋遺集四卷宋吳潛撰宋史藝文志明文淵閣書目皆未著錄故永樂大典亦無其書履齋爲奸臣所陷薨于循州未幾而宋亦亡當時想無刊本明梅鼎祚始輯爲此集查開慶四明志載其詩文甚多卷一王子塾問曰講議一首卷四創置物斛官申省狀一首卷五條具海道事宜申省狀一首防海奏一首防海申省狀一首卷七代六縣百姓輸折帛錢奏一首卷八乞蠲砂租奏一首罷砂岸稅場榜文一首蠲免抽倭金奏一首免抽倭金申省狀一首再申狀一首

卷九卷十詩二百八首卷十卷十二詞一百三十首
此本皆未收養濟院記開慶志作廣惠院記亦當從
開慶志爲長此外尙有許國公奏議四卷前明溧陽
吳氏祠堂有版凡宋史所載諸奏議皆在其中余已
刊入十萬卷樓叢書合而輯之可增于此集三倍集
中有和呂居仁侍郎東萊先生韵一首又有京口鳳
皇池和張蘆川春水連天韵一首皆和古人之作如
東坡和陶之類不然居仁蘆川皆北宋人履齋安得
而與爲倡和耶

胡五峯集跋

五峯先生集五卷宋胡宏撰蕭山陸氏三閒草堂抄
本卷一第十五十六十七三葉有錯簡卷二上光堯
皇帝書則知其下脫廿一字大憂者下脫四字恐臣
妾之軋己者比乎下脫十九字財者天地有時四民
下脫十七字第六十五葉勾龍周棄上脫十二字然則聖
人所以不以復仇責平王者上脫十八字卷三題張
欽夫希顏錄既竭吾才上脫廿二字整師策上之威
令不行矣上脫十八字卷四皇王大紀論徐偃仁義
論發脫送死禮文論一首計三百餘字卷五易卦傳

視履考祥傳曾子啟手足上脫十九字今據影宋本
補足並改正數十字乃成善本蕭山陸氏藏書向稱
精善豈知脫誤亦如此也

大隱集跋

李正民大隱集十卷

文瀾閣傳抄大典本也愚

案正民字方叔江南江都人祖定元豐中御史中丞
宋史有傳正民政和二年進士建炎二年除校書郎
旋擢吏部員外郎明年改左司員外郎兼權中書舍
人十二月從高宗泛海避兵四年正月爲湖南江浙
撫諭使朝隆祐太后于虔州事有不可待報者得與
三省樞密滕康等參決仍許于簾前奏事所至官吏
能否民間屈抑並體訪以聞五月試給事中尋試吏
部侍郎紹興元年移禮部高宗得陳襄荐司馬光等

奏藁以示從臣正民以爲光等皆不合時宜者高宗
遂薄之罷爲徽猷閣待制知吉州明年以應辦軍儲
派民錢百餘萬緡爲劉大中所糾罷提舉江州太平
觀九年十二月知淮甯府十年金人叛盟陷于金十
二年與孟庾畢良史同放還上言不能死節請正典
刑詔令任便明年提舉江州太平觀廿一年卒正民
善屬文寓居海鹽邑中碑記多出其手見嘉靖維揚
志繫年要錄樵李詩繫

雲溪集跋

雲溪集四卷宋郭印撰

文淵閣傳抄本也案印

字信可四川雙流縣人孝子絳之子也貢上庠中第
與秦檜有庠序舊絕不與通歷判三郡家居十八年
晚號亦樂居士與蒲大受馮時行何耕道爲詩友見
馮時行縉雲集雙流縣志子復明亦第進士官至知
崇慶府夔州路轉運判官宋詩紀事以爲成都人者
誤也

縉雲文集跋

縉雲先生文集四卷宋馮時行撰影寫明嘉靖中重慶推官李璽刊本前有嘉靖甲午張檢敘時行事蹟詳宋史補傳宋史藝文志載時行文集五十五卷今所存不及十之一史炤通鑑釋文前有時行序繫年要錄載時行奏議三首今本皆不載其佚多矣時行卒于隆興元年見集後附錄蹇駒馮侯廟碑而廟碑之後附李璽公移稱時行嘉熙閒狀元及第豈知嘉熙在隆興後七十餘年乎明人不學至此真堪噴飯也

雲莊集跋

雲莊集五卷宋曾協撰原本久佚此則 文瀾閣傳抄永樂大典本也案協爲曾文昭肇之孫南渡後家湖州之德清年十九以詞賦魁胄監一上不第以蔭仕爲長興縣丞終于知永州官至正奉大夫見樓攻媿集曾炎神道碑

格齋四六跋

格齋先生三松集題曰廬陵王子俊才臣提要子俊
字材臣吉水人安丙帥蜀嘗辟爲制置使屬官其始
末則未詳也愚案子俊嘗從楊萬里周必大遊乃延
譽于朱子朱子勉以博取守約之功又書格齋二大
字遺之箸有史論師友緒言三松類稿見西江人物
志

北礪集跋

北礪文集十卷宋釋居簡撰舊抄本得之上海郁氏以向藏抄本校之香魚賦不鳴者災下脫才不才三字幽情賦下脫小注四字種竹賦而語之曰下脫倦欲二字紫芝詞津津下脫山雲兮溶溶五字檢詳劉大監祠堂記而頌下脫遺烈公云云二十字普照寺西方前殿記其巧下脫以盡巧三字華亭西寺無盡燈記光明下脫十六字樂境記與余下脫怡怡兮三字澄心寺華嚴閣記閣中下脫一二樓閣四字送夢書記序餘則下脫十一字字三子序荀綯下脫二十

字送陳原父序議已者下脫二十字書劉蛻文塚銘
後穀梁下脫子曰心志旣近云云十九字甘露滅記
韓徐語妙喜下脫二十七字遠法師忌辰疏一塵卽
下脫二十七字慶甯寺鐘樓榜觀瀾下脫壽與樓高
慶隨基壯八字豁庵講師塔銘吟咏下脫二十字祭
虞稅院下脫冠卿會稽名士六字此本皆不缺洵善
本也其文爲吾郡作者尤多如寶雲寺彬文仲淨業
記樂境記長興獄記箬溪樓記密印寺記慈感寺蚌
珠羅漢銘慈感遠老請贊無量壽佛像跋沈德和修
淨覺塔記道場干僧行道閣榜法華寺建鐘樓藏殿

疏師子吼寺修造疏馬要寺建浴院疏長興元保光
砌路疏德清集雲建西方殿疏四安梵慧院疏心老
住道場疏廣福火後修造榜道場北海禪師塔銘祭
湖州選上人文皆足資吾郡掌故湖隱方圓叟舍利
塔銘卽俗所傳濟顛者也道濟一號湖隱又號方圓
叟亦世所罕知者文頗簡鍊無南宋冗長之習

其二

北礪頗精鑒別故集中書畫題語多中肯其跋廟堂
碑云虞書廟堂碑唐人駸駸晉人者自南北壤斷贗
迹實繁云云則翻本中又有翻本矣其跋九成宮碑

云化度寺記醴泉銘習之者往往失其韻致但貴端莊如木偶假刻誤人人亦罕識真云云據此可見南宋時醴泉銘覆本之多今之肥而無生趣者恐未可據斷爲原石也

儀顧堂題跋卷十三

歸安陸心源剛甫著

元槧足本黃文獻集跋

黃文獻集足本四十三卷首行題曰金華黃先生文集第幾下題初藁幾續藁幾次行題臨川危素編番陽劉耳校正間有題門人編次者次行有題日損齋續藁者卷一至卷三爲初藁卷四至四十三爲續藁前有至正十五年貢師泰序每頁二十四行每行二十四字版心有字數語涉元帝皆提行元刊元印本初藁一二詩三賦騷答問雜箸贊碑記序題跋書祭

文傳行述續藁一至三詩四詔制表牋箴銘贊五碑
文記六至十一記十三至十五序十六序說啟公文
十七策題勸農文上梁文十八十九題跋二十祝文
祠疏祭文行狀二十一至二十四神道碑二十六二
十七墓碑二十八至三十六墓誌銘三十七墓碣墓
記三十八三十九塔銘道行碑四十世譜傳初藁續
藁總爲四十三卷

四庫未收阮文達亦未進呈愛日精廬藏書志雖著
于錄僅得二十三卷其流傳之罕可知矣校明張儉
刊本約多一倍而羸文獻爲朝廷所役頌異端之宮

諛俗僧俗道之墓張儉削之可也鄆王拜任神道碑
太保定國忠亮公第二碑高昌郡公合刺普華神道
碑河西隴北道廉訪使凱烈神道碑武宣劉公神道
碑史惟良神道碑禮部尙書于文傳神道碑司徒陳
萃神道碑馬氏世譜皆有關史乘而亦削之未免無
知妄作矣觀其序似亦未見全本耳是本先爲王聞
遠所藏卷首有太原叔子藏書記白文長印蓮涇二
字朱文方印嘉慶中歸揚州汪孟慈有喜孫過目朱
文方印汪喜孫印朱文方印後歸上海郁泰峯有郁
松年印白文方印泰峯二字朱文方印余從郁氏得

之至正距今五百餘年紙墨如新完善無缺誠爾宋樓中元板第一等也

影元抄湛然居士集跋

湛然居士集十四卷元耶律楚材撰每卷篇目相連中多提行空格蓋以元刻影寫者譌字頗多以宋賓王校本校一過僅補正數十字不能盡改也卷十二有壽其子鑄十五歲詩卷十一廣陵散五十韻以廣陵散爲序聶政刺韓相俠累之事如後世南北曲之類皆創聞也

貢雲林集跋

雲林集六卷元貢奎撰舊抄本同治八年以閣抄本校過補卷三九月二十七日龍溪寄王敬叔七古一首光緒十年復以宏治刊本校一過卷一補夜坐五古一首伯長南歸余方北行以詩見貽因和以謝五言一首卷六題倪氏今是亭詩脫題與宿古柳墅詩誤連閣本亦同亦據宏治本補題卷首范吉識語亦補二十餘字

所安遺集跋

右所安遺集一卷元陳泰撰从錢塘丁松生大令所藏鮑淥飲校本過錄譚文卿中丞撫浙時卽以鮑校本刊刻余近得成化刊本以校此本多得詩三十餘首閻潔序一首劉三吾像贊一首及小像陳銓陳章陳瑤跋三首周濟蔣冕跋各一首因命寫官照寫補入蓋淥飲所見本前後缺十餘葉故脫落如此甚矣成化距今四百年耳刻本已不易得況元刻乎惜文帥移節陝甘不及補刊耳

栲栳山人集跋

栲栳山人集三卷元岑安卿撰抄本周元亮舊藏第三卷有錯簡各本皆同今逐一校正據餘姚縣志集凡四卷佚其末卷乾隆壬寅張氏新刊本遽以上中下分卷則似完帙矣此本不分上中下猶从原本錄出耳

夷白齋稿跋

余所藏夷白齋集凡兩本一舊抄三十五卷外集一卷一弘治八年張習刊十二卷兩本互有多少刊本有而抄本無者詩七十六首文二十六首抄本有而刊本佚者詩五十三首文三十五首卷首戴九靈序方是時祖宗深仁厚澤至一時作者五十四字刻本削之居無何我吳王聞其學問卽以樞府都事起于家不幾年間遂屢遷而長其省幕其後調太尉府參軍由參軍升內史刻本作藩翰不次用賢卽以樞府都事起于家又用之省幙用之公府序末題至正二

十四年歲在甲辰夏五月朔旦書刻本作同門友金華戴良書校以九靈山房集與刻本皆合蓋抄本戴序乃元時舊藁集本則入明以後所改定者弘治本未見底藁當從戴集錄入耳文詩字句不同尤多八里莊寄吳中兄弟洛口兩律同者僅十餘字倦繡七絕全章改易其尤者也

夢觀集跋

夢觀集五卷元釋大圭撰抄本是書本二十四卷首語錄三卷次詩六卷次雜文十五卷四庫館惟取其詩以卷四爲卷一卷五爲卷二卷六爲卷三卷七爲卷四卷八爲卷五編爲五卷著于錄餘皆斥而不收同治十二年奉

旨赴閩從晉江黃制軍處借得翰林院底本命小胥影寫副本卷第則改從閣本焉

耕學齋詩跋

袁華耕學齋詩閣本十二卷凡古詩七卷近體詩五卷提要云不知何人所編此本十卷凡古詩六卷近體四卷卷分既殊編次亦少異題曰汝陽袁華子英著河東呂昭克明編昭仕履無攷兩本相較 閣本東臯集陶兩首較此本多一首餘皆同惟 閣本集古諸詩散入各體詩中此則附于卷末編次似較有法別得曹倦圃藏本脫落極多雖分卷十二編次又與 閣本不同非善本也 閣本不題編次之人恐出後人所析耳

書鮮于伯機戊午十二月十二日別家詩後

伯機困學齋詩久佚顧俠君元詩選所收皆從元音
元風雅元詩體要采輯開卷爲戊午十二月十二別
家五古愚案此詩乃伯機由杭應薦入都之作戊午
當是戊子之訛伯機生于淳祐六年丙午戊午年祇
十三歲若延祐戊午則前卒十餘年矣剡源人困學
齋記丁亥之春識鮮于伯機于杭別去五年復來丁
亥爲至元二十四年伯機選爲宣慰經歷以予昂哀
詩官舍始相識吾年二十餘君髮墨如漆之句及此
詩十年賦倦游句証之當在至元十五年戊寅蓋是

年子昂二十四歲故曰吾年二十餘戊寅至戊子凡
十一年故曰十年賦倦游也十三年伯顏承制以董
文炳行省事于臨安十四年始設浙江西道宣慰使
以游顯爲之見牧菴人游顯碑則前乎此浙江無宣
慰不得有經歷也尤爲至元十五年伯機任經歷之
証由南而北故曰牽舟逆北風也杭州近海伯機仕
杭已卜宅臨湖有湖上新居詩故曰卜築滄海隅椽
屬乃幕僚無守土責故曰旣無官守責也

天順本宋學士集跋

宋學士集二十六卷附錄一卷明宋濂撰天順間刊本前有天順五年魏驥序案濂集刊于未入明以前者文曰潛溪前後續集四十卷詩曰蘿山集五卷其入明以後翰苑集四十卷芝園前後續藁三十卷朝京藁五卷洪武中劉誠意選爲文粹十卷建文初方正學又選爲續文粹十卷天順元年黃溥合各集選刊之僅得三百三十餘首此本爲黃譽官浙江參政時所刊合潛溪前後集潛溪文粹蘿山集而編之凡涉二氏者皆不錄計得詩文六百餘首似未見鑾坡

翰苑芝園朝京各藁者惟蔣超所刊景濂未刊集中
皇太子受玉冊頌皇太子入學頌國朝名臣頌西域
獲角端頌擬魏錡絕秦書太乙元徵記撫州路總管
張君銘二賢母墓碣康里公神道碑湯節婦銘趙侯
神道碑趙仲詵蔣處士兩誌詩塚銘方孝婦表辭孔
君權厝志跋何道夫鄭公墓誌富春子事實蘿山雜
言書白衢州秦士錄各篇已哀然在列豈蔣超未見
此本歟前有蓮涇二字朱文印太原叔子藏書記白
文長印金星軺藏書記朱文長印蓋先爲王聞遠所
藏後歸嘉興金氏文瑞樓者

原本藍山藍澗詩集跋

藍山詩集六卷明藍仁撰前有正統二年丁巳秋八月朔嘉議大夫禮部左侍郎陳璉序洪武庚辰歲花辰日武夷文學西江吉水倪伯文序雲松樵者張槩序橘山眞逸蔣易序計詩六百八十餘首藍澗詩集六卷明藍智撰題曰友生程嗣祖奇遠編集前有至正壬寅冬戊子進士戶部尙書西夏張昶序張槩題張易序計詩五百餘首案兩集明正統以後無重刻本故流傳甚少乾隆中開

四庫館亦無人進呈館臣從永樂大典抄出箸于錄

藍山集得詩五百餘首藍澗集得詩三百五十首此
從明刻原本抄出藍山人多得詩一百五十餘首藍
澗集多得詩一百五十餘首較大典本約增三分之
一近閩中郭兼秋主事重刻二人不言所據爲何本
前無原序核其詩與提要著錄之數相符當卽大典
傳抄本也藍山集誤收藍澗詩五十餘首藍澗集誤
收藍山詩三十餘首永樂大典本往往有此此非館
臣之誤乃永樂大典纂修諸臣草率之故兼秋主政
與余有舊觀其後序訪求二君集全本甚殷他日當
錄副寄之

新刻藍山集跋

右藍山集六卷閩中郭柏蒼主政新刻永樂大典本
誤收藍澗詩五十四首五古之靈鳳扁舟中望長洲
田家暮宿田家正月十四日西山感興擬貧士二首
在野暮秋懷鄭居貞西山暮歸秋山懷友暮歸山中
宿田家望武夷山少年行宿橘山田家懷蔣先生風
雨不已簡我同志七古之雲峯秋霽圖高彥敬畫楚
江春曉圖水南山房詩題劉商觀弈圖贈魏士達題
清江碧嶂八五律之題武季遠竹木圖挽趙子將三
首過雲洞嶺柳隘嶺上賓州九日作蒼梧夜坐藍澗

雜詩五首題觀音巖送別歐陽雪舟秋夕懷武夷舊業九日病中寄雲松山中漫題六首七律之寄張郭二山人西山脩竹挽張執中煉師柳城夢草堂玉蟾丹室拜虛白塔九日西山讌集七絕之首山行雨中皆藍澗詩也大同路石佛谷過吳嶺五律一首則原本所無考靜之生平踪跡亦未嘗之大同或他人詩而大典誤收者

新刻本藍澗集跋

藍澗集六卷閩中郭主政新刻永樂大典本誤收藍山詩三十五首七古之次韻張邑判留別一首五律之重柬雲松聞詔乃藍山集時事五首之一次袁縣丞述懷送孟寬希年入京宿瑞巖寺題徐節婦卷七律之送歐陽士鄂入京鄭居貞別駕歸閑未久又以明經赴召因敬題春江別意圖次張雲松山行挽江惟志學佛坐解滁州贈詹富之題廖監河行軸招王慎之東林宴集小軒得白石挽雪舟煉師二首山中書懷題劉椿正桂圖夜雨秋山訪隱圖秋宿南山別

墅有感寄贈毛包二山人七絕之風雨山中時景四
首題溫日觀葡萄二首題鄭御史竹木圖題古木蒼
崖圖六言題魏宰扇面他如詠白石五古雨漲陰崖
瀑下脫瑤臺下羣仙鶴駕紛在月天空水容淨十五
字春日山居送京學危提舉奉旨代祀文公祠加封
齊國公中秋有懷陸滕宅秋雨中探韻七律三首湘
陰舜妃廟五排一首亦原本所無也

張東海集跋

張東海詩集四卷文集四卷萬里志二卷附錄一卷
明張弼撰正德中其子宏至所編輯也

四庫不收附存其目然附存目所見祇詩四卷附錄
一卷則完本之罕見可知矣弼學問根抵程朱立朝
以風節著守南安以循吏稱胷次灑落一切踴齷不
以嬰懷其戒子詩有云權門要路是危機深爲鄭端
簡所稱家清獻公作是集序甚推服之吳騏謂宜從
祀文廟蓋有明一代完人不僅以詩文見長庸耳俗
目僅知推爲草聖可慨也夫

其二

東海詩集卷四王蘊和所畫團扇詩敘曰中國古無摺扇嘗見王秋澗記元初東南夷使者持聚頭扇當時譏笑之我朝永樂始有特僕隸下人所持以便事人耳及倭國充貢太宗遍賜羣臣內府又倣其制以供賜予天下迨通用之愚案摺扇北宋已有不始于明東坡嘗謂高麗白松扇展之廣尺餘合之則兩指許鄧椿畫繼云高麗松扇如節板狀又有用紙而以琴光竹爲柄如市井所製摺疊扇者此宋有摺扇之明證東海誤矣

癸巳類稿易安事輯書後

李易安改嫁千古厚誣歟人俞理初爲易安事輯以
辨之詳矣備矣惟張汝舟崇寧五年進士毘陵人見
咸淳毘陵志欽宗時知紹興府見會稽志建炎三年
以朝奉郎直秘閣知明州十二月召爲中書門下檢
正諸房文字四年兼管安撫使復以直顯謨閣知明
州見四明圖經五月上過明州厯奉儉簡遷一官六
月乞祠主管江州太平觀紹興元年三月往池州措
置軍務尋爲監諸軍審計司二年九月以妻李氏訟
其妄增舉數入官有司當汝舟私罪徒詔除名柳州

編管見建炎以來要錄則汝舟旣確有其人以李氏
訟編管亦確有其事理初僅以怨家改啟証易安無
改嫁事幾若汝舟亦屬子虛不足以釋千古之疑而
折服李心傳之心愚案汝舟卽飛卿之名妻字上當
脫趙明誠三字耳高宗性好古玩與徽宗同汝舟必
以進奉得官因進奉而徵及玉壺因玉壺之失而有
獻璧北朝之誣因獻璧北朝之誣而易安有妄增舉
數之報復不然妄增舉數與妻何害旣不應與訟朝
廷亦豈爲淮理耶惟李氏被獻璧北朝之誣人人代
抱不平故李氏一控而汝舟卽奪職編管汝舟無可

洩憤改其謝啟誣爲改嫁認爲伊妻其啟卽汝舟所
改非別有怨家也請列五証以明之汝舟先官秘閣
直學士復官顯謨直學士故曰飛卿學士其証一也
頒金之謗崇禮爲之左右得解事在建炎三年是時
崇禮官中書舍人故曰內翰承旨汝舟之貶事在紹
興二年則崇禮已爲侍郎翰林學士當日學士侍郎
不得曰內翰承旨矣其証二也若要錄原本無趙明
誠三字注文旣敘明李格非女矣何不敘趙明誠妻
改嫁汝舟乎其証三也男女婚嫁世間常事朝廷不
須問官吏豈有文書啟云弟旣可欺持官文書來卽

信當指蜚語上聞置獄而言改嫁不必由官有何官
文書之有其証四也獻璧北朝可稱不根之言若改
嫁確有其事何得云不根之言其証五也心傳誤據
傳聞之辭未免疏謬若謂採鄙惡小說比附文案豈
張汝舟亦無其人乎必不然矣

同文館唱和詩跋

鄧忠臣等同文館倡和詩舊抄本案忠宣公撰忠宣公
甯三年進士官大理寺丞以獻郊祀慶成賦入原廟
詩百韻擢正字遷考功郎事母周盡孝周卒護喪歸
葬飲食起居哀慕之節皆應古禮凡可以顯揚前人
者期得而後已范純仁薨禮官謚曰忠宣忠臣爲撰
謚議稱爲古之遺直時論以爲允崇甯初追奪純仁
謚並罰忠臣後入元祐黨籍大觀中卒著有杜詩注
玉池集見東坡居士集墨莊漫錄書錄解題

歲時雜詠跋

古今歲詩雜詠四十六卷宋蒲積中編影寫宋刊本
錢遵王舊藏也有廬山錢曾遵王藏書八字朱文長
印前有紹興丁卯仲冬積中自序提要云積中履貫
未詳案積中字致穌四川眉山人紹興初進士見宋
眉州進士題名碑蓋宋敏求先爲歲時雜詠積中復
擇宋代之詩附之卷三十五不全嘗求別本補足

會稽掇英總集跋

會稽掇英總集二十卷錢叔寶手抄本前有熙寧六年尙書司封員外知越州軍州事浙東兵馬鈐轄孔延之自序案延之一作延世字長源江西新淦人孔子四十六代孫慶歷二年進士與周敦頤友善嘉祐間知封州有遺愛遷廣西監司寬恤民力舊賤糴於民歲至六百萬石程督與租稅等延之計歲糴二十萬而足欽廉雷三州蛋戶爲富人所役延之奪使自爲業者六百家皆著定令改荆湖北路提點刑獄罷鼎州六寨戍兵千熙寧四年以度支郎中知越州嘗

自越過杭夜飲有美堂聯句云天目遠隨雙鳳落海
門遙蹙兩潮趨一坐稱善後改宣州未至召爲管勾
三司理欠憑由司出知潤州未行卒筵之言若不能
出口見義慷慨至老益彊雖齟齬不以易意工於爲
文子文仲武仲平仲皆自教以學並以文章顯于世
號臨江三孔宋史有傳見施注蘇詩嘉泰會稽志西
江人物志

會稽掇英續集跋

會稽掇英續集五卷錢叔寶手抄本末題將仕郎試
秘書省校書郎守越州會稽縣主簿黃康弼編次將
仕郎守大理評事簽書鎮東軍節度判官廳公事徐
鐸重校所錄皆熙寧十年吳充等一百二十五人送
程思孟出守越州詩也前有元豐元年十一月宣奉
郎守太常丞充集賢殿修撰前知明州兼管內勸農
事騎都尉賜緋魚袋借紫李定序此集爲厲鶚作宋
詩紀事時所未見如陳升之孫固盧革滕甫熊本李
東之朱肱張師杜叔元王靖章衡李綱王哲沈季長

張徽沈紳王誨韓鐸晏知止王說王琬褚瑄石牧之
姚原道張宗益王汾范子奇沈希顏程嗣彌鄭穆呂
嘉向徐大方虞大熙陳睦王陟臣周直孺王伯虎張
修何琬周諶石麟之潘及甫崇大年陳侗丁執禮杜
絃余中呂大忠鍾俊邱淑張炎民黃堽蔡承禧畢仲
衍范育莫淵黃顏何正臣余京韓宗右陳康民崔公
度畢仲連元耆寧練定黃君俞謝惇謝忱謝慥共四
十九人宋詩紀事不列其名誠罕觀之秘笈也直齋
書錄解題會稽掇英集二十卷熙寧中郡守孔延之
程思孟相繼纂集與原書不合解題當有脫字耳

宋詩拾遺跋

宋詩拾遺二十三卷題曰錢唐陳世隆彥高選輯舊抄本有鮑氏辛甫白文方印俊逸齋長白文方印康熙詩人鮑鈐舊藏也 四庫未著錄阮文達亦未進呈提要云北軒筆記前有小傳不知何人所作稱世隆字彥高錢唐人宋末書賈陳氏之從孫元至正中館嘉興陶氏沒于兵所著詩文皆不傳惟宋詩補遺八卷與筆記存于陶氏今宋詩補遺亦無傳本據此則傳本之稀有如星鳳厲樊榭輯宋詩紀事亦未見此書其失收者不下百家也

西漢文鑑東漢文鑑跋

西漢文鑑二十一卷東漢文鑑二十卷題曰石壁野
人陳鑑編明刊巾箱本每頁十八行每行十八字
四庫未收阮文達據影寫巾箱本進呈案鑑福州候官
人慶元二年進士其文皆採自兩漢書題下各注所
出體例頗善陳左海修福建通志採摭宏富經籍門
無此書可見流傳之罕矣

播芳大全跋

聖宋名賢五百家播芳大全文粹一百二十六卷明抄本卷一卷二賀表卷三賀牋卷四至卷二十二表卷廿三至四十三賀啟四十四至五十七謝啟五十八至六十四上啟六十五賀啟六十七制誥奏狀奏劄六十八萬言書六十九七十書七十一至七十七疊幅七十八劄子七十九至八十六尺牘八十七至九十青詞九十一至九十八疏九十九至一百一祝文一百二婚書一百三生辰賦頌詩一百四至一百六樂語一百七勸農文檄文一百八一百九上梁文

一百十至一百十七祭文一百十八至一百廿挽詞
一百廿二記一百廿三序一百廿四碑銘一百廿五
銘贊箴一百廿六頌題跋

四庫所收一百十卷朱竹垞所見二百卷書坊所刻
隨時增益本各不同安得合數本而較其缺佚也

樵李詩繫跋

樵李詩繫王明清仲言小傳黃山谷有王仲言乞米詩跋案揮麈前錄云紹興丙辰明清年甫十歲則生于建炎元年矣山谷年譜卒于崇寧四年是山谷卒時明清尙未生安得跋其乞米詩乎且遍檢山谷內外別三人亦無此跋也卷二呂諤閣立本北齊校書圖詩乃謝諤昌國作今墨迹在余家不知南疑何據而屬之呂諤也

宋詩紀事跋

宋詩紀事一百卷 國朝厲鶚撰樊榭熟于宋代掌故二百年來幾無其匹曹斯棟稗販譏其有遺珠是矣惟所舉陳棣諸集皆出永樂大典非樊榭所得見也然遺漏尙不止此以余寡陋尙可補百餘家至其舛誤之處不下百餘條如趙季西名岍而不箸其名洪平齋咨夔一人分而爲二之類所錄三千八百一十二人而不詳出處者一千五百有餘如柴成務李固宋史有傳而亦不署字里出處愚已攷得數百人他日當爲宋詩紀事補正先書此以當息壤

唐詩紀事跋

計有功唐詩紀事二百卷明刊本提要有功字敏夫其始末未詳李心傳繫年要錄載紹興五年秋七月戊子右承議郎新知簡州計有功提舉兩浙常平茶鹽公事有功安仁人張浚從舅也愚案有功臨邛人祖用章東都事畧附范雍傳父良輔慶厯進士見眉州志有功宣和三年進士自號灌園居士見宋刊二百家播芳大全目錄紹興六年累官左承議郎充行都督府書寫機宜文字十一月張浚遣來奏事後二日加直秘閣遣還七年獻所著晉鑑高宗曰朕乙夜

觀之且爲艱難之戒又問春秋防微之漸對曰婦笑
于齊六卿分晉此書之所爲作也上首肯隨以母老
求去升直徽猷閣提點潼川府刑獄公事張浚引親
嫌力辭疏累上詔仍舊職二十八年知眉州逾年移
利州路轉運判官明年移嘉州見繫年要錄

珊瑚鈎詩話跋

珊瑚鈎詩話二卷題曰朝請郎通判常州軍州事賜
緋魚袋張表臣撰宋刊本明松江朱文石大韶舊藏
也提要表臣字正民里貫未詳官承議郎通判常州
軍事紹興中終于司農丞愚案表臣單父人常編刻
張右史集七十卷與秦熈友善蓋江湖名士之趨炎
附勢者見張右史集後序

歲寒堂詩話跋

歲寒堂詩話宋張戒撰原本已亡今本二卷乃从永樂大典錄出者提要戒名附見宋史趙鼎傳不詳其始末惟李心傳建炎以來繫年要錄載戒正平人紹興五年四月以趙鼎薦得召對授國子監丞鼎稱其登第十餘年曾作縣令則嘗舉進士也愚案張戒絳郡人沈晦榜進士紹興五年二月除秘書郎七年七月提舉福建茶鹽見中興館閣錄餘詳宋史補傳

草堂詩話跋

杜工部草堂詩話二卷題曰建安蔡夢弼集錄東洋
覆宋本提要夢弼建安人始末未詳愚案夢弼字傳
卿建安人生平高尚不求聞達潛心文學識見超拔嘗註
韓退之柳子厚之文嘉泰中著草堂詩箋四十卷補
遺十卷見草堂詩箋俞成元跋

藏海詩話跋

藏海詩話一卷宋吳可撰舊抄本案吳可字思道金陵人以詩爲蘇軾劉安世米芾李廌李之儀周紫芝鄧肅所賞居都城面城開軒曰橫翠釋惠洪李之儀皆有詩官至團練使宣和末亟掛冠去責授武節大夫致仕詩思益超拔寓新安野服蕭然如雲水中人見至正金陵志寶晉英光集姑溪居士集優古堂詩話石門文字禪太倉稊米集栴檀集

渭川居士詞跋

渭川居士詞一卷宋呂勝已季克撰愛日精廬藏書
志箸于錄注曰仕履未詳愚案勝已福建建陽縣人
自號渭川居士父祉以尙書護合肥軍死義敕葬邵
武之樵嵐勝已因家焉築園曰渭川嘗從朱子及張
南軒講學朱子爲和其東堂九詠詩工隸書得漢法
厯江州通判江浙運判官至朝請大夫見晦庵集成
涪臨安志八閩通志作杭州者誤也

雙溪詞跋

雙溪詞一卷題曰雙溪擬巢翁延平馮取洽熙之汲古閣影宋抄本四庫所未收也愚案取洽字熙之自號雙溪擬巢翁福建延平人宋季詩人語意不減唐人送別劉篁嶠詩云來似孤雲出岫間去如高月耿難攀若爲化作修修竹長伴先生篁嶠山見梅礪詩話卷下

新刻蕭臺公餘詞跋

蕭臺公餘詞一卷錢唐姚述堯撰宋史藝文志箸于錄案述堯字進道華亭人以錢唐籍登紹興二十四年進士知温州樂清縣縣有蕭臺峯其詞皆官樂清時所作故以爲名進道在太學日每夜必市兩蒸餅明日輒以飼齋僕同舍怪而問之進道曰某來時老母戒以夜飢無所得食宜以蒸餅爲備某雖未飢不敢忘老母之教也其篤于內行如此生平與張橫浦葉先覺施彥執爲友彥執沒橫浦祭之以文云生平朋友不過四人姚葉先亡云云姚卽進道也其事迹

僅見于咸淳臨安志張橫浦集宏治温州府志北窗
輟炙錄進道與橫浦同調而其詞清麗芊綿絕無語
錄氣亦南宋道學家所罕見也是本流傳極罕


四庫及羣經室外集皆未著錄余以仁和勞氏得抄
本丁松生明府將有杭州八家詞之刻移書借錄並
囑攷訂仕履因識其顛末于後

儀顧堂題跋卷十四



歸安陸心源剛甫撰

宋拓聖教序跋



宋拓聖教序余所見不下數十本以王良常積書巖藏本爲最十年前曾見之章紫伯明經許以價昂未得此本璫蠟精良墨光如漆轉折鋒銳纖毫畢具與王本無異洵北宋拓本之至精者王本剪損二十字此則完具無損尤可貴也門下士魏稼孫推爲天下第一當不誣耳

唐釋懷素山水帖跋

懷素山水帖宋徽宗內府物爲書譜所載八十七種之一江村消夏簪于錄是帖世有二本一刊于三希堂完善無缺後有趙文敏跋一卽此本中缺兩字前明爲項墨林所藏康熙中歸高江村又經梁蕉林簞江上王儼齋鑒定者也

越州石氏本爭坐位跋

越州石氏歷代名帖有顏魯公爭坐位帖見陳思寶刻叢編王述庵稱宋以來坐位帖刻本有七而獨遺石氏可見流傳之罕矣此本墨光如漆神采煥然爲莫雲卿舊藏與祭姪祭伯文寒食鹿脯帖白香山詩簡柳公權泥甚帖同裝與叢編石氏帖目合其爲石氏所刻無疑安師文吳中復刻石久亡今惟存關中本轉輾傳摹視此有霄壤之別郭僕射爲郭英乂粹編考訂已詳菩提寺長安左街官寺見唐會要唐制凡國忌西京八十一州各於寺觀行香設齋見唐六

典廣德二年裴冕爲左僕射郭英乂爲右僕射見通鑑裴僕射者冕也

越州石氏本祭伯文祭姪文跋

右宋榻顏魯公祭伯文祭姪文艸與爭坐位帖鹿脯帖寒食帖柳公權泥甚帖白香山詩簡同裝皆越州石氏博古堂帖也其口見寶刻叢編祭伯文後此惟刻于王氏鬱岡齋祭姪文後此凡五刻文氏停雲館吳氏餘清齋董氏戲鴻堂東昌鄧氏及翻刻停雲本也祭伯文與王刻大抵皆同祭姪文多與諸刻歧異初頗疑之反覆推求乃得其故蓋吳刻出于鮮于伯機所藏與此本皆以真跡上石鮮于本悉仍原草一筆不遺此則或刪塗改之字或移旁注于中故字形

有大小之殊字數有多寡之別異流同源非二本也
文刻出于聶雙江家藏墨迹相傳以爲米臨小有參
差固無足怪翻文本原草爾之首觀句爾之二字譌
作東二卜爾幽宅譌作及爾幽宅則以所據文刻非
初拓本爾上有石裂紋之字僅存二點與爾字牽連
而下卜字左右裂紋尤多摹刻者不諳文字成此大
謬戲鴻本改易行款全失本真鄧刻稱以聶氏墨本
入石然與翻文本譌謬皆同蓋鈎填之贗鼎也祭姪
文草白當推此爲第一下真蹟一等惟常字下原字
上缺十字恨無宋拓可補耳

閣立本北齊校書圖跋

唐閣立本北齊校書圖絹本重設色一人坐胡牀脫
帽方落筆左右侍者六人四人其一榻陳飲具其一
下筆疾書其一把筆若有所營其一欲逃酒爲同舍
挽留之且使侍者着韉與山谷畫記脗合惜南宋時
已失後半具范石湖跋中今并山谷畫記亦佚幸有
石湖及陸放翁韓無咎郭季勇謝昌國諸跋可證流
傳有緒耳石湖名成大吳郡人謚文穆宋史有傳卒
紹熙四年年六十八跋雖不著年月証以同時諸跋
當爲文穆五十以後書淳熙中文穆嘗充金國祈請

使故有奉使之印韓元吉字無咎號南澗開封雍邱人寓居湖州官至吏部尙書爵潁川郡公湖州府志寓賢有傳印曰潁川郡侯其時尚未晉封郡公也詩載南澗甲乙稿索虜二字集作北方當是後人所改南澗生于重和元年跋題淳熙八年則六十四歲書也先渭南伯號放翁又號龜堂山陰人宋史文苑有傳卒嘉定二年年八十五跋題淳熙八年則五十七歲書也郭見義字季勇河南人官南安府學教授江西通志有傳謝諤字昌國學者稱艮齋先生爵清江縣開國伯宋史有傳楊誠齋集有墓碑故其印曰艮

齋謝諤曰昌國曰清江開國也圖與隔水綾相接處有甯江軍承宣使之印跋與隔水相接處有康州觀察使印鄂州之印信州之印承宣使舊名節度觀察留後政和七年改諸州觀察使沿唐制皆武臣也見宋史職官志宋人喜以官印印書畫如王右軍行書第一帖在王禹玉家以門下省印印之見米芾畫史四印亦猶是也跋紙有鎮江府印紹興襄陽府印隆興府印紹興府印建炎太平州印當由收藏之人歷知四府一州故耳曰京西南路經畧安撫使曰京西南路馬步軍都總管襄陽府之兼官也隆興府管內

觀察使印乾道江西路安撫使印建炎江西路馬步
軍都總管印隆興府之兼官也□□□越州管內觀
察使印建炎浙東安撫使印建炎浙東路都總管司
之印紹興府之兼官也鎮江府觀察使印鎮江府之
兼官也宋史職官志渡江後官印多亡失禮部更鑄
給之加行在二字或冠年號以別新舊其不冠年號
者尙是北宋舊印其冠以建炎隆興紹興乾道年號
者南渡以後所重鑄也元時爲柯九思所藏有丹丘
□□四字朱文印 國朝爲梁蕉林相國所藏有蕉
林書屋棠邨審定家在北潭等印後歸怡賢親王有

怡親王寶明善堂珍藏書畫記印同治初乃歸周替
農侍郎自跋甚詳侍郎身後王益吾祭酒介紹以朱
提三百兩歸于余

自屈室是足矣

六

汝南公主墓誌跋

虞永興汝南公主墓誌草唐白麻紙本有李西涯王
弇州文休承諸跋王文二公皆泥于書史旁注小字
一語旣疑爲王摹又疑爲米臨余謂皆非也書史云
汝南公主銘起草洛陽王護處見摹本後十年在故
相張公孫直清處見真迹其後止貞觀十年十一月
丁亥朔十六旁注小字云赫赫高門在裴丞相家是
其銘其前標紅綾色如新有幾玄題其標云是草在
張直清家銘在裴丞相家分爲二明甚所云旁注小
字當卽注于標綾之上與前題標綾一律非注于誌

草可知宋宰相無姓裴其人唐諸裴爲相者十六人裴丞相者唐相也旁注小字必出唐人或卽幾玄筆亦未可知前標旣失後注之小字安能獨存二公之疑亦考之不審矣張彥遠歷代名畫記唐有宏文之印印書者其印至小今誌草有宏文之印僅方寸許與名畫記合則曾入唐御府收藏矣至宋而爲張直清汝欽所得米老書史屢及之入元而歸于郭北山後有米老跋見周密雲烟過眼錄紙尾有天錫二字白文方印金城郭氏朱文方印其卽北山所藏草窗所見無疑後又歸于鮮于伯機故有樞字朱文方印

鮮于樞伯機甫白文方印漁陽私記白文方印明正
德中爲陸水村尙書完所得李西涯毛憲清王文莊
三跋皆爲水邨作也水邨敗歸于王弇州有貞元二
字朱文連珠印及兩跋文文水莫雲卿俞允文張鳳
翼陳眉公嚴澂諸題皆爲弇州作也入

國朝爲山陰沈氏所得築寶虞樓儲之同治中乃歸
于余據雲烟過眼錄原有米老跋惜今失之耳李西
涯毛弇州文文水毛憲清張伯起陳眉公俞允文莫
雲卿陸水村明史皆有傳王鴻儒字懋學南陽人成
化鄉試第一丁未進士仕至南京戶部尙書卒諡文

莊見萬姓統譜

巨然長江圖真蹟跋

右長江圖不著畫人姓名絹本水墨以工部營造尺度之長五丈高一尺四寸起雪山訖鎮江府前有雙龍圓印宣和朱文長印項墨林祕玩朱文方印平生真賞朱文方印當時皆騎縫蓋于隔水綾上今隔水綾已失印祇存其半陸文裕跋董香光跋皆題于別紙前有項墨林家珍藏朱文長印樵李項氏士家寶玩朱文長印項墨林鑑賞章朱文長印亦皆存其半每遇州軍古迹山寨朱筆題名案宣和畫譜山水門載長江圖二一爲王晉卿千里長江圖一爲巨然表

江圖晉卿以金碧擅長此非其倫昔之評巨然畫者
曰淡墨輕嵐曰蓊鬱芊綿曰溫潤秀逸似爲此卷寫
照其爲宣和所藏巨然長江圖無疑陸文裕以爲南
宋董香光以爲北宋卞令之書畫棗攷以爲夏珪皆
考之未審也朱標地名以荊州爲荊南府乃孝宗以
後改名當爲後人所加書法甚拙與宋時戶口冊相
似意者靖康之亂爲軍官所得而令吏胥填註歟

蘇文忠公書昆陽城賦跋

此蘇文忠公四十四歲時自書所作也是歲公由徐州移知湖州言者劾公詩文謗訕命皇甫僎到湖追攝八月十八日就逮至十二月廿九日獄具責授黃州團練副使或謂九月廿五日獄事方急豈有閒情及此不知公學識造邁不以利害動心雖爲群小所陷而意氣自如何遽稱公在獄中哲宗遣小黃門視狀適就寢鼻息如雷於此可見公處憂患氣象若謂一遭排擠卽百事俱廢亦淺之乎視公矣參寥與公交最密亦坐公得罪書此遺之亦猶獄中寄子由詩

意乎集中所刻與此微有不同名人簪作屢易其稿
集刊乃晚年定本此猶中年所書益證其爲真跡也

朱文公上時宰二劄跋

朱文公二劄真迹三韓卞令之舊藏書畫彙考著于錄有明人陳廖李吳四跋按朱子年譜淳熙五年八月差知南康軍六年三月赴上請祠不報六月請減星子縣稅請祠不報七月申省自劾劄祇敘請祠減稅二事未及自劾事當是六月中七月前與再請祠狀同上所謂今有劄目申懇是也宰輔編年錄淳熙五年三月壬子史浩左丞相十一月甲戌罷丁丑趙雄右丞相宋史雄傳熹累名不出雄請處以外郡南康之除薦由于雄劄謂略敘謝誠者此也是時王淮

未相史浩早罷其爲上趙雄無疑陳廖二跋皆考之
未審也是年參知祇錢良臣一人二公者或指良臣
與樞密王淮歟年譜八年八月改除提舉兩浙常平
茶鹽十二月視事正月巡歷紹興婺州衢州奏劾金
華上戶朱熙績不伏賑糶有狀載文人劄中豪民卽
指熙績淮亦金華人故有丞相于里社間之語後劄
爲上王淮固矣惟事在九年正月陳跋以爲八年者
亦誤耳劉堯夫字淳叟江西金溪人淳熙二年進士
除國子正遷太常博士官至隆興府通判著有井藪
齋集見江西通志及吳文正集淳叟師事陸象山兄

弟楊誠齋嘗薦于王淮與文公同在六十人之列後
叛象山而逃于佛朱陸文集語錄中屢及之蓋文公
素與之善故以關白託之時淳叟未遷常博故云國
正也陳敬宗字光世正統八年年六十七廖莊字安
止景泰二年年四十八李東陽字賓之成化乙巳年
三十九吳寬字原博成化甲辰年五十明史皆有傳
茲不贅

張文靖與路允迪札跋

張守字子固又字全貞毘陵晉陵人官至參知政事
謚文靖宋史有傳路允迪名公弼以字行宋城人建
炎二年簽書樞密院事爲言者論罷提舉洞霄宮三
年五月起爲兩淮制置使七月落職提舉江州太平
觀四年七月乙丑是月辛丑朔乙丑實廿五日復端明殿學士紹
興十年以南京留守陷金七日不食死見宰輔編年
及繫年要錄宋制無以白衣領宮觀者同時張澂亦
以宰執責授祕書少監想允迪落職亦有祕監之授
故曰提宮祕監也兀朮于建炎四年渡江將自運河

引舟北歸趙立辭慶扼其衝遂于六合築台而北見
宋史帝紀及忠義傳故曰江北殘虜扶攜北歸舍舟
遵陸也趙立以漣水軍鎮撫使兼知楚州辭慶以天
長軍鎮撫使兼知高郵州劉位以滁濠鎮撫使屯泗
州之招信縣其子綱以閤門舍人知泗州故曰郵楚
之趙辭泗之劉也趙辭劉之授鎮撫使皆在建炎四
年五月至八月而辭慶殉于揚州九月而趙立殉于
楚州劉位于六月克滁州八日而爲張文孝所害子
綱代領其衆趙辭宋史有傳餘詳繫年要錄金人之
北也慶劫之六合立破之于楚州故曰雖無大捷隨

力取勝也建炎三年七月兀朮尙未北歸五年七月趙辭皆已死札題七月廿五則建炎四年七月廿五日也文靖方以是年五月參大政允迪尙領宮祠想來書有求知州之意故答以明已有人云云也是日允迪卽復端明文靖身在政府不便明告故以以俟光寵四字爲隱語耳三帥當指張浚張俊韓世忠趣劉當指趣劉光世督淮南兵救楚州事時呂頤浩新免呂病未差當指頤浩范宗尹獨爲僕射丞相當指宗尹梁汝嘉時爲常州通判至紹興二年始遷運副見本傳及臨安志知婺州傅子駿名崧卿山陰人宋

史有傳知溫州趙億知衢州章思永皆見浙江通志
知嚴州范世延見宋刊嚴州圖經趙子砥知台州見
宋史本傳及嘉定赤城志而浙江通志失載莊安常
知處州見仲并浮山集莊公行狀浙江通志亦失收

張文靖與梁仲謨札跋

案梁汝嘉字仲謨處州麗水人宋史有傳紹興二年除直龍圖閣知杭州以稱職進徽猷閣待制試戶部侍郎五年進顯謨閣直學士三月兼兩浙西路安撫使六年八月五日除戶部侍郎見潛說友臨安志及本傳文靖于紹興二年九月知福州五年八月名赴行在見梁克家三山志仲謨之兼安撫在五年三月文靖之赴召在五年八月札題九月七日則紹興五年之九月七日也文靖之由福州除提舉萬壽宮兼侍讀也有辭免兩劄故云再上一章未報也辭免第

二劄有臣今迤邐至衢州聽候指揮語由衢州而朱池由朱池而桐廬皆福州至杭必由之路也改除詔旨據辭免劄于五年七月二十四日奉到則交替起發當在八月故三山志云八月召赴行在也八月晦至衢九月七日至桐廬時地正合

張文靖與仲仁郎中札跋

文靖兩知紹興初任在紹興二年二月再任在紹興十年八月見宋史本傳及嘉泰會稽志其再知也由知洪州移毘陵人再辭免知紹興府劄云二十日起發迺遷至浙東乞赴闕奏事劄云已自衢婺州前去與札中昨已次婺語合乞奏事劄又云乞許臣到任後赴闕奏事與似聞已許奏事語合時朝廷遣三使括諸路財韓球在會稽領五十餘萬文靖入覲爲上言之見本傳與帑藏一空語合辭免知紹興劄云衰疾纏綿春夏增劇股肱之郡益非所堪與病瘁不堪

郡寄語合到任謝表云扶衰就道觸熱之官與攜帑
觸熱語合札中有數日可到官下語札尾題十四日
而不著何月証以會稽志紹興十年八月任及謝表
二十四日到任語則此札爲紹興十年八月十四日
無疑也李燾字仁甫紹興八年進士宋史有傳一字
仲仁見楊誠齋集謝謬墓碑疑卽其人

張文靖與王巖起札跋

王傳字巖起山東蓬萊人所居曰樂齋嘗寓江西之上饒紹興五年官左儒林郎福州路安撫使幹辦公事文靖薦狀稱其學問不苟識趣亦高五月召對除宣德郎尋降知無錫縣二十六年以張滙薦通判臨安府廿六年八月爲朝請郎廣南提舉旋遷右朝請大夫提舉江西茶鹽二十九年十月乞祠主管台州崇道觀三十年以王淮薦知建州明年改知太平州見繫年要錄江西通志呂本仁東萊集毘陵集曰計議者巖起必嘗任樞密院計議官耳文靖不以書名

惟陶南邨書史稱其字畫圓熟流美世不多見四札
導源南宮誠如陶氏之評曾爲長洲謝滄湄淞洲所
藏有青笠綠簑齋藏六字朱文長印滄湄精于賞鑒
世廟嘗出內府所藏命之鑒別一一不爽見
國朝詩別裁今參攷羣書語多有據其爲真迹無疑
滄湄精鑒良不誣也

跋宋拓紹興米帖殘本

宋高宗哀集米元章墨迹刻爲十卷劇蹟皆萃焉見
董史宋書錄袁伯長清容居士集其石藏秘閣牌石
庫見陳騏中興館閣錄明時尙存內府 本朝康熙
中存一片王虛舟曾見之虛舟題跋涿州故大學士
馮銓藏有第九卷卷首篆書標題米芾篆隸第九卷
末有紹興辛酉奉聖旨摹勒上石兩行計篆書惟周
王撫萬邦四十行漆書竹簡八行猗猗嗟皎皎五行
天地元黃十一行芾皇恐得手示爲慰十一行王兄
收可大用八行離皇佳勛十二行篆至籀乃至作七

行隸書智慧清淨經十五行正大譯金剛般若經序
二十四行漢札有三發筆者九行隸須師宜官四行
王荆公信筆若無意七行法雲佛國禪師八行侍下
冲茂六行太易英俊十三行陸謹庭藏有第二卷卷
首篆書標題曰米芾行書第二卷末與卷九同計芾
頓首再拜大尹尙書龍圖鈞席八行芾頓首再拜子
方司勳尊兄閣下十三行芾依赦繼絕應敕律赦令
十七行芾頓首再拜知府內閣侍郎台座十一行芾
頓首再啟吾丈久鬱經綸八行芾頓首再拜知府資
政右丞鈞席十四行良款而行役相仍十四行芾頓

首同官作姻七行芾啟久違每深景仰十四行芾頓
首適承尊誨十二行芾頓首再拜內閣侍郎台座三
十行芾頓首兩應想佳快五行芾啟昨日少款英論
六行姜紹書藏有第三卷皆擘窠書見韻石齋筆談
何義門藏有二卷皆臨二王艸書見楊大瓢偶筆趙
晉齋法帖彙目載一卷凡十九札皆行書米帖全本
固不可見殘本亦如星鳳其可考見者六卷篆隸一
卷擘窠書一卷臨二王二卷行書二卷四卷不可考
此六札爲莫雲卿舊藏與越州石氏帖顏白柳諸迹
同裝凡臨謝太傅八月十五帖八行太宗跋謝公眞

迹山林妙寄六行芾頓首再拜前日辱甲兄國士之
遇十行芾頓首蒙教惠茶土二行芾頓首邂逅得相從十
行芾頓首再拜迺故人過壘十二行又出馮姜趙何
陸諸本之外惜前後皆缺未能定爲何卷耳

儀顧堂題跋卷十五

歸安陸心源剛甫著

趙文敏秋郊飲馬圖跋

右秋郊飲馬圖右角上題秋郊飲馬圖秋字上蓋趙字朱文方印右角下有大雅二字朱文長印惜經割截祇存大字左角上題皇慶二年十一月子昂下用趙氏子昂朱文方印左角下有柯九思陽文墨印以工部營造尺度之高八寸五分長二尺一寸五分絹本重設色秋林疏樹野水長隄一朱衣奚官持竿驅馬就飲馬凡十立水者一踏沙者三在陸者三一爲

奚官所乘隔岸馳逐者二工緻之中天然秀逸無一毫俗氣此文敏所以不可及也汪柯玉珊瑚網下令之書畫彙考皆箸于錄生平所見文敏書如徐壽蘅侍郎之與中峯十札景劍泉閣學之妙法蓮花經秦淡如都轉之臨右軍四帖費屺懷庶常之千字文酒德頌及余之洛神賦稼說與袁伯長札皆無上妙品畫則所見皆僞真迹僅此一卷耳

趙文敏詩翰跋

右趙文敏和任叔實韻寄衛山甫並簡瞻載五律二
首白麻箋本有湯雨生錢警石姚伯昂等七人題愚
案任士林字叔實家奉化松林鄉人稱松鄉先生其
先蜀綿竹人宋少師希夷之後八世祖始居奉化再
徙崎山趙子昂鄧善之袁伯長咸推其文大德間攜
家華亭與衛山齋善有訪山齋詩至大初舉爲安定
書院山長明年卒衛謙字有山一字山甫號山齋宋
進士調丞永嘉元授漳州龍溪尹辭升温州路治中
復辭建義莊贍宗族及鄉里之貧者建義學教願學

而無師者鄧善之趙松雪皆與爲文字交名人韻士
遊其門者無虛日著有讀易管見三十卷見顧清松
江府志叔實之赴華亭志稱在大德間時子昂爲浙
江儒學提舉由奉化至松江不必取道湖州故曰枉
道過訪志稱叔實與山齋善今以詩証之則叔實之
攜家華亭山齋實招之也松江府志郡守表大德至
大間有賈汝舟詩中所稱賈太守當卽其人詹載疑
卽其字攷之志乘事蹟無一不合其爲真迹無疑貞
愍雅士警石通人鑒定不謬也

跋趙書小楷靈寶度人經大梵莊詠儀式


趙文敏小楷靈寶度人經大梵莊詠儀式合裝一卷
爲吳氏兩壘軒所藏靈寶經題皇慶元年春正月旣
望三教弟子趙孟頫載書後題誥封開府儀同三司
上清真人大法司今年九十有四嗣君欽承光寵守
慈儉之教演道德之源命書是經爲壽其副藏之天
目山中峯精舍水陸道場展誦集福莊詠儀式題曰
中峯本師于天目道場會校諸經命書此供閱翰林
學士承旨知制誥同修國史吳興趙孟頫識末有管
公樓孝思道院儒釋道三教真經朱文長印靈寶經

之首有松雪齋朱文長印天水郡圖書朱文長印子昂識下有趙氏子昂朱文方印愚案二篇非同時所書靈寶經題皇慶元年時子昂五十九歲官翰林侍講學士延祐三年進翰林學士承旨元制侍講讀曰同修國史承旨則曰兼修國史既題承旨仍曰同修不可解也同字豈誤筆耶儀同不著姓名當爲張留孫之父九德留孫于世祖時封元教宗師後加大宗師武宗時封大真人三代皆一品九德本貴溪士族以留孫故起家至江東宣慰同知受一品封見留孫碑惟元制道教封號有法師宗師大宗師真人大真

人之稱無以師爲司者司字豈筆誤耶或謂道陵嫡裔皆封大真人安見儀同三司非張與材愚謂與材于成宗時嗣封武宗時授金紫光祿大夫封留國公卒延祐三年見江西通志及元詩選無所謂儀同三司也是年留孫年六十五其父九十四固宜則儀同爲九德無疑也是時君昏世濁奉釋道如神甚至搜訪賢才亦委之道士致天下貪榮之士趨之若鶩子昂非下愚何至自稱三教弟子噫亦趨時而已中峯名明本姓孫氏子昂夫婦所皈依故曰本師管仲姬之父名仲字直夫倜儻尙義鄉里稱之曰管公無丈

夫子子昂于皇慶元年夏五月因仲姬之請卽管氏廬剏樓三間以祀之並其配因使道士掌之扁曰孝思道院見松雪齋集管公樓孝思道院記卽今金婆寺故址與子昂故宅鷗波亭相望二書本天目中峯精舍中物後歸管公樓否則樓剏于夏五月而經書于春正月又適足增疑竇耳子昂寫佛道經散之名山甚衆見楊載所撰行狀孝思道院爲子昂自剏所施寫經必多惜今不可見矣或謂字畫潦草結構蕩然子昂斷不至此當是子女代筆愚不敢臆斷許信臣中丞謂擺脫閒架獨抒機杼愚尤不敢附和也清

容集四十六卷有題子昂書靈寶經稱其着紙如飛
歐褚而下不足論乃至治二年四月所書與此不同
蓋子昂所書靈寶經非一本矣



イ
有
二
力
山
イ
コ

三

趙子昂行楷洛神賦跋

趙文敏洛神賦末題曰子昂爲清夫書有趙氏子昂
朱文方印紙本行楷書紙三接騎縫及起首有趙氏
子昂之印後有牟巖題有獻之二字朱文方印清夫
不知何人元有崑山顧信字善夫號樂善處士子昂
門生也泰定中刻文敏書數十種趙寒山孫雪居目
爲樂善堂帖清夫或卽善夫兄弟行歟牟巖字獻之
號陵陽父子才宋史有傳由四川遷湖州巖理宗時
官大理司直宋亡不仕箸有陵陽先生集卒于至大
辛亥與子昂時代相接至元己亥子昂年四十六力

請歸改浙江儒學提舉此書之作當在其時故有陵陽題語卷中有寄傲二字朱文腰圓印構李項氏傳家寶玩八字繆篆朱文長印項墨林秘笈之印朱文長印二項元汴朱文方印項子京家珍藏朱文長印子京所藏白文方印一項墨林秘玩朱文方印二延吉二字朱文長印王氏子貞朱文方印文石山人白文方印朱氏象玄白文方印儀周鑑賞白文方印案自寄傲至墨林秘玩皆項墨林印也王延吉字子貞蘇州人王文恪公鏊之長子中歲市鼎彝圖書充挾于家官至大理寺副見陸子餘集朱大韶字象玄號文

石松江華亭人嘉靖二十六年進士官至國子監司業家有快閣富于收藏見松江府志儀周者安麓村也康熙時人箸有墨緣彙觀蓋是卷先爲王子貞所藏後歸朱文石又歸天籟閣入 國朝爲安麓村

所得余以董香光盤谷圖序書畫合璧卷易之富樂賀太守太守得之那文毅後人者康熙中梁真定相國刻入秋碧堂帖後有跋云古詩十九首三百篇之變而不失其正者曹子建諸賦騷辭之變而不失其正者子昂書二王之變而不失其正者有此三美清夫其寶之西秦張模張煇會稽戴錫嘉興顧文琛同

觀于學古齋據此則原本當與古詩十九首合裝真
定上石時已失古詩不知何時又並張跋失之耳

跋趙文敏致袁文清書

右元延祐七年庚申八月廿一日趙文敏致袁文清書也文清名桷字伯長自號清容居士大德五年以薦入翰林延祐六年將俟代南歸夏五月由集賢待制超擢直學士遂不果七年乃引疾還旋遣使復召至治元年三月到京二年三月改翰林直學士見清容集己未辛酉壬戌諸祝文及蘇滋溪所撰墓誌文敏于延祐六年謁告四月廿五日出都五月十日行抵臨清管夫人卒于舟次與仲穆護喪還吳興見松雪集管夫人墓誌文清之歸四明也文敏已里居故

曰今春聞兄長來歸喜而不寐也文清辛酉祭祖禰
文有舊歲南歸將一意誓墓語想致子昂札中亦有
此語故曰誓墓得無太早也文敏生于宋寶祐二年
甲寅時年六十七歲文清生于宋咸淳二年丙寅時
年五十五歲故云孟頫衰老無堪兄長才力强健也
文敏三子長亮早卒次雍次奕管夫人于至元二十
六年己丑歲來歸見孝思道院記下距延祐庚申三
十一年雍奕非長子計此時均不及三十歲其子婦
青年可知故云兩兒媳皆不曾成就也書法道秀得
蘭亭聖教神髓前明曾藏項墨林處有子孫永寶西

楚王孫神遊心賞寄傲四印不知何時落于僖父之手與鮮于伯機偽迹同裝余一見叫絕証以清容文敏事迹無一不合其爲真迹無疑文敏書刻入類帖甚多往往真偽參半雖精如三希堂帖不免見第十元瑞此札爲晚年妙迹自元至今未見著錄世無真識棄周鼎而寶康瓠于人且然文字乎何尤潛園得此之日正五百六十六年前文敏作書之日文敏故居與潛園毘隣暑退涼生殘荷滿池明窗展讀想見蓮花莊上揮毫伸紙時也

其二

管仲姬歸文敏時年二十九歲文敏三十六歲卽令
當年生子先有亮而後有雍仲穆之生總在甲寅以
後吳氏續疑年錄作生于至元己丑則仲姬于歸之
歲連生二子有是理乎原注松雪齋集有大德甲辰
雍年十六語今檢元刻松雪齋集無此文也袁清容
于咸淳二年夏生于臨安是歲大熱茵席器案如執
焦生七日而母夫人以暴泄卒見自撰先夫人行述
與滋溪集文清墓誌泰定四年疾終年六十二合錢
氏疑年錄作生于丁卯亦誤也因並識于此

元勅賜開府儀同三司上卿輔成贊化保運元教太宗師志道宏教冲元仁靖大真人張公碑跋

右張留孫碑至治壬戌趙文敏奉勅撰並書丹篆額案文敏行狀卒于是年六月辛巳據碑留孫卒于至治元年十二月壬子明年三月弟子七十五人歸其喪于故山仁宗乃命吳全節嗣封予告治喪命子昂著文是碑之作當在至治二年四五月間去子昂之卒僅一月餘耳松雪齋人及松雪外人文之爲僧道作者甚多獨不收留孫碑恐文與字皆仲穆代筆故字與湖州府治碑絕類不然煌煌大篇刻集時反遺

之耶行狀稱至治壬戌春遣使傳旨俾書孝經而未
及奉勅撰碑事豈以其方外而諱之歟恐亦未必然
也天曆二年五月立石去子昂之卒七年矣

跋鮮于伯機十詩五札

右鮮于伯機支離叟序及詩十章致悅齋知府札一
澄虛真人札三巡檢姪札一有玉夢樓潘榕皋兩跋
案伯機名樞薊州漁陽人元初滅宋選爲浙江宣慰
司經歷改行省都事後遷太常典簿厯居杭州之斤
橋所居曰困學齋自號困學民又取莊子語號直寄
老人大德壬寅卒年五十七見剡源集困學齋記九
靈山房集跋鮮于伯機安公壽詞陶宗儀輟耕錄松
雪集哀鮮于伯機寄鮮于伯機詩陸友硯北雜志支
離叟爲所植松見遂昌雜錄溫日觀日至鮮于家袖

瓜啗其大龜抱軒前交離叟或歌或笑是也十詩爲元風雅元音元詩選所未收伯機時年五十四越二年遂捐館故子昂之圖無傳剡源集亦無此傳惟序稱大德己亥得松于陳氏廢園明年枝葉盛茂則松得于大德三年詩當作于大德四年而序末仍題己亥必有筆誤曹志堅洞霄宮道士劉授澄虛明教守正真人至元己卯充洞霄宮副職兼杭州路道教提點終任見洞霄圖志則與澄虛三札皆至元廿六年以前書也悅齋知府俟考伯機書法與子昂齊名今觀諸札幾欲駕而上之宜子昂推服不置也

元焦粲雪蓬圖跋

雪蓬圖紙本高八寸六分長四尺四寸八分題曰至
正辛丑冬日焦粲作有焦粲二字白文方印後有淮
海馬振雪蓬詩後序及溪鹵許銅丹邱吳儁高平范
立婁城邾節雪莊張樸始豐山人余銓朱吉長沙蕭
規畊樂子朱煥東吳張節東皋妙聲伯齡龜巢翁謝
應芳陸端木十五家題馬振之印曰伏波世家曰馬
印公振曰遊戲翰墨許銅之印曰樂在其中吳儁之
印曰吳儁之印曰廷彥余銓之印曰桐江釣者曰余
銓之印曰余氏士平日始豐山人耕樂子之印曰聽

雨蓬曰樂琴書以消憂案馬磨字公振太倉人元季避兵于松江城南園池亭樹幽閨自娛屏絕世慮日誦經史楊廉夫深器重之長于歌詩有醉漁草堂二集見顧清松江府志卷三十一吳儁丹邱人元詩選錄其三詩其字廷彥則賴此以考見耳范立字叔中一字中立錢塘人號玉崖生又號玉崖樵者洪武九年有盧兗州挽詩元詩選錄其詩七首余銓安吉人洪武十六年以耆儒徵年踰七十上喜賜坐命爲文華殿大學士翌日賜勅放還見湖州府志其字士平則湖志所未箸也朱吉崑山人字季寧澤民先生子

也洪武中以薦授戶科給事中首疏請寬胡藍黨禁以安反側後以善書改中書舍人出爲湖廣僉事有文學箸有三畏齋稿見萬姓統譜張節上海人明初官禮科給事中見顧清松江府志妙聲字九皋吳縣人元末居景德寺後居常熟慧日寺又主平江北禪寺洪武三年與釋萬金同被召莅天下釋教箸有東臯錄徐伯齡字延之錢唐人博學強記曉洞音律尤工樂府嘗雜集瓷甌數十枚考其音之中度者奏曲一章茶頃而罷箸有蟬精雋見萬厯杭州府志謝應芳字子蘭毘陵人兵亂南遷居吳之葑門轉婁江渡

吳淞寓篠徑年踰八十歸老其鄉之橫山平生博正
好古在鄉常復鄒忠公祠寓吳又請復顧元公祠墓
箸有思賢錄辨惑編龜巢稿見松江顧志邾節許銅
朱煥陸端未張朴蕭規俟攷圖有退密二字朱文長
印子京父印四字朱文方印畢瀧鑑賞四字朱文方
印跋有項墨林甫秘笈之印朱文長印子京父朱文
方印竹癡二字朱文長印畢澗飛藏朱文方印此蓋
前明時經項墨林元汴收藏乾隆中歸于太倉畢澗
飛瀧余于無錫秦澹如都轉家得之

倪雲林水竹居圖跋

雲林水竹居圖紙本水墨山水爲吳郡曹仲和所作也前有沈雄仲篆書水竹居三字後有俞焯記張緯王令顯孔思搆金玫高恒吉顏肅朱炳姚嘏徐衡周凱金貢陸忠賢俞貞木張翼釋宗戒詩莫震跋案仲和名謹又字勉之官訓導元季居平望鎮俞焯字元明號午翁崑山人泰定四年進士官仙居縣丞張緯字德機父監字天民白金壇移居宜興弟經字德常兄弟自相師友文風藹然高士嘗爲緯作荆南精舍圖爲德常作良常草堂圖王令顯字光大宜興人故

宋將家子博學嗜古清閤閣集題贈甚多常延張天民于家爲之買田築室見遂昌雜錄孔思構字基道號肯堂先聖五十四代孫見元詩選周凱字子諒晚以字行廬陵人自號滄洲灌夫有文名洪武二年八月詔修禮書見明史徐一夔傳張翥字翔南先世睦人徙居秀水至正乙巳舉于鄉明初徵入禮局事竣賜白金歸翥博學強記屬文敏捷好爲奇澀語而切于理書宗晉人見秀水志携李詩繫俞貞木初名植以字行更字有立號立菴吳縣人洪武初授樂昌知縣改都昌今蘇州府志有傳金貢字頽伯晚以字行

秀水人邃於經學工書能詩見携李詩繫徐衡字彥
衡嘉興人以文學稱荆南倡和集有詩陸宗賢字承
之嘉興人嘗與吳中陳子微相倡和見甯極齋稿沈
洪字雄仲號東隱吳中富民萬三之後工篆隸行草
高恒吉初名恒以字行吳郡人顏肅字子邕充人釋
宗戒吳之廣福寺僧朱炳姚燾皆古鄆人金玫字德
進號劬生嘉定人元季官長洲縣學訓導洪武初擢
國子助教是卷明天順初尙爲仲和孫顯若所藏至
嘉靖中乃爲雲間何元朗所得有青森閣書畫記朱
文長印乾隆中歸于太倉陸潤之有陸潤之藏朱文

方印後歸于陳良齋司馬德大旋爲沈旭庭布衣易
得余則得之旭庭者也佩文齋書畫譜六研齋三筆
吳越所見詩畫錄王文恪姑蘇志蘇州府雅志石志
皆箸于錄惟雅石二志所載雖祇詩七家而王雨曹
說陳述三詩爲此卷所無殆屢經兵燹有所缺佚歟

唐子華山水卷跋

唐子華山水卷紙本爲邵孜作款題至正九年後有雷杭七絕余鏞篆書七古楷書釋文胡亶七古子華之印曰唐氏子華曰心領神會皆朱文余鏞之印曰尙友齋曰余鏞皆白文雷杭之印曰雷氏彥舟朱文案子華名棣吳興人性善悟章句造次可誦其餘力習繪畫舉筆有師法趙文敏一見奇之仁宗詔繪嘉熙殿御屏揮灑立就天子稱賞詔直集賢院聲聞大震出爲嘉興路照磨除休寧縣尹先是豪民好爲并兼貧民至空產賦往往逋亡棣釐其弊具爲科條擇

任廉吏宿弊一清流逋歸復山民老人擁馬抃謝居
五年政平化行獄訟止息課爲江東最以老去官民
涕泣塑像祀之進奉議大夫吳江知州致仕見吳興
藝文補張羽所撰唐子華墓碣雷杭字彥舟福建建
安人與兄機拱以易鳴于時嘗箸周易註解行世時
稱雷氏易浙江鄉試第一人後官儒學提舉遷潮陽
縣尹以死事贈奉訓大夫奉化州知州見萬姓統譜
邵孜字思善休寧人梅竹山水得唐棣之妙聰敏能
文見休寧縣志子華爲吾鄉先哲元史不爲立傳其
事迹遂不甚顯張靜居所撰墓志僅存于吳興藝文

補世鮮知者此卷子華自題官休寧五載及致仕歸
吳興等語証以墓誌事皆昭合而畫之逸秀渾厚非
明以後所能三家題詩又與子華思善生平皆合非
等敷泛浮辭其爲真迹無疑子華畫傳世絕少誠梓
鄉之墨寶也向爲秦澹如都轉所藏宗湘文太守介
紹歸穰梨館

[illegible]

跋潘元諒摹刻淳化閣帖

右淳化閣帖十卷卷一漢章帝書下摹刻賈似道悅生胡盧陽文印卷十末耳字下摹刻似道封字陽文方印後又摹齊周密印章五字陽文印此明人重摹宋拓並摹藏印非宋刻之証也卷一卷十有翁覃溪硃筆題字未能定爲何刻愚參攷羣書定爲明潘元諒刻本請列二証以明之顧汝和撰法帖釋文攷異備列華叔陽文文水潘元諒及所藏宋拓四本錠紋補痕與泉州本缺文同異帖內錠紋補痕與所稱潘本悉合其証一也王簫林閣帖考正引珊瑚網潘顧

二本皆以賈似道所藏重摹而潘本瘦顧本肥今帖模刻似道兩印其証二也潘氏所刻銀錠紋補痕必鈎勒其形後人以墨填之遂在若隱若顯之間耳明人重摹閣帖以肅府潘元諒顧從義爲最善潘本顧本亡于明季肅府雖存殘缺已甚此雖明刻當作宋拓觀可也先爲川沙沈韻初同年所藏有韻初鑒藏各印今歸李菰耘戶部因題其後

溫圓嶠家書跋

右明大學士烏程溫圓嶠體仁家書六通南海周君芸齋之所收也四致其弟仲容一致其弟一官其一亦致其弟札首斷爛其名已缺圓嶠相思宗最久當國勢阽危之日不能有所匡濟惟務逢君固位嫉賢忌能律以以道事君不可則止之義列之奸臣百喙何辭惟圓嶠操守尙嚴持躬尙謹既不若嚴嵩之招權納賄亦不若馮銓魏藻德之媚璫無恥卽崇禎五十餘相中勝于圓嶠者惟文竺塢范吳橋孫高陽數公餘皆仲伯之間圓嶠獨被惡名殆有幸不幸耶六

札一言買蓮花莊事一以宣德銅鑪贈弟一爲其叔
作墓誌一言水賊一言時事一得庶常後勉勵其弟
並無齷齪不可見人之言宜乎芸齋之清閑不忍棄
置也吾鄉風俗鄙陋士不尙志惡直醜正習爲當然
圓嶠囿于鄉俗不能自拔豈知誅心論定終爲下流
之歸可不懼哉我願後之學者出處進退必權乎道
勿以玉碎爲戚勿以瓦全爲榮則烏程百世之恥庶
乎其可雪也時光緒乙酉冬十月跋

吳北海遺札跋

吳北海三札南潯周君芸齋之所藏也案北海名夢
暘字允兆歸安人明季布衣高節尙義有經世之略
嘗挾策走燕趙不得志歸而以詩自娛新安閔景賢
輯明布衣詩推爲中興之冠嘗與程孟陽集汪景純
家聽歌限韵爲數絕句互相激賞箸有射堂詩鈔北
海集北海不以書名今觀三札筆筆皆導源閣帖詞
旣高華語尤曠達有晉人風旨洵可貴也時光緒乙
酉冬十月識于雙樅廬

傳廟堂題跋卷五

三

陳老蓮祖師待詔圖跋

右祖師待詔圖款題庚辰春仲客燕京臨丁南羽祖師待詔圖老蓮洪綬下有綬字朱文方印章侯二字白文方印絹本白描案孟遠老蓮傳云累試不第挾策入國學試輒高等一時公卿識面爲榮然所重者書畫耳洪綬慨然賦歸甲申之難作棲遲吳越周櫟園讀畫錄云家大人官暨陽時得交章侯以筆墨定交辛巳余謁選再見于都門又云宗禎間召入爲舍人則庚辰辛巳之交老蓮固在京師也題云客燕京與老蓮事迹合其爲真迹無疑老蓮喜畫圖像嘗畫

楚辭像刻于山陰又書水滸牌行世又臨厯代帝王像晚年又畫博古牌皆爲世所重祖師待詔亦道家不經之談楚辭水滸之流也老蓮卒于順治九年壬辰年五十四則此卷乃四十四歲作也

儀顧堂題跋卷十六

歸安陸心源剛甫撰

唐獻陵造像碑跋

碑爲守陵中郎將齊士員立額題太武皇帝穆皇后
供養石像之碑文字完好先序後銘銘後書右監門
中郎將右勳衛郎將檢校左右領府郎將長樂宮大
監定州刺史上柱國延陵縣開國子齊士員備載曾
祖父妻息官諱又曰開皇之歲宿衛宮闈則士員舊
事隋氏者也義旗之始授正議大夫左一軍領又云
大武皇帝升遐奉敕於獻陵供奉生死不離云云後

題貞觀十三年歲次己亥正月乙巳朔一日又有王
保府折衝都尉趙伽等及三原縣令檢校陵署令崔
醫王并二陵宿衛人呂村任村等宿老姓名攷唐會
要載貞觀十三年正月一日太宗朝于獻陵禮畢入
寢宮閱視先朝服御之物悲動左右冊府元龜卷八
十貞觀十三年正月乙巳誤作己巳帝朝于獻陵宿衛陵
邑中郎將齊士員及三原令已下各賜爵一級是立
碑之己亥正月朔正太宗朝陵之日文不及朝陵事
或先已刊成耳趙伽等無考惟三原令崔醫王當時
亦賜爵一級者非此碑則不能舉其姓氏矣冊府七

又載貞觀十六年十二月令左監門中郎將齊士員
將兵衛獻陵帝召士員至望見而降殿自悲咽不已
謂從官曰頃備新衣珍饌欲以正旦奉荐園陵朕若
親行便勞扈從不欲勞人乃自抑止因命江夏王道
宗代行所獻之物帝並跪授道宗焉

角	二	三	四	五	六	七	八	九	十	十一	十二	十三	十四	十五	十六	十七	十八	十九	二十	二十一	二十二	二十三	二十四	二十五	二十六	二十七	二十八	二十九	三十	三十一	三十二	三十三	三十四	三十五	三十六	三十七	三十八	三十九	四十	四十一	四十二	四十三	四十四	四十五	四十六	四十七	四十八	四十九	五十	五十一	五十二	五十三	五十四	五十五	五十六	五十七	五十八	五十九	六十	六十一	六十二	六十三	六十四	六十五	六十六	六十七	六十八	六十九	七十	七十一	七十二	七十三	七十四	七十五	七十六	七十七	七十八	七十九	八十	八十一	八十二	八十三	八十四	八十五	八十六	八十七	八十八	八十九	九十	九十一	九十二	九十三	九十四	九十五	九十六	九十七	九十八	九十九	一百
---	---	---	---	---	---	---	---	---	---	----	----	----	----	----	----	----	----	----	----	-----	-----	-----	-----	-----	-----	-----	-----	-----	----	-----	-----	-----	-----	-----	-----	-----	-----	-----	----	-----	-----	-----	-----	-----	-----	-----	-----	-----	----	-----	-----	-----	-----	-----	-----	-----	-----	-----	----	-----	-----	-----	-----	-----	-----	-----	-----	-----	----	-----	-----	-----	-----	-----	-----	-----	-----	-----	----	-----	-----	-----	-----	-----	-----	-----	-----	-----	----	-----	-----	-----	-----	-----	-----	-----	-----	-----	----

唐相州鄴縣天城山修文寺碑跋

碑在鄴縣立于開元三年三月張佑仁撰文八分書
結銜書前太子較書直崇文館兼左衛率府兵曹參
軍敦煌張佑仁撰直字上畫泐似金字館兼二字僅
存彷彿敦字尚可辨煌字則意索而得之唐書崇文
館校書郎二人從九品太子率府其屬兵曹參軍從
八品下皆東宮官屬安陽金石錄卷十三箸于錄誤
題前太子較書金崇文兼左衛率府兵曹參軍張伯
仁分一人而二人想由拓手不精考之未審耳

符載亡妻李氏墓志銘跋

碑首題亡妻李氏墓志銘孤子符載述文有鄙人編
次陰有輔助云云又全唐文符載有祭亡妻李氏文
則李氏載之妻也李氏以貞元十三年卒權窆於潯
陽德化鄉至元和七年載丁父艱歸葬鳳翔始以夫
人祔于先墓故曰因得啟發祔于皇先姑之側謂從
載母葬也載志墓時正居父喪故題曰孤子蓋祔于
舅姑宜統于所尊耳宏農楊夫人者當爲載之後妻
自李之卒至是凡十六年矣汪硯山謂載謂父曰鄙
人爲悖謬非也

唐大理卿崔公故夫人滎陽縣君鄭氏墓志銘跋

誌馬懷素撰崔公不署名攷之乃崔元暉之弟昇也

舊唐書

作昇元暉傳昇司刑少卿世系表昇字立樂刑部

侍郎子璘馮翊太守兼採訪使璘子璉不著官爵據

碑云長子司農丞璘次子華州參軍璉則璘璉爲兄

弟世系表誤下一格以璉爲璘子也夫人曾祖子仁

齊通直郎祖植司勳左司郎中長安令將作少匠檢

校太常少卿父行寶詹府司直司勳員外郎植與行

寶見郎官石柱題名植司勳郎中行寶題名作行寶

司勳員外郎當以碑爲正餘所歷之官皆可補史之

闕史稱元暉與昇尤友愛怡怡如也元暉之母氏盧見本傳碑云與長姒盧夫人深相友敬卽元暉妻蓋與其姑並盧出也夫人之亡以長安三年正昇爲司刑少卿日其助宗璟劾張昌宗事在四年唐志光宅元年改大理爲司刑神龍元年復舊稱誌作于開元五年云夫以義口家室想琴室而增懷則其時昇猶在也其由少卿躋正亦當在斯時表稱刑部侍郎則開元五年後所歷官

唐金滿州都督賀蘭軍大使沙陁公夫人金城郡君

阿史那氏墓誌跋

碑云夫人姓阿史那氏繼往絕可汗步眞之曾孫竭忠事主可漢驃騎大將軍斛瑟羅之孫十姓可汗右威衛大將軍懷道之長女也按史西突厥傳貞觀中遣使立阿史那彌射爲可汗族兄步眞謀奪其位衆不厭去之步眞與族人來朝拜左屯衛大將軍後平賀魯以步眞爲繼往絕可汗濛池都護乾封中步眞死擢其子步利設斛瑟羅爲右玉鈐衛將軍武后更號斛瑟羅爲竭忠事主可汗聖歷二年舉其部六七

萬內遷死于長安擢其子懷道爲右武衛大將軍長安四年以懷道爲十姓可汗兼濛池都護與碑悉合金滿州者永徽四年卽處月置史稱龍朔初授處月酋沙陀金山墨離軍討擊使長安二年進金滿州都督累封張掖郡公金山死子輔國嗣先天初避吐蕃徙部北庭率其下入朝開元二年復領金滿州都督封其母鄯國夫人後累爵永壽郡王是沙陀公者碑雖不著名其爲輔國無疑也夫人卒于開元七年年二十五上朔年十七歸于沙陀氏正先天初輔國入朝時夫人爲懷道長女史又稱突厥施別種車鼻施

啜蘇祿開元中來朝帝以阿史那懷道女爲交河公主妻之是懷道女不止金城郡君矣後輔國死子骨咄支嗣骨咄支死子盡忠嗣卽後唐李克用曾祖惟輔國之爲賀蘭軍大使于史無徵

傳 履 堂 是 足 卷 一 上

二

唐故三十姓可汗貴女賢力毗伽公主雲中郡夫人

阿史那氏墓志銘跋

碑首書駙馬都尉故特進兼左衛大將軍雲中郡開國公踏沒施達千阿史德覓覓達千者虜世官阿史德虜姓突厥如善可汗之裔歸唐者有司賓卿阿史德元琬右武衛大將軍阿史德多覽之襄都督阿史德樞賓覓覓亦其後曰天上得果報男曰聖天皆虜自稱語據史則骨咄祿死子幼不得立其弟默啜自立爲可汗今牽連書骨咄祿默啜可汗不可解及考通鑑開元二年夏四月突厥可汗默啜復遣使求昏

自稱乾和永清大駙馬天上得果報天男突厥聖天
骨咄祿可汗是默啜之稱謂與此碑悉合曰家國喪
亂藩落分崩委命南奔歸誠北闕史載默啜討九姓
拔野古拔野古大敗默啜不爲備道大林中殘衆突
出擊斬默啜傳首京師事在開元四年又默啜死骨
咄祿子闕特勒合故部攻殺默啜之子小可汗又先
是默啜屢擊葛邏祿等詔所在都護摠管犄角應援
虜勢浸削其壻高麗莫離支高文簡與跌跌都督思
太等合萬餘帳款邊詔納之河南引拜文簡左衛大
將軍遼西郡王然曰家聲犯法身入宮闈所指家聲

當非文簡予以爲公主入漢封雲中郡夫人覓覓封
雲中郡開國公是犯法者卽指覓覓曰故特進則知
覓覓已先死矣曰住天恩載被禮秦晉於家兄家兄
卽三十姓天上得毗伽然可汗也住當爲徃字之誤
按史默啜死骨咄祿子闕特勒立其兄默棘連是爲
毗伽可汗然者虜典兵之職有左殺右殺史稱毗伽
本謂小然故曰毗伽然史又載默棘連盡有默啜餘
衆因乞和請父事天子許之又遣使獻方物求婚乃
遣鴻臚卿袁振往諭意默棘連曰二蕃皆賜姓而得
尚主且公主亦非帝女我不敢有所擇但屢請不得

爲諸國笑振許爲請或朝廷因之許以公主下嫁如
交河公主故事未可知也曰因承獻澤特許歸親兄
右賢王默特勒私第特勒當作特勒史載可汗之子
弟謂之特勒然如契苾明碑柳公權神策軍碑皆以
勤爲勒蓋書者之誤墨特勒者默噉子也史載下詔
伐默棘連以契丹都督李失活及突厥默噉子左賢
王墨特勒左威衛將軍右賢王阿史那毗伽特勒燕
山郡王火拔石失畢等蕃漢凡三十萬以朔方道大
摠管王晙統之事在開元七年是墨特勒之爲默噉
子史有明徵特碑稱右賢王史爲左之不同耳公主

薨于開元十一年六月其年十月癸巳朔以通鑑目錄放之合男曰懷恩當爲覓覓子蓋公主初嫁于阿史德覓覓覓犯法死公主沒掖廷後許歸墨特勒私第將改適毗伽煞未嫁而薨故誌文題覓覓銜從前夫黃本驥跋是碑疑子懷恩卽僕固懷恩固非若王言萃編補略則滿紙悠謬更無一是矣

SOUTH AFRICAN NATIONAL BUREAU OF STATISTICS	
REPUBLIC OF SOUTH AFRICA	
STATISTICAL YEARBOOK	
1997	
1	
2	
3	
4	
5	
6	
7	
8	
9	
10	
11	
12	
13	
14	
15	
16	
17	
18	
19	
20	
21	
22	
23	
24	
25	
26	
27	
28	
29	
30	
31	
32	
33	
34	
35	
36	
37	
38	
39	
40	
41	
42	
43	
44	
45	
46	
47	
48	
49	
50	
51	
52	
53	
54	
55	
56	
57	
58	
59	
60	
61	
62	
63	
64	
65	
66	
67	
68	
69	
70	
71	
72	
73	
74	
75	
76	
77	
78	
79	
80	
81	
82	
83	
84	
85	
86	
87	
88	
89	
90	
91	
92	
93	
94	
95	
96	
97	
98	
99	
100	

滎陽縣令王泉移碑記跋

此蓋滎陽縣令盧正道清德碑側攷寶刻叢編清德碑神龍三年劉穆之撰故是碑云勒書爲碑舍人劉公作後題貞元十八年二月十日滎陽縣令王泉記元字殘泐初疑貞觀反覆審之以元爲近蓋天寶時盧重華移于道周而貞元時兩頻壞道又爲雷仆故王泉復移于縣門因刻是記全唐文所收盧府君碑陰記卽此闕字甚多且以天寶八載十一月十八日縣尉盧重華自廢寺移于道周以全故也廿六字置於文首今閱石刻則此廿六字另作大字書於上方

貞觀時有王泉者官內侍省給事有沙門不拜俗文
見宏明集與此王泉當別一人趙搗叔錄作縣尉盧
重華移石記者誤謂在裴琳德政記後者疑亦非

臨淮王李光弼碑跋

光弼之母史以爲李碑以爲武王述庵司寇執碑而議史之誤非也攷唐書契丹傳武懿宗婁師德等爲大總管擊契丹大敗之降別將李楷固駱務整久視元年詔左玉鈴衛大將軍李楷固右武威衛將軍駱務整討契丹克之獻俘含樞殿后大悅二人者本李盡忠部將數挫王師後降有司請論如法仁傑稱其驍勇可任若貸死可以責功至是凱旋后舉酒屬仁傑賞其知人授楷固左玉鈴衛大將軍燕國公賜姓武務

整右武威衛將軍是楷固本姓李賜姓武史有明徵

碑中爲國飛將一語亦暗使李廣事

萃編及文集皆誤作大將魯

公書其賜氏豈亦以同姓爲嫌耶然光弼楷固之先

皆以夷族賜國姓正不必斷斷以吳孟子爲譏碑凡

三千七十餘字金石萃編所收不及半此本磨泐者

才三百字洵足寶貴惜爲潢工翦棄者二字

思明奔北于百

里之外落奔字都知河南云云落河字

其可訂今本魯公集之譌者得

二十餘條具別紙

臨淮王李光弼碑第二跋

此碑足訂魯公文集之譌者如題額都督河南云云碑作都知山南東道五節度碑作山南東五道節度保父王室翼戴三聖碑作以翼戴三聖多以字與上以左右宣王文義相應公卽荊國公之第四子碑無國字與下擇荊公配焉文義同社稷威寶碑作盛寶爲國大將碑作飛將嘗撫鹿而遊碑作撫塵撫塵而游語出東方朔與公孫宏書雖已官達碑作宦達擒其心腹碑作心手魯公撰其曾祖勤禮神道碑述杲卿亦有開土門擒其心手何千年高邈之語又杲卿

習用語至德二載碑作二年秉燭徐行一夜方達碑作乙夜一身必以死國家之患碑無必字國家上尙有一字已泐似衛字言一身以死衛國家之患文義方足其年改元上元冬十一月碑作十二月肅宗不能違之碑作肅宗難違之二月拜開府儀同碑作三月賜鐵券賜下尙有一字已泐似公字疾病增劇碑作利疾追贈太保十一月下闕二字碑作十二月闕字似景戌二字次曰太府少卿太僕卿象碑於少卿下尙有一字似兼字王國多難碑作主蒙多難主上

尙有三字或原空思明挫銳于恆之祿山絕望於江
淮碑作使思明羅跪挫銳于恆之祿山側息絕望于
江淮保河陽而雲梯罔冀碑作雲梯四翼次曰光顏
碑作光彥皆以將略碑作皆有材略凌霄翼聖集於
凌上闕二字碑當翦斷處闕與否不可知玩上下文
似無關且凌霄地名非頌聖語亦不必空格惟翼下
聖上碑原空三字賀拔行臺與兄雍州碑作荊州風
樹寂寞碑作寂寥經營朔方碑作冀方壇山路旁碑
作檀山魯公文集至宋無傳嘉祐中宋次道撫采金
石編爲十五卷是碑在宋初必尙完善次道所見與

今本不應有異想當時之傳抄後世之摹版轉輾承
謫遂致參差耳

臨淮王李光弼碑第三跋

唐書宰相世系表柳城李氏有二一爲光弼一爲寶臣述庵司寇跋此碑誤見其後而遺其前云令節重英楷洛皆不在表內非也跋又云賊將周智傳作周摯今此碑明箸周贊非周智皆爲疏舛至李光進之爲渭北節度傳雖不箸而回紇傳云郭子儀率麾下叩回紇營時李光進路嗣恭介馬在側子儀示酋長曰此渭北節度使某朔方軍糧使某是光進之爲渭北節度正子儀單騎見虜時也又契丹傳延和元年以左羽林大將軍孫佺左驍衛將軍李楷洛左威衛

將軍周以悌帥兵擊奚楷洛與奚酋李大酺戰不利
仝懼歛軍詐大酺曰我奉詔來撫慰而楷洛違節度
方戮以徇出軍中繒帛與之大酺謝請仝還師舉軍
得脫爭先無部伍大酺兵躡之遂大敗仝以悌皆爲
虜禽送默啜害之朝廷方多故不暇討云云亦見孫
處約傳此楷洛事蹟見于史者李肇國史補載德宗
常命楊崖州打李楷洛碑釘壁以玩又光弼之兄世
系表作遵宜此碑作遵直足以正史之誤

富義監使扶風公造彌陀殿記跋

右碑十八行行二十九字不著書撰人名氏各家皆

未著錄中有大蜀云云末有時武

下缺

戊辰四月辛丑

朔以通鑑目錄考之戊辰爲唐亡之次歲前蜀王建

始建號武成之元年其年四月辛丑朔與碑合富義

屬劍南道瀘州五代史乾甯三年建遣王宗侃等取

渝瀘州殺瀘州刺史馬敬儒至此凡十四年文有兩

紀臨而恩威並布語則扶風公者亦唐臣而降蜀者

耶杜光庭燭陽洞記乾德三年并監使保義軍使太

保馬全章開陵州燭陽洞

十國春秋作馬全義

陵與瀘爲鄰郡

唐書食貨志謂劍南東川渝瀘資榮陵簡等州有井
四百六十文獻通攷蜀鹽有富順之井監西和州之
鹽官長甯之清井皆大井也則井監使者當卽富義
監使然則扶風公疑卽馬全章也

徹札者凡二千人署曰平射營攷侯仲莊傳謂僕固懷恩以朔方反仲莊爲都將訓兵自守號爲平射人畏其鋒或維岳亦預其事曰懷恩之遁封漢東郡王攷子儀傳懷恩子瑒屯榆次爲帳下張維岳所殺傳首京師撫其衆歸子儀而懷恩傳則謂斬瑒者爲焦暉白玉疑焦暉白玉爲偏將亦統于維岳者及考溫公通鑑載僕固瑒發祁縣兵士卒未食行不能前至榆次瑒責其遲士皆怨其夕十將焦暉白玉帥衆攻瑒殺之懷恩渡河北走都虞候張維嶽在沁州聞懷恩去乘傳至汾州撫定其衆殺焦暉白玉而竊其功

以告郭子儀子儀使牙官盧諒至汾維嶽賂諒使實
其言子儀奏維嶽殺瑒後子儀知盧諒之詐杖殺之
故碑諱其事亦見邵說之文於是非尙不刺謬也維岳
本無赫赫大功初則竊人之功以成名而官至大將
軍封文安王亦幸矣哉子益王府長史曼左監門衛
率府錄事參軍杲太子司議郎晟崇文生曩及母弟
有志皆不著於史

[illegible]

王美暢夫人長孫氏墓誌銘跋

碑首行題口口汧口口王美暢夫人長孫氏墓誌
銘美暢唐書無傳新表烏丸王氏鄭州刺史思泰子
美暢字通理司封郎中薛公寶刻叢編引集古錄目
益州都督王美暢碑薛稷撰美暢太原祁人官至潤
州刺史女爲睿宗德妃景雲中追贈都督至石刻口
峯塔院記謂官水部員外主爵郎中陳鄂饒潤四州
刺史然則碑首缺字當爲潤州刺史無疑誌作于長
安中時女未爲睿宗妃故無一語及之夫人曾祖敞
隨金紫光祿大夫宗正卿平原郡開國公元和姓纂

後周絳州刺史兕生熾晟做義莊做宗正少卿汴州
總管生无庸右監門將軍唐書世系表做平原安男
誌又云祖義常唐通議大夫華容郡公父朝散大夫
懷州河內令瀛州司馬不署名義常卽无庸義父常
庸形聲之譌姓纂傳寫誤也當以碑爲正誌但云子
昕等攷之世系表昕居長司農卿薛公有弟五人警
翼弼玢輝碑皆從略長安志七汝州刺史王昕宅昕
薛王業之舅文獻通考王德妃生惠宣太子業故昕
爲業舅也

唐龍花寺臨壇大德韋和尚墓志銘跋

大德姓韋氏京兆杜陵人杜陵漢縣在萬年縣東十五里和尚萬年人也曰元和歲戊戌四月庚辰滅化以七月乙酉遷神于萬年洪固鄉畢原戊戌元和之十三年其年四月爲甲寅朔庚辰乃二十六日七月癸未朔乙酉乃三日也皆與通鑑目錄合畢原在縣西南二十八里成王葬周公於畢是其地曰曾王父諱安石大父諱斌唐書皆有傳官位均與碑合曰烈考諱衮皇司門郎中眉州刺史宰相世系表衮駕部員外郎不言其爲郎中與刺史當以碑爲正衮子有

同懿同休同憲卽和尚之諸弟碑所云指北原而告之者元和戊戌年六十六上朔天寶十二載癸巳爲和尚始生之年曰年十九得請而剝落正大厯六年辛亥碑所稱大厯六年制隸龍化寺卽爲此年事撰文者爲從父弟鄉貢進士同翊宰相世系表斌子衮逢逢生同翊字啟之卽其人

平□□□軍兵造彌勒像設平□齋記跋

此碑摩厓字左行後有劍南東川節度左押衙討除
榮瀘等州□賊都知兵馬使云云李栖元銜名又有
節度判官等王處恭彭泰元伯良三人署銜碑有云
相國摠缺五字集甲兵上將李栖元署都知兵馬使考
唐會昌五年杜棕罷相以尙書左僕射出爲劍南東
川節度此所云相國杜棕也又云將軍有良佐軍淬
太原公卽碑後署名之王處恭也李栖元等四人皆
不見於史榮瀘逼處夷獠是時有黎宜滿等作亂栖
元討平之軍士造像以紀功績撰文者爲鄉貢進士

文口名已泐獨異武宗于會昌六年三月崩宣宗立
明年丁卯改元大中碑書會昌七載丁卯歲二月十
日卽大中元年也

會昌

當是時兩川無事綜以宰

相爲節度栖元等亦非鄉壁小民不應新君踰年改
元猶不知大中之號況其時方毀天下佛寺復僧尼
爲民而猶刻造佛像唐之號令不行於斯可見碑首
題平□□軍兵造彌勒像設平□齋記平下三字
甚泐彷彿茂承濠三字然無佐證太平寰宇記戎州
東界瀘州北界榮州其土有四族黎蒯虞牟夷夏雜

居蠻獠之類不識文字是黎宜滿者當卽四族之一
碑又云口兵于應靈應靈縣名本曰大牢天寶元年
改今名屬榮州碑在四川劉燕庭金石苑未收

[illegible]

蜀先主廟記并碑陰跋

蜀先主廟記乾甯四年九月郭筠撰述涿州刺史婁居口修廟之文居口名缺一字按亭林金石文字記云其首行曰婁居道重修則缺者乃道字順天新志作乾符四年蓋沿孫氏寔宇訪碑錄之誤碑陰攝涿州刺史劉守文立石卽新修順天志所稱常尙貞修廟記爲光化元年十二月卽乾甯四載之明年也記有云太保彭城王者劉仁恭也時爲幽州節度刊碑陰之劉守文者其次子婁居口於史無徵碑陰云公本姓常名尙貞是尙貞卽居道也乾甯四年正月自

武州擢涿州因薦冀而修廟至秋命郭筠撰此記無
何解去守文攝刺史次年改元光化遂再刻於碑陰
順天新志分而二之恐非也五代史劉守光傳仁恭
叛克用光化元年遣其子守文襲滄州逐節度使盧
彥威遂取滄景德三州請命于昭宗欲以守文爲橫
海軍節度卽是年事至昭宗遲回未許仁恭復以嫚
詞邀之卒允其請當爲光化二年事故署銜無橫海
節度之稱且碑陰記亦祇述婁修廟事無一語及守
文可知守文非撰文者先舉官之最尊者署銜于石
之前唐碑往往有此故曰立記下有盧龍節度□□

官數字乃撰文者署名處泐不可辨

[illegible]

梁新修南溪池亭及九龍廟等記跋

右碑立于後梁貞明三年撰文者陳留蔡曙銜署同
禧觀察判官碑有云按梁載言十道誌云馮翊縣東

南

缺一字

里有泉九穴同流卽此處也攷之太平寰宇

記馮翊縣九龍泉在縣東南八里有九穴同爲一注
因名九龍今謂鵝鴨池據此則碑所缺者乃八字也
又云咸通中太守王龜爲理之暇葺亭而名之龜字
大年唐書附王播傳咸通中知制誥改太常少卿同
州刺史與碑合又云庚子歲大寇犯關遂至燼滅庚
子爲廣明元年是歲黃巢陷潼關厥後連擾關中同

州之陷在中和壬寅舉庚子以例之也又云乾甯歲連帥公瑋再營斯構連帥下缺一字以碑中王公始作而未究其妙李公繼踵而罔盡其工核之則知所缺者爲李字李瑋史無傳附見於薛五代史李罕之傳始爲罕之部曲唐書朱宣傳乾甯三年克用使其將李瑋以兵屯莘援宣爲羅宏信所破後唐本紀載天復元年汾州刺史李瑋據城叛以連汴人武皇令李嗣昭李存審討之嗣昭攻城三日而拔擒瑋斬于晉陽市嗣昭傳略同蓋卽其人也冊府元龜乾甯四年以韓建兼輔國軍節度初李瑋領同州瑋茂貞養

子帝將討之塘逃鳳翔至是命建兼之是塘常領同
州故曰連帥又云我太傅武昌程公即前署銜之程
暉也攷朱友謙傳貞明六年友謙遣其子令德襲同
州逐節度使程全暉歐史本紀書友謙襲同州殺全
暉薛史則謂全暉單騎奔京師碑作于貞明三年正
全暉爲節度之日文中又有都指揮使劉敬德左靜
安指揮使丁約都押衙員建皆節度屬官未有所考

[illegible]

顯陵司部蜀國夫人建尊勝幢記跋

是記爲顯陵守當使侯殷述訪碑孫趙兩錄皆不著于錄其云顯陵司部蜀國夫人崔氏則晉高祖宮人也五代會要高祖內職祇載潁川郡夫人蔡氏新舊兩史皆不詳五代時之內職有司簿碑作司部通假字也崔氏可補史之闕幢建於周廣順三年癸丑四月辛亥朔二十一日庚口以通鑑目錄攷之是年四月當爲庚戌朔今云辛亥不合然二十一日爲庚則月朔當爲庚戌無疑云辛亥乃書碑者誤也是時距晉亡七載距顯陵之葬亦祇十年時雖未久事厯三

朝故有頻更興廢愴惻徒增之語而顯陵守當使之
官未替見五代時于易代之際優待前朝非後世之
比薛史周本紀廣順元年四月壬寅詔莊宗明宗晉
高祖三處陵寢各有守陵宮人並放逐便如願在陵
所者依舊供給是崔氏者蓋守陵宮人也

故鳳翔節度使秦王贈尚書令李公楚國夫人朱氏
墓誌跋

朱氏碑稱友謙之女秦王尚書令李公不著名蓋李
從曦妻也碑于友謙字空二字考諸史乃字德光初
爲陝州節度後徙鎮河中故碑曰初留司于陝服後
節制于蒲津友珪弑太祖友謙附於李克用友珪使
康懷英等擊之友謙與李克用出澤潞大敗之故曰
季弟臨朝嗣君失德果因協比之謀克就中興之業
云云皆與史合友謙妻張氏見五代史本傳惟燕國
之封不著從曦茂貞之子善書畫莊宗拜鳳翔節度

歷鎮宣武天平廢帝立復以爲鳳翔節度卒年四十
九秦王尙書令新五代史無文舊史稱莊宗時入朝
兼中書令晉本紀天福三年進封鳳翔節度使李從
曦爲秦王夫人卒于漢乾祐二年年五十一時從曦
已亡未久故碑有偕老莫諧又未畢三年之制已縈
二豎之災等語又云兼以盜據城池公行剽掠因茲
駭愕遂至彌留考之史乾祐元年河中李守貞永興
趙思綰鳳翔王景崇相次反王景崇傳稱景崇爲鳳
翔巡檢隱帝立諷鳳翔將吏求已領府事朝廷拜景
崇邠州留後以趙暉爲鳳翔節度景崇乃叛與趙思

縮其推李守貞爲秦王帝卽以趙暉討之明年景崇
自焚死卽其事也然則景崇者從曦之舊部以從曦
卒求節鉞不得乃復假秦王號以推守貞賴此誌可
得當時情事而夫人之亡適際其叛亂時也有子十
三人惟永吉見于舊史從曦傳云歷數鎮行軍司馬
碑以爲第二子也堦五人撰文之許九言居其次又
有蘭陵蕭渥供奉官趙延祚鄜州節院使焦守珪皆
未有攷惟左龍武統軍趙匡贊爲趙延壽之子歷漢
周兩朝累授節鎮及統軍使後入宋歷鎮廬延邠鄜
四州見五代薛史

[illegible]

儀顧堂續跋序



歲在壬午攝提格予成題跋十
六卷郵寄京師就正於潘文勤
文勤既為之序復書謂昔年
來未有此作隱然以黃伯思洪
景廬相推許予謝不敢承明年

三月張勳果專疏特薦蒙

恩內召余深惟吉人難進易退之義又

以一行作吏此事且廢樓息山

園未即壯土端居多暇專志丹

鉛今夏又成題跋古史題曰儀

顧堂續跋昔客齋隨筆有儀

三四五之作錢竹汀武憲谷洪筠
軒之於金名有續跋及再三續
余不敢於諸公無能為役而七錄
之學夙所究心儻天假之年人
事無擾三四之續或庶幾焉惜
文勤已歸道山不能相与析疑

耳執筆書此良用懣然
光緒紀元之十年歲在元默執
徐辜月歸安陸心源自叙



儀顧堂續跋目錄

卷之一

宋槧婺州九經跋

明鈔紫巖易傳跋

元槧周易程朱傳義附錄跋

覆宋咸淳本朱子周易本義跋

影宋鈔周易經傳集解跋

明覆宋本誠齋易傳跋

元槧易圖纂要跋

元槧周易集說跋

易原奧義周易原旨跋

影宋鈔周易集傳跋

周易爻變義蘊跋

元槧書集傳纂疏跋

元槧尚書輯錄纂注跋

影宋尚書詳解跋

舊鈔詩總聞跋

宋槧詩集傳跋

明覆宋呂東萊讀詩記跋

萬曆本呂氏家塾讀詩記跋

卷之二

元槧詩傳通釋跋

明初本詩集傳音釋跋

宋槧蜀大字本周禮跋

宋槧續儀禮經傳通解跋

宋槧巾箱本周禮跋

宋槧纂圖互注周禮跋

舊鈔周禮詳解跋

元槧儀禮集說跋

春秋集傳微旨跋

明覆宋本春秋集傳纂例跋

大典本春秋會義跋

影宋本孫龍學春秋經解跋

影宋春秋尊王發微跋

春秋五禮例宗跋

春秋通訓跋

春秋左氏傳續說跋

春秋類編跋

大典本崔子方春秋經解跋

春秋讞跋

卷之三

影元本春秋比事跋

其二

春秋集傳跋

春秋講義跋

春秋集義跋

春秋說跋

影宋抄春秋分紀跋

明抄春秋纂言跋

足本春秋讞議跋

春秋魯十二公年譜跋

元槧春秋諸傳會通跋

元槧春秋屬辭跋

元槧春秋左氏傳補注跋

春秋師說跋

蘭雪堂本春秋繁露跋

宋槧纂圖互注禮記跋

卷之四

元槧禮記纂言跋

元覆宋槧本四書跋

北宋槧說文解字跋

北宋本廣韻跋

馮已蒼手抄汗簡跋

元槧廣韻跋

續古千文跋

影宋羣經音辨跋

宋本九經補韻跋

影宋鈔方言跋

影元鈔平水韻略跋

影宋鈔押韻釋疑跋

元槧韻會舉要跋

元槧說文補義跋

元槧六書統跋

陸師道手寫漢隸字源跋

元槧說文字源跋

元槧六書正譌跋

元槧六書統溯源跋

元槧書學正韻跋

卷之五

宋蜀大字殘本漢書跋

宋槧蜀大字後漢書殘本跋

宋刻晉書跋

宋槧宋印建本北史跋

宋槧明修宋書跋

宋槧明修魏書跋

魏書地形志集釋跋

宋槧明修梁書跋

宋槧明修南齊書跋

宋刊明修北齊書跋

宋槧周書跋

宋槧宋印蜀大字本陳書跋

卷之六

重輯舊五代史原稿跋

元槧漢書藝文志攷証跋

元槧宋史跋

元槧遼史跋

明鈔遼史跋

金史施宜生傳跋

宋槧建本通鑑跋

明嘉靖仿宋資治通鑑跋

宋蔡氏家塾槧陸狀元通鑑跋

宋麻沙刻陸狀元通鑑跋

元槧通鑑前編跋

元槧通鑑續編跋

元餘慶堂槧續資治通鑑跋

元餘慶堂槧續資治通鑑后集跋

元與畊堂槧續通鑑跋

元餘慶堂槧宋季三朝政要跋

卷之七

淳熙嚴州本通鑑紀事本末跋

元槧通鑑答問跋

宋淳祐湖州大字本通鑑紀事本末跋

影宋通鑑長編紀事本末跋

宋槧通鑑釋文跋

元槧通鑑地理通釋跋

宋槧東都事略跋

元版通志跋

元槧逸周書跋

元槧吳越春秋跋二

明仿宋汪綱本越絕書跋

雙柏堂仿宋丁黼本越絕書跋

元槧文獻通攷跋

元槧漢制攷跋

影宋本建康實錄跋

宋槧衢州本古史跋

影宋淳熙本太常因革禮跋

舊鈔大唐郊祀錄跋

宋槧陸宣公中書奏議跋

元槧政府奏議跋

卷之八

影宋鈔元和郡縣志跋

宋本毘陵志跋二

馮已蒼校宋本水經注跋

影宋抄輿地紀勝跋

影宋景定建康志跋

元槧至正金陵志跋

類編長安志跋

洪武本蘇州府廬志跋

嘉慶湖南通志跋

阮修廣東通志跋

嘉慶廣西通志跋

新福建通志康執權傳跋

兩浙金石志跋

同治烏程縣志跋

其二

卷之九

明刊子彙跋

宋槧纂圖互注荀子跋

宋槧纂圖互注揚子法言跋

奎書跋

元槧傳道四子書跋

宋槧朱子語類跋

元槧黃氏日鈔跋

折獄龜鑑跋

宋槧傷寒總論跋

元槧傷寒百証歌發微論跋

宋槧大觀本草跋

北宋槧史載之方跋

宋槧本草衍義跋

腳氣治法總要跋

濟生方跋

元槧濟生拔萃方跋

元刊傷寒直格方跋

元槧御藥院方跋

元槧素問圖解要旨論跋

明仿北宋本太元經跋

影宋易通變跋

卷之十

元槧晏子跋

元槧呂氏春秋跋

元槧大字白虎通跋

明仿宋槧東觀餘論跋

朱竹垞手鈔賓退錄跋

宋槧夢溪筆談跋

元刊冷齋夜話跋

會通館本容齋五筆跋

履齋示兒編跋

攷古質疑跋

密齋筆記跋

元槧困學紀聞跋

隱居通議跋

秦西岩影宋寶慶本類說跋

傳錄宋麻沙本類說跋

影宋酒經跋

元槧考古圖跋

續考古圖跋

元槧宣和博古圖跋

元槧藝文類聚跋

宋槧白孔六帖跋

卷十一

明鈔職官分紀跋

舊鈔職官分紀跋

元槧山堂攷索跋

宋槧書判清明集跋

歷代制度詳說跋

名賢氏族言行類稿跋

元刊元印玉海跋

元槧元印小學紺珠跋

元槧元印姓氏急就篇跋

宋槧啟劄截江網跋

宋槧詩律武庫跋

永樂槧事林廣記跋

元槧氏族大全跋

書癸辛雜識後

宋槧夷堅志跋

宋槧釋氏通鑑跋

宋槧纂圖互注老子道德經跋

元槧道德經集解跋

老子口義跋

列子口義跋

宋槧南華真經跋

元槧易外別傳跋

舊鈔抱朴子跋

卷十二

南宋書棚本江文通集跋

張青芝手鈔陶隱居集跋

元槧李太白詩註跋

咸淳本李翰林集跋

元槧黃鶴註杜詩跋

宋槧九家註杜詩殘本跋

元槩陸宣公集跋

宋槧宋印韓昌黎集跋

宋麻沙槧柳集跋

宋麻沙槧韓文放異跋

舊鈔沈亞賢集跋

影宋孟東野集跋

新刊李衛公集跋

宋槧浣花集跋

高麗刊桂苑筆耕跋

宋嘉定永州槧范忠宣集跋

宋麻沙本陳簡齋詩註跋

宋淳祐建州槧朱文公集跋

金陵雜詠跋

舊鈔建康集跋

宋槧友林乙稿跋

宋槧劉後村集跋

影鈔陳復齋集跋

影宋鈔永嘉四靈詩跋

山房集跋

宋槧指南錄跋

卷十三

元槧吳禮部集跋

元槧元印清容集跋

宏治本王秋澗全集跋

元槧歸田類藁跋

元槧松鄉集跋

元槧檜亭集跋

元槧松雪齋集跋

元槧趙子昂詩集跋

洪武本九靈山房集跋

元槧陳衆仲集跋

洪武本程雪樓集跋

明景泰本道園學古錄跋

元槧道園遺稿跋

元槧翰林珠玉跋

李雲陽集跋

卞山小隱吟錄跋

元槧閒居叢稿跋

元槧牧潛集跋

元槧丁鶴年集跋

元槧鐵崖古樂府復古詩集跋

叢書堂抄本貞一稿跋

鐵崖文集跋

元張伯顏槧本文選跋

宋蜀大字本三蘇文粹跋

影宋鈔尤本文選攷異跋

成化唐藩本文選跋

卷十四

元槧郭茂倩樂府跋

宋槧宋朝文鑑跋

宋槧唐百家詩選殘本跋

影宋天台集跋

聲畫集跋

嚴陵集跋

宋槧中興羣公吟稿戊集跋

宋槧文章正宗跋

宋麻沙本萬寶詩山跋

元槧唐詩鼓吹跋

元版中州啟劄跋

影元鈔玉山名勝集跋

元槧元文類跋

元槧中州集跋

宋元詩會跋

至正鄱陽本金石例跋

元第三刊金石例跋

許彥周詩話跋

克齋詞跋

卷十五

邊鸞杏花鷓鴣軸跋

米元章字冊跋

郭河陽溪山行旅卷跋

王居正紡車圖跋

蔡忠惠尺牘跋

黃文節書晦堂開堂疏跋

范華原烟嵐秋曉卷跋

小米墨戲卷跋

李龍眠十國朝貢圖卷跋

朱文公顏淵註稿跋

陳居中文姬歸漢圖跋

趙千里春江待渡圖卷跋

劉松年琴鶴圖跋

張樗寮書大方廣佛華嚴經卷七十一跋

王朋梅金明池龍舟圖卷跋

黃文獻袁通甫墓志跋

俞紫芝四體千文跋

卷十六

銷夏錄所載司馬端衡米元暉合卷跋

吳越所見書畫錄所載山莊義訓圖卷跋

銷夏錄所載刁光胤畫冊

沈石田山水卷跋

石濤贈石溪冊跋

楊忠烈家書跋

朱文肅溫寶忠董伯念手札跋

高句麗廣開土大王談德紀勲碑跋

魏劉懿墓志跋

魏滄州刺史王僧墓志跋

魏崔敬邕墓志跋

北齊鄭子尙墓志跋

北齊文宗殘墓志跋

北周賀王公墓志跋

隋李富娘墓志跋

隋蘇慈墓志跋

韋元貞墓安鎮土府碣跋

肅府重刊淳化閣帖跋

[illegible]

儀顧堂續跋卷一

歸安陸心源伯剛父

宋槧婺州九經跋

儀顧堂藏

周易二十一葉尙書二十六葉前有孔安國序毛詩
四十七葉周禮五十五葉孝經三葉前有唐明皇序
論語十六葉前有何晏序孟子三十四葉前有孟子
題辭禮記九十三葉春秋左傳一百九十八葉每葉
四十行每行二十五字眉間有音切版心有易書詩
禮孝論孟左等字及刊工姓名字數余向藏五經正
文審爲婺州刻今得此本參互考訂益信前言之不

誣請列二證以明之景定建康書籍志所列諸經正文婺州本有周禮無儀禮此本亦有周禮無儀禮其証一也陳仲魚所藏婺本點校重言重意互注尙書大禹謨降水傲子不作泔水蓼蓼齋慄不作齊慄益稷敖虐是作不作傲虐禹貢北過降水不作泔水東迤北會于滙不作爲滙五子之歌懍乎若朽索之馭六馬不作凜乎峻宇雕牆不作彫牆伊訓檢身若不及不作檢身大甲中視乃厥祖不作烈祖盤庚上則惟汝衆自作弗靖不作爾衆盤庚中乃祖先父丕乃告我高后曰不作乃父說命上台恐德弗類不作惟

恐武成師逾孟津不作師渡洪範明作哲不作作哲
多士序周公以王命誥作多士不作命告天休滋至
不作茲至君牙亦惟先王之臣不作先正呂刑度作
刑以詰四方不作以詰文侯之命卽我御事不作旣
我汝克昭乃顯祖不作克紹費誓勿敢越逐不作無
敢皆與婺本尙書同與唐石經合其證二也前有樂
善堂覽書畫記白文長印怡府世寶朱文方印蓋本
怡賢親王收藏同治初爲潘文勤所得光緒十年文
勤奉諱南旋欲得余所藏周子燮兕觥遺書請效蘇
米博易之舉余拒之文勤請益堅兕觥乃歸攀古廬

九經遂爲百宋廬插架矣怡賢親王爲

聖祖仁皇帝之子其藏書之所曰樂善堂大樓九楹積書皆滿絳雲樓未火以前其宋元精本大半爲毛子晉錢遵王所得毛錢兩家散出半歸徐健菴季滄葦徐季之書由何義門介紹歸于怡府乾隆中四庫館開天下藏書家皆進呈惟怡府之書未進其中爲世所罕見者甚多如施注蘇詩全本有二此外可知矣怡府之書藏之百餘年至載垣以狂悖誅而其書始散落人間聊城楊學士紹和常熟翁叔平尙書吳縣潘文勤錢唐朱修伯宗丞得之爲多

明抄紫巖易傳跋

紫巖居士易傳十卷首載易論一篇後有嘉定庚申
紫巖曾孫獻之跋萬厯甲戌郭朴跋朴稱得錄本于
林慮李龍岡主事林錄自唐荊州家成臯王傳易論
及易注因取朴所藏本刻焉此本蓋從王府刊本影
寫者第二第三行空當是明人校刊銜名故影抄時
削之卷十末有木記云此書舊本貞敦二字多減去
點畫恒字間有更爲常字者皆避宋帝諱也惟敬字
每以欽字代之似爲張公家諱不知敬亦宋太宗嫌
名也明人之陋至此無怪何義門以爲不足憑矣然

其書源出宋本獻之跋猶存通志堂所據本亦卽明
藩府本削獻之跋並缺卷首易論不若此本之完善
也每冊有秀水朱彝尊錫鬯氏朱文方印我生之年
歲在屠維大荒落月在橘壯十四日癸酉時朱文方
印吳騫字槎客別字兎牀朱文長印蓋曝書亭藏書
後歸吳氏拜經樓者書分三冊其第二三冊封面題
字猶竹垞筆也

元槧周易程朱傳義附錄跋

周易程朱先生傳義附錄十四卷題曰後學天台董楷纂集每頁二十四行每行二十二字小字雙行傳本義以大字黑質白章別之附錄以粗線黑圈圍之一作某亦以小字黑質白章別之前有咸淳丙寅董楷序及識語凡例朱子易圖說程子易傳序程傳綱領朱子說易綱領後有程子篇義朱子五贊筮儀楷里貫仕履詳提要其經文多與咸淳本周易本義同如初六終來有它吉不作他吉坤彖傳應地无疆不作無疆頤彖傳自求口實不作口食繫辭傳失得之

象也不作得失何以守位曰人不作曰仁男女構精
不作構精兼三材而兩之故六三材之道也不作三
才序卦傳傷于外者必反於家不作其家決必有遇
有下無所字雜卦傳豐多故下無也字注如雜卦傳
注咸速常久不作咸速恒久皆足訂俗本之譌卷中
有周書二字屯分二字白文印松藹藏書朱文方印吳
騫讀過白文方印蓋先爲海甯周松藹所藏後歸吳
免牀拜經樓者

覆宋咸淳本朱子周易本義跋

周易上下經二卷彖傳象傳文言繫辭說卦序卦雜卦十卷題曰朱熹本義前有易圖題曰朱熹集錄後有五贊筮儀題曰朱熹系述每頁十二行每行十五字其勝於今本處錢竹汀養新錄陳仲魚綴文經籍跋已詳言之惟吳革字貫仕履則未之詳也今爲補攷如左革字時夫江西德安縣人父元字季誠開禧元年進士累官知制誥革三領舉于漕肄業白鹿書院任撫州崇仁尉淳祐中知錢唐縣通判臨安府寶祐中知南安軍咸淳初知建州移知福州累官華文

閣學士沿江制置使江東安撫使知建康府兼淮西
總領以崇正學基化本宣德達情爲已任卒贈光祿
大夫謚清惠見福建浙江江西三省通志序云刊于
朱子故里蓋革知建甯時所刊也

影宋抄周易經傳集解跋

周易經傳集解三十六卷題曰朝議大夫直寶文閣
權發遣潭州軍州主管荆湖南路安撫使公事臣林
栗上進前有栗進表貼黃獎諭勅栗自序每葉二十
行每行二十二字每卷爲兩卦六十四卦分三十二
卷卷三十三三十四繫辭卷三十五文言說卦序卦
雜卦卷三十六河圖洛書八卦九疇大衍總會圖六
十四卦立成圖大衍揲著解與王氏玉海合蓋从宋
本傳錄者每卦以序卦列首列雜卦于爻辭之前而
爲之解故卷三十六序卦雜卦有經無解卷五後有

履卦序說一篇題紹興甲戌秋九月崇仁學易堂書
卷二十七漸之進也解今本下漸字作之非也夫子
蓋釋漸者漸進也後人傳寫務从簡便故于漸字加
二亥豕相變遂訛爲之字卷三十一渙奔其機解曰
經典凡字無从木者說文机木名愚謂机當作机不
安也書曰邦之机隍机與疏同奔其机者奔其不安
之地也故曰悔亡夫吉凶悔吝生乎動九二動于陷
之中能無悔乎謂去其艱疏而入于平易之塗斯爲
悔亡矣故子曰渙奔其机得願也夫離險而就易去
危而卽安非人情之所願哉又卷三十四繫辭乾坤

其易之門節解曰此一節爲簡編脫亂失其倫次自通神明之德下當接其稱民也小其取類也大其旨遠其辭文其言曲而中其事肆而隱因貳以濟民行以明失德之報其下乃接其稱民也雜而不越越一簡在後脫二簡在前微顯闡幽下有開字蓋書生注於句絕以訓釋闡字非本文也云云其言皆有理爲前人所未道文言乾爲天一章注家皆略之黃中逐句解釋亦多精當無怪竹垞亟爲表章耳其所採程傳之外蘇東坡易傳之說爲多此所以與朱子不合歟

明覆宋本誠齋易傳跋

誠齋先生易傳二十卷次行題宋寶謨閣學士楊萬里廷秀箸前有淳熙戊申誠齋自序臣僚請抄錄易傳狀楊承議申送易傳狀及嘉靖四十二年張時徹序後有嘉泰甲子誠齋後序以聚珍本校一過大致多同惟此本出自宋刻故奏狀申狀皆有提行處每卷題名上有官銜聚珍本則否並缺後序朱氏經義攷亦載張時徹序所見當與此本同徐乾學傳是樓有宋張敬之校刊本有元至正鄭希聖題字及正德十一年朱叔英良育跋今不得見矣

元槧易圖纂要跋

易圖纂要一卷元槧本前有至正二十一年珍自序
首伏羲始劃八卦圖次八卦重爲六十四卦圓圖次
五行之數十五圖次天地之數五十五圖次兩儀定
位于上下圖次四象分布于四方圖次八卦分布于
四方四隅圖次大衍之目十五圖次水火不相射圖
次男女構精圖次乾道成男坤道成女圖

四庫未收提要但云見永樂大典而已此則元刊元
印本也珍自序謂象與數皆寫于畫因而爲之圖旣
有圖則不過一覽而聖人之意當在我目中雖無注

釋可也其言甚自誇詡所採子華子北齊褚澄燕山
溫次霄江右邱三谷宜春李王谿雲間儲花谷臨江
黎時中新安王太古邵康節朱紫陽宋咸洪景廬李
挺之程修陳希夷鄭少梅程沙隨諸家說易之書頗
有不傳者

元槩周易集說跋

俞石澗周易上經下經彖傳上彖傳下爻傳象辭文言繫辭上繫辭下說卦序卦雜卦或題林屋山人俞琰玉吾叟或題林屋山人俞琰集說前有泰定元年黃潛題辭元貞丙申琰自序後有皇慶癸丑琰後序序後摹方印三一曰俞琰玉吾一曰石澗皆陽文一曰林屋山人雙鉤陽文每葉二十四行每行二十一字版心間有存存齋刊四字經頂格說低一格引諸家說以黑質白章別之上經後跋曰嗣男仲溫命兒楨繕寫謹鈐梓于讀易樓至正八年歲在戊子十二

月二十五日謹誌下經後有至正九年跋略同惟命男植三字改孫貞木彖傳後有十年跋亦略同惟孫貞木改爲命兒植植蓋至正中是書初刊祖本也玉吾無子以仲溫爲嗣植植爲玉吾孫植字貞木皆藉此以攷見書法工秀體兼歐趙貞木本有書名見書史會要植亦濡染家學手書上版故能精美如此也通志堂刊本據何義門說亦借汲古元刻付梓所見當與此本同乃不依元刊而謬爲分析刪去上經下經彖傳後俞仲溫誌語未免妄作元本每卷末或題俞氏易集說或題俞石澗易集說故通志本版心改

題俞氏易集說以清眉目義門以爲大謬蓋未細檢
元刊耳

四庫箸錄作四十卷又不知何人所分析矣

易原奧義周易原旨跋

易原奧義一卷周易原旨六卷題洛陽後學保八述
奧義先列先天中天後天三圖次易源心法原旨每
爻之後以君子體而用之句居首以明每爻之用故
又名易體用前有任士林序見松鄉集卷四牟巖序
陵陽先生集失收其前半似保八自序恐非巖作故
朱竹垞經義攷祗摘數行想所見本已然又缺名序
前半語氣似方回後半似自序千頃堂書目稱有方
回序惜已與自序羈亂無善本正之陵陽卒于至大
四年序題丙午爲大德十年則保八蓋大德時人也

影宋抄周易集傳跋

周易集傳八卷題曰廬陵龍仁夫學每葉十六行每行十六字注雙行每卷後有男壽暘校刊五字影寫元刊本以別下齋蔣氏刊本校之蔣刊之謬有四元本每卷首行書名下卷一上經之上卷二日上經之中卷三日上經之下卷四曰下經之上卷五曰下經之中卷六曰下經之下卷七曰彖傳上卷八曰彖傳下蔣刊皆削之一謬也元本卷一至卷六凡引朱子本義不下數十百條蔣刊皆削之惟卷七卷八不削二謬也元刊卦名下小注皆有某卦二字以黑質白

章別之蔣刊亦全削謬三也元刊經低一格有低二
格者或總論或辨証而非一爻一句之解如卷一乾
彖注貞有二義云云坤六二注凡爻有止一象一占
云云蒙初六注坎一陽陷二陰云云屯彖注左氏傳
孔成子爲衛公子云云需彖注經言大川云云訟初
六注兌爲口云云九四注巽下一陰爲主云云上九
注朱子曰云云師六五注離爲罔咎云云小畜九三
注說卦兌爲毀折云云上九注幾望元明象云云卷
二同人初九注門偶虛云云隨上六注艮坎皆北方
幽陰卦云云觀彖注舊云卦名之觀音去聲云云卷

三噬嗑九四注說卦坎爲弓云云剝初六注成剝以
艮爲正云云六五注虞翻洪邁云云无妄彖注按象
傳物與無妄云云上九注无妄者天命之偶然云云
大畜上九注愚案小畜畜之道云云頤六三注鄭剛
中曰云云離六五注三歌嗟云云卷四咸彖注朱子
云咸上二畫云云明夷初九注先儒多云云家人
上九注初四閑有家云云蹇上六注諸陰爻不能濟
蹇云云損六四注損六爻言益之者云云卷五姤九
五注易崇陽抑陰之書也云云井彖注上卦坎下卦
復云云鼎初六注兌乃坤之降云云艮彖注

卦

以背爲象云云漸上九注震以下一陽爲主云云歸妹彖注卦以兌妹歸震上六注程子云云卷六豐九四注凡物兩強則抗云云未濟彖注卦雖有未濟之分云云上九注西溪李氏曰云云元本皆低二格蔣本皆連屬而以小圓圈隔之不但與元本有小圓圈者混淆不清亦大失作者本旨其謬四也惟蔣氏之意前六卷刪朱子注而後二卷不刪者特以前帙多後僅每卷數葉將以省刻資耳果爾則不如不刊之更省費也昔納蘭氏曾見是書以有缺卷不刊入通

志堂經解提要詆爲僞若蔣氏者豈但僞而已哉明
人刊書往往于斷缺處以意補足

國朝名公有刊如不刊之誚然妄爲刪削者尙少明
人以妄補遺譏後世而別下齋刊本如此乃爲近時
所重殆莊子所謂彼一是非此亦一是非者耶卷八是
以小事吉注朱子曰以卦德卦變卦體下缺一葉蔣
本同據蔣光煦跋刪節出于李敬堂明府敬堂里貫
無攷可謂庸妄人矣

周易爻變義蘊跋

周易爻變義蘊四卷題曰天台陳應潤註釋前有至正丙戌黃潛序及應潤自序影寫元刊本首有圖說其言謂周子太極圖雜以老子之學不容不改邵子以丹經之學撰先天圖易八卦之位不能不正說易者不知爻變之法故作爻變圖先天圖以已生未生之卦爲順逆使數往知來之說不明故作逆順圖悍然與周邵爲難宋元說易者所罕見也提要不言有圖說未知與此同否有新安汪氏朱文方印啓淑私印朱文方印蓋開萬樓舊藏也

元槧書集傳纂疏跋

書六卷次行題曰朱子訂定蔡沉集傳三行題後學新安陳櫟纂疏前列孔安國序漢書藝文志一條孔穎達疏一條皆有注亦題朱子訂定次書序無朱子訂定前有蔡沉序陳櫟序纂疏凡例讀尚書綱領每頁二十二行每行二十一字小字雙行纂疏以墨長圓隔之蔡序後有木記二行曰泰定丁卯陽月梅溪書院新刊十二字蓋是書初刊本也益稷州十有二師不作有十盤庚乃祖先父丕乃告我高后曰不作乃祖乃父金縢惟朕小子其新逆不作親迎酒誥又

惟殷之迪諸臣惟工不作百工勿蠲乃事不作汝事
君奭越我民罔尤違不作曰我贊誓勿敢越逐不作
無敢皆足訂今通行本集傳之譌卷中有毛晉私印
朱文方印汲古主人朱文方印子晉二字朱文連珠
印子晉書印朱文方印汲古得修綆朱文長印繁花
塢朱文方印毛氏子晉朱文方印汲古閣朱文長印
又方印皆毛氏藏印也又有勤襄公五女白文方印
若衡朱文方印方氏若衡曾觀白文長印考直隸總
督桐城方維甸謚勤襄若衡蓋方維甸之第五女女
士嗜書亦書林韻事也

元槧尙書輯錄纂注跋

書六卷每卷次行題曰朱子訂定蔡氏集傳三行題曰後學鄱陽董鼎拜錄纂注先列孔安國序漢書藝文志一條孔穎達正義一條書序次于六卷之後皆有注題朱子訂定蔡氏集傳後學鄱陽董鼎輯錄纂注前載蔡序及至大戊申董鼎序次朱子說書綱領次輯錄纂注凡例次輯錄引用諸書次所載朱子門人姓氏次纂注引用諸書次纂注引用諸家姓氏後有建安後學余安定編校一行綱領末有至正甲午翠巖精舍新刊木記二行經文多與宋本書集傳及

唐石經合通志堂刊本大禹謨降水傲予之降已譌
澤又缺輯錄引用諸書朱子門人姓氏纂注引用諸
書引用諸家姓氏不若此本之完善也鼎書成于至
大戊申至延祐戊申而余仁仲刊于勤有堂常熟瞿
氏恬裕齋今有其書至至正甲午而劉廷佐刊于翠
巖精舍皆建甯府麻沙坊本也

影宋尙書詳解跋

陳先生尙書詳解五十卷題曰從事郎新泉州節度
推度推官陳經顯之案經福建長溪人慶元五年進
士見福建通志選舉表其曾官泉州節度推官則閩
志亦未詳也影寫宋刊本每頁二十四行每行二十
四字前有發題以聚珍本互校聚珍頗有奪落卷十
三末嗣王當謹于善下脫三十四字又脫肆命徂后
解三十一字衍而已二字卷二十四初一日五行解
故初一日五行下缺八行約百六十餘字聚珍本聯
屬不空卷二十一首缺四行聚珍本注曰此句上原

本缺四行則所據亦與此本同

舊抄詩總聞跋

詩總聞二十卷題曰汶陽王質前有自序及聞音聞訓聞章聞句聞字聞物聞用聞迹聞事聞人凡例十條後有淳祐癸卯陳日強跋舊抄本案質本鄆州人後徙興國紹興十八年進士張浚虞允文皆辟爲屬通判荆南不赴奉祠居湖州之東林山見宋史本傳及雪山集自署汶陽著舊望也以活字本校一過頗有勝處卷二聞風二而字下活字本注缺此本有季有大小前人未之及者何也十二字卷七匪風篇總聞蓋天下同情也下活字本奪自周以後有漢至今

云云六十一字辨蠅篇總聞以已所處爲避患下活
字本奪之所靜地誠古壤也八字其他活字本注原
缺此本亦同惟質自序及聞音至聞人十條約千餘
字活字本全缺質自序則雪山集亦失收

宋槧詩集傳跋

詩二十卷題朱熹集傳每頁十四行每行大十五字
小字雙行版心有字數及刊工姓名不盈傾筐承筐
是將之筐無折我樹杞樹桑樹檀爰有樹檀之樹殷
其盈矣之殷簞第朱鄴之鄴上慎旃哉慎爾優游之
慎我覲之子之覲如月之恒之恒以匡王國之匡爾
不我畜之畜皆缺筆蓋甯宗刊本也以通行八卷本
校之宋本反切而俗本改爲直音者千餘條如周南
睢七余切今改音疽窈烏了反今改音杏荇行孟反
今改音杏芼莫報反叶音邈今改音帽施以豉反今

改音異刈魚廢反今改音义護胡郭反今改音鑊絺
耻知反今改音癡裕去逆反叶去略反今改音隙澣
戶管反今改音緩害戶葛反今改音曷否方九反今
改如字崔徂關反今改音摧鬼五回反今改音魏虺
呼回反今改音灰隕徒回反今改音頽兕徐履反今
改音似觥古橫反今改音肱祖七徐反今改音疽樛
居蚪反今改音鳩藟力軌反今改音壘纍力追反今
改音雷只之氏反今改音紙詵所巾反今改音莘揖
側立反今改音緝天於驕反今改音腰華芳無呼瓜
二反今改音花蕢浮雲反今改音文蔡側巾反今改

音臻之類是也宋刻有反切而俗本刪去者數百條如周南母莫復反蟄直立反家古胡古牙二反趯託歷反之類是也宋刻有注而今本刪去者數十條如漢廣不可休息注吳氏曰韓詩作思麟之趾首章吁字注音吁下同泉水篇遄臻于衛注此字本與邁害叶今讀誤二子乘舟篇汎汎其逝注此字本與害叶今讀誤東門之枌南方之原注無韻未詳七月流火何以卒歲注或曰發烈褐皆如字而幾讀如雪東山惓惓不歸注無韻未詳常棣外禦其侮注春秋傳作侮亶其然乎注就用乎字爲韻無將大車篇底字注

劉氏曰當作痕與瘠同上帝甚踰注戰國策作上帝
甚神假樂篇假樂君子注中庸春秋傳皆作嘉今當
作嘉民勞篇是用大諫注春秋傳荀子書並作簡音
簡崧高篇往近注鄭音記按說文从叕從丌今从斤
誤瞻仰篇孔填注舊說古塵字清廟篇無射注音亦
與黻同於人斯注周頌多不叶韻未詳其說維天之
命假以溢我注春秋傳作何春秋傳作恤天作篇岐
字注沈括云云八十四字闕宮籩豆大房注此下當
脫一句如鐘鼓喤喤之類烈文篇黻字注中庸作奏
今从之長發禹敷下土方注楚辭天問禹降省下土

方蓋用此語之類是也有宋刻反切而今妄改與某
同者數百條如召南頤戶結反而改爲與絜同頤戶
郎反而改爲與杭同暄於計反而改爲與縊同天於
驕反改爲與腰同睨胡顯反改爲與演同泄一世反
改爲與異同伎之豉反改爲與至同揭苦例反改爲
與器同彌彌爾反改爲與米同慍許六反改爲與畜
同鞠居六反改爲與菊同之類是也此外衍文脫訛
更難僕數耳是書本爲袁廷禱所藏後歸海甯陳仲
魚孝廉陳據朱氏鑑詩傳遺說敘定爲後山刊本凡
經文勝俗本處仲魚有跋載所著綴文中惟商頌降

予卿士已作降于小雅家伯維宰雖不誤冢宰實作
爲宰與仲魚言不符恐仲魚當時卽據提要所舉作
跋未嘗逐一覆檢耳此本經文注文反切証以元版
胡一桂附錄纂疏羅復音釋無一不合降于之于不
作予爲宰之爲不作維亦同則此二字之訛宋本已
然不始于俗本也

明覆宋呂東萊讀詩記跋

呂氏家塾讀詩記三十二卷前有清熙壬寅朱子序
嘉靖辛卯陸欽序諸家姓氏引用書目每葉二十八
行每行十九字經頂格注低一格注中有注旁行而
字略小不作雙行各家姓氏以黑質白章別之書法
以篆作楷陳啟源毛詩稽古編所由濫觴也宋諱有
缺筆蓋從宋本翻雕者較萬厯癸卯刻卷一禮記天
子五年一巡狩之前多一條卷二十七王之職有闕
能下多千餘字卷二十八自彼成康奄有四方下多
十四字詳盧抱經羣書校補書雖嘉靖刻流傳甚罕

書賈往往割去陸序以充宋本世亦有受其欺者

萬厯本呂氏家塾讀詩記跋

呂氏家塾讀詩記三十二卷明陳龍光刊本前有萬厯癸卯顧起元序其書亦源出嘉靖刻而改其行款變其字體易旁行小注爲雙行注嘉靖本之後印者卷二十七缺廿九三十兩葉當此本三十六七葉之間故三十五葉末留黑釘一行三十六三十七兩葉空其張數俾閱者有迹可求尙無明人羈亂惡習卷一詩樂奪一條卷二十八奪數十字皆抄手佚脫校勘不精尙非大謬惟卷二十七所缺千餘字當嘉靖本之兩葉又四行實不止兩葉也因何奪落令人不

可思索盧抱經以爲止晚兩葉蓋未覆勘原書耳據
顧起元序明時南國子監四川皆有刻本歲久夷漫
今所見惟嘉靖本與此本耳

儀顧堂續跋卷二

歸安陸心源伯剛父

元槧詩傳通釋跋

詩傳通釋二十卷次行題朱子集傳三行題後學安成劉瑾通釋卷一後有至正壬辰仲夏日新堂梓木印其書以朱子集傳爲主而採諸經及毛傳鄭箋史記漢書列女傳說文廣韻陸璣草木疏郭璞爾雅注陸德明釋文本草注埤雅歐陽子程子張子呂東萊陳少南嚴氏輔氏呂與叔呂和叔永嘉鄭氏陳君舉許益之胡庭芳何氏陸農師張南軒劉辰翁王介甫

董氏謝疊山彭氏楊氏劉執中李迂仲黃實夫汪氏
胡明仲項氏李寶之熊剛大長樂王氏劉元城錢氏
曹氏胡康侯陳器之蘇氏張學龍陳壽翁曾氏謝上
蔡范氏章如愚山堂攷索濮氏真氏王日休林氏徐
氏陳大猷胡旦數十家之說以釋之詩小序次每篇
之後辨說次序之後每頁二十四行每行二十三字
經頂格集傳低一格通釋双行諸說以黑質白章別
之自爲之說標以愚按二字亦以黑質白章別之經
文無譌字反切不改直音朱子說無刪削多與宋刊
集傳同足以正俗本之譌瑾江西安福縣人安福爲

漢安成縣境自署安成者古縣名也顧亭林日知錄
謂明永樂時纂詩經大全胡廣等全襲瑾書但改愚
案二字爲安成劉氏曰今勘之果然惟此書小序次
于每篇之後大全則統冠全書耳考訂非宋人所長
瑾書雖名通釋而于朱子所未詳者如居居究究鈎
援臨衝之類未能証佐一字按語多淺陋疏舛不僅
陳氏毛詩稽古篇所駁已也其所採集取之東萊讀
詩記嚴氏詩緝輔廣董子問者居多未必代山自造
吉安府志稱瑾肆力治詩考正諸國世次作者時世
察其源流辨其音韻審詩樂之合窮刪定之由能發

朱子之蘊云云不免鄉曲私譽未足爲信惟瑾鄉里
小儒見聞寡陋無足深責廣奉命纂修將垂爲一代
之典公然行竊以冒賞吾爲世之竊高位者羞之

明初本詩集傳音釋跋

詩三十卷次行題朱熹集說前有朱子序詩傳綱領
詩序辨說其書先列集傳後附音釋以墨圈隔之凡
反切不改直音亦不改與某同注無刪削皆與宋十
四行十五字詩集傳本同惟經文訛字較多如何彼
穠矣穠已誤穠羊牛下括羊牛已誤牛羊終然允藏
然已誤焉不能辰夜辰已誤晨此則不及宋版耳所
附音釋不著作者姓氏案元羅復字中行廬陵人箸
有詩集傳音釋二十卷見千頃堂書目當卽此書綱
領前有詩圖十八頁與宋刊纂圖互注毛詩又不同

圖下多引朱子說必亦羅復所作

四庫未收阮文達亦未進呈誠經部罕觀之祕笈也

宋槧蜀大字本周禮跋

周禮宋槧本存卷九卷十兩卷首行題秋官司寇第五下題鄭氏注每葉十六行每行十六字注雙行每行二十二字版心有字數及刻工姓名殷敬恒桓貞構慎皆缺筆當爲宋孝宗時蜀中刊本百宋一廬賦所謂周禮一官者也周禮單注不附釋文者今以嘉靖覆宋八行十七字本爲最善阮氏謂勝于余仁仲岳倦翁本此本又足訂嘉靖本之誤如秋官序官赤友氏友不誤友大司寇注大廟之內大不誤太小司寇注鄭司農云司不誤可士師注比其類也比不誤

此遂士注二人而分主一遂而不誤其朝士注五曰
路門五曰不誤五門外朝在庫門之外外朝不誤外
廟雍氏注穿地爲塹塹不誤漸冥氏以靈鼓歐之歐
不誤歐小行人告其所爲來之事之不誤其每國辨
異之辨不誤辨司儀注西面北面不誤南是南宮縚
之行也是不誤自掌客注稻梁器也梁不誤梁此皆
勝嘉靖本處若監閩毛正義諸刊則更有霄壤之別
惜乎僅存二卷未聞有全本耳黃氏校刊周禮所据
卽此二卷阮文達未見原本僅據臧庸堂校本採入
校勘記庸堂所見亦卽此二卷恐世無第二本矣每

卷有元蒙古文方印及黃丕烈印白文方印復翁二字白文方印士禮居白文方印百宋一廬白文方印宋本二字朱文橢圓印汪士鐘印白文方印閩源真賞朱文方印蓋元代官書入

國朝爲蘇州倚樹吟軒楊偕時所藏後歸黃氏百宋一廬嘉慶甲戌堯圃孝廉書得書緣起于後乙亥孝廉校于嘉靖本上又跋于後堯圃身前其書已歸汪閩源故有汪士鐘印汪氏之書道光末散出其精品多歸楊至堂河帥其奇零有歸上海郁氏者余从上海郁氏得之

宋槧續儀經傳通解跋

儀禮經傳通解續祭禮十四卷前有紹定辛卯楊復自序門人鄭逢辰序及逢辰進祭禮二十帙儀禮圖十四帙表淳祐六年十一月中書省劄付淳祐七年四月十三日贈復文林郎勅每葉十四行行十五字注雙行版心有字數及刻工姓名宋淳祐刊本按復字志仁福安人受業于朱又受業于黃勉齋學者稱信齋先生朱子纂儀禮經傳通解旣成家鄉邦國王朝禮而以喪祭二禮屬之黃勉齋嘉定己卯勉齋始成喪禮而以祭禮稿本授楊信齋信齋隨時咨問抄

識以待筆削而勉齋卽世張慮知南康續刻喪禮又
取祭禮稿本刊之以待後學四方朋友未有取而修
定之者信齋自念齒髮浸衰曩日幸有所聞不可不
及時傳述遂據稿本參以所聞稍加更定以續成其
書見自序是張慮所刊乃信齋授于勉齋之稿本卽
四庫所收呂氏所重刊者此則信齋以稿本修定者
與張刊本不同故以呂刊互勘或增或刪或改或易
竟無一條全同也張刊之板明中葉尙存南監惟缺
頁斷爛甚多此本則流傳極少朱竹垞經義考卷一
百三十二續儀禮經傳通解下不載逢辰序又不載

進表中書省劄理宗贈勅則亦未見此本矣惟趙希弁讀書附志張萱內閣書目所著錄其言與此本合所見當卽此本也鄭逢辰爲信齋門人淳祐七年江西轉運使見進表及宋濂贛州靈濟廟碑逢辰能進信齋之書言必稱先師其爲信齋高弟可知宋元學案失收應補人勉齋學案

宋槧巾箱本周禮跋

周禮十二卷次行篇名在上下題周禮鄭氏注宋槧巾箱本每頁二十四行每行二十三字小字雙行版心有字數格闕外有篇名經文大字注小字次陸氏釋文次重言重意次互注所附釋文以白質黑章別之但採音切而無義訓與閩刊稍別字體工整與婺本點校重意重言互注尙書相仿慎字敦字皆缺末筆當爲甯宗時婺州刊本大致與宋刊纂圖本明嘉靖覆宋本同其勝于嘉靖本者夏官序官掌固注王公設險設不誤誤譚人注譚序王意王不誤主大司

馬注入曰振旅旅不誤振治徒庶之政令庶不誤度
無干車車不誤軍以簿書校錄簿不誤簿皆上卿爲
軍將者也上不誤止司弓矢注守城車戰戰不誤載
大馭注軌爲範軌不誤軌齊僕注車逆拜辱逆不誤
送職方氏其川熒雜熒不誤榮其他形似之可訂正
者不勝枚舉也余先得纂圖互注本嘉靖覆宋本後
得蜀大字殘本今又得此本周禮一經善本爲不少
矣

宋槧纂圖互注周禮跋

纂圖互注周禮十二卷小題在上下題周禮鄭氏注
每葉二十四行每行大字二十一小字雙行每行二
十五六不等格闌外有卷數字數前有篇目三頁周
禮經圖三十七葉圖凡三十有九曰王國經緯涂軌
圖曰朝位寢廟社稷圖曰次辰几筵圖曰五冕圖曰
弁服之圖曰王后六服之圖曰天子玉路圖曰王后
翟車圖曰天子圭璋纁繅藉之圖曰諸臣圭璧纁繅藉之
圖曰六尊圖曰尊壘圖曰圭璋瓚圖曰禮神玉圖曰
新舊鼎俎之圖曰籩豆簠簋登爵之圖曰纁洗勺篚

圖曰蜃概散修圖曰諸禮器圖曰六器圖曰六舞之圖曰龜筮圖曰犧牲圖曰器用之圖曰鳧氏爲鍾圖曰磬氏爲磬圖曰鍾磬總圖曰鼓制圖上曰鼓制圖下曰樂器之圖曰六幣圖曰八節圖曰九節制圖曰兵器總圖曰兵甲之圖曰車制之圖曰蓋耒圖曰輦輦圖曰傳授圖經文大字注小字次釋文次重意重言次互注與互注禮記大略相同惟禮記以陸曰別于鄭注此則稱陸德明音義禮記于釋文所出之字每字以圓圍之此則但于注下加小圓別之而不加圍蓋非一家所刊也黃堯圃校刊周禮以董氏集古堂

本余氏萬卷堂本及此本互校今觀此本與董本大略多同如天官序官庭人注裏肉曰苞不作在肉小宰經贊玉幣爵之事不作玉幣之類董氏余氏皆當時坊賈此亦坊刊與董余兩本無所軒輊也

舊抄周禮詳解跋

王昭禹周禮詳解四十卷次行題曰唐國子監博士
吳縣開國男陸德明釋文附前有昭禹自序及周禮
互注摠括十七條每葉十八行每行十八字似從宋
本傳錄者其書略于詁訓而詳于解說體例如王荆
公新義蓋同時之書也所採經典釋文周禮音義亦
十不存五次行忽題德明銜名不可解也明文淵閣
書目有一部注曰二十冊全則宋本必有存者聞山
西路小舟有宋本今已散落不知何所歸矣

元槧儀禮集說跋

儀禮十七卷題曰敖繼公集說元槧元印本每頁二十四行每行十八字經頂格注低一格版心有字數間有刻工姓名前大德辛丑自序後有後序十一卷後有識語所採諸家註鄭注賈疏而外朱子之說爲多此外惟馬季長陳用之李微之數條而已每卷後有正誤數條言所以去取之意如後世校勘記之類惟卷一卷十一獨無與通志堂刻同似以無所校正而然非缺也何義門不察疑爲缺而欲訪求誤矣卷十一末大功二小功二句下通志堂本空四字此本

損破四字以白紙補之則通志堂所刊卽以此爲祖
本矣顧亭林日知錄舉監本脫誤各條此本皆不脫
則所據猶宋時善本也

春秋集傳微旨跋

春秋集傳微旨三卷題曰朝議大夫守國子博士上柱國陸淳纂前爲淳自序連屬篇目每頁二十行每行二十字影寫宋刊本以龔翔麟王玲瓏閣刊本互校雖大旨皆同而已削其結銜失宋本之舊矣陸氏原本義之當否以朱墨爲別

四庫所收之本以方匡界畫代朱墨尙不失陸氏本旨此本已無方匡界畫雖不及

四庫本尙是二百年前抄本是書宋有皇祐間汴梁刻本元有延祐江西刻本宋刻多有結銜元刻往往

刪之以此証之或出自宋刻未可知也卷一有無黨
二字白文方印吾研齋三字朱文方印卷二南陽二
字白文圓印木石鹿豕口口六字白文方印卷三有
善人里三字白文方印呂氏藏書朱文方印蓋經石
門呂留良之子無黨收藏者

明覆宋本春秋集傳纂例跋

春秋集傳纂例十卷題陸淳纂前有淳序及總目每卷有目連屬篇目每葉二十四行每行二十二字明覆宋刊本以龔氏玉玲瓏閣刊本互校龔本奪落甚多卷二內逆女例脫成十四年叔孫僑如如齊逆女十二字並小注九字夫人如及會饗例莊七年冬夫人姜氏會齊侯于穀十五年夏夫人姜氏如齊兩行脫會齊侯于穀十五年夏夫人姜氏十三字又脫小注四字而連爲一行卷三公葬例奪成元年二月辛酉葬我君宣公及小注二字十八年十二月丁未葬

我君成公及小注二字卷四公如例奪五年公如齊
九年春正月公如齊兩行卷六殺他國大夫例楚子
蔡侯下奪陳侯許男頓子胡子沈子淮夷十二字衍
云云二字執諸侯例僖二十一年秋宋公楚子陳侯
下奪蔡侯鄭伯許男曹伯八字衍云云二字公至自
某國某地例昭二十六年三月公至自齊居于鄆誤
作小注致前事例僖六年公會齊侯下奪宋公陳侯
衛侯曹伯八字衍云云二字襄十年公會晉侯下奪
宋公衛侯曹伯莒子邾公滕子薛伯杞伯小邾子齊
世子光二十三字衍云云二字致後事例僖四年春

王正月公會齊侯下奪宋公陳侯衛侯鄭伯許男曹伯十二字衍云云二字襄十一年七月公會晉侯下奪宋公衛侯曹伯齊世子光莒子邾子滕子薛伯杞伯小邾子二十三字衍云云二字雜致例成七年秋公會晉侯下奪齊侯宋公衛侯曹伯莒子邾子杞伯十四字衍云云二字十六年秋公會尹子下奪晉侯齊國佐邾人七字衍云云二字定四年春三月公會劉子下奪晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏三十六字衍云云二字此外舛錯亦復不少是書慶

歷間有朱臨刊本見天一閣書目後有蜀小字本見
袁清容集金有平陽府刊本見吳淵類集元有江西
刊本龔刊所祖與此本不同疑出元江西刊本此則
行密字小當祖蜀小字本明人仿宋監本三禮鄭注
黃堯圃陳仲魚諸君皆謂當與宋刊同珍余謂此本
亦當作宋刊觀也嘉靖中吳邑令晉江汪旦有刻本
見經義攷華察後序是本字體與嘉靖吳中所刻唐
文粹藝文類聚一例或卽汪旦刻而失察序歟每冊
有福安縣印朱文方印平湖縣儒學記朱文長印

春秋會義跋

春秋會義三十六卷宋杜諤撰前有嘉祐壬申任貫序杜諤刊板自序元祐丁卯改修刊正自序晁氏公武曰諤集釋例繁露規過膏肓先儒同異篇指掌碎玉折衷指掌議纂例辨疑微旨摘微通例胡氏論箋義總論尊王發微本旨辨要集議索隱新義經社三十餘家成一書其後仍斷以己意馬氏文獻通考宋史藝文志陳氏書錄解題皆著于錄原本久佚朱竹垞經義攷注佚錄其序亦祇存百餘字惟文淵閣書目載有兩部皆注曰完全故永樂大典全部收入此

則館臣从永樂大典錄出者諤字獻可四川眉山人
皇祐間鄉貢進士見經義攷自題江陽者漢晉舊縣
名也所採諸書惟董子春秋繁露杜氏釋例陸氏春
秋微旨纂例辨疑孫明復春秋尊王發微今尙有全
書他若漢何休左氏膏肓十卷隋劉炫春秋規過三
卷唐陳岳春秋折衷論十五卷廬仝春秋摘微四卷
陸希聲春秋通例二卷劉柯三傳指要十五卷李瑾
春秋指掌十五卷蜀進士蹇遵品春秋司帖新義十
卷宋李堯俞春秋集議二卷孫明復春秋摠論一卷
朱定春秋索隱五卷孫覺春秋經社要義六卷胡安

定春秋口義五卷楊繪春秋辨要十卷今皆不傳春秋箋義不知何人所撰各家書目皆未箸錄洪興祖春秋本旨二十卷直齋箸錄惟洪卒于紹興末年年六十六距元祐甚遠非獻可所及見當與洪書同名而非一書皆賴是以存其涯略諸儒異同碎玉皆李瑾指掌篇名非別爲一家郡齋讀書志儕之三十餘家之列誤矣任貫眉州人嘉祐進士見眉州進士題名碑恭讀

高宗純皇帝御製書洪咨夔春秋說論隱公作僞事註有二盧仝摘微久佚惟宋杜諤春秋會義採其說今

于永樂大典散篇內哀輯得之則是書曾經

御覽矣今簡明既無其書提要亦不附存其目其爲
遺漏而非不錄可知江南藏書家無著錄者庚寅春
張勤果約游泰山因訪孫佩南明府寶田于尙志書
院觀其藏書得見此本擬欲錄副以卒卒南旋未果
越三月佩南錄以寄余從此兩宋樓插架又多一北
宋祕冊矣佩南山東文登人由進士官合肥知縣有
循聲以強項忤上官投劾歸博涉多通工古文以姚
惜抱爲宗今之古人也

春秋經解跋

龍學孫公春秋經解十五卷題曰孫覺莘老卷一隱上卷二隱下卷三桓上卷四桓下卷五莊上卷六莊下卷七閔公卷八僖公卷九文公卷十宣公卷十一成公卷十二襄公卷十三昭公卷十四宣公卷十五哀公分卷與書錄解題宋史藝文志皆合前有莘老序後有陽羨邵輯序樵李張顏跋楊時後序楊序後低二格有新安汪綱跋再後有周麟之跋及本傳據邵輯序紹熙于前是書未經版行至紹熙四年邵輯知高郵始刻于郡齋慶元改元張顏補刊周麟之跋于

後嘉定丙子汪綱知高郵又補刊楊時序每頁二十
行每行十九字蓋從邵輯刊本影寫者今本作十二
卷又經後人合併矣

影宋春秋尊王發微跋

春秋尊王發微十二卷題曰孫復撰附錄范文正薦狀歐陽文忠公撰墓志銘後有紹興辛未鄱陽魏安行刊版跋每葉二十八行每行二十二字宋諱有改字者如夏徵舒徵作正公子貞貞亦作正此影寫宋紹興刊本之証也與通志堂刊本同出一源而通志本稍有脫誤卷八成公三年冬十有一月傳故言聘下脫言盟二字四年公至自會冬成陳傳諸侯怠于救患怠誤急七年丙戌卒于鄆釋文采南反下脫字林音千消五字卷十昭公十一年公子愁釋文魚靳反

下脫一字卷中有虞山錢曾王藏書長印季振宜印
朱文方印滄葦朱文方印兔牀手校朱文長印蓋是
書先爲錢曾所藏後歸季滄葦卽敏求記及季氏書
目所著錄者嘉慶中歸吳兔牀後有騫手跋釋文二
百一十四字則爲魏安行所爲見魏跋自來著錄家
所未及也

春秋五禮例宗跋

春秋五禮例宗七卷前有紹聖四年自序題雪川張
大亨集書名下題張氏每葉二十二行每行十九字
宋諱有缺筆蓋從宋本傳錄者卷一吉禮其目五曰
王政曰卽位曰郊望曰宗廟曰雩卷二凶禮上其目
三曰王喪葬曰內喪葬曰外喪葬卷三凶禮下其目
二曰弑殺喪曰災變卷四軍禮一其目二曰伐曰侵卷
五軍禮二其目十曰圍曰次曰戰敗曰克獲曰取曰
入曰滅亡曰遷曰潰曰追曰戍曰乞師曰平成曰軍
賦卷六軍禮三其目四曰執以歸曰放曰奔入歸納

叛曰盜卷七軍禮四曰蒐狩曰城曰興築卷八賓禮
上其目五曰朝曰聘曰來曰會曰盟卷九賓禮下其
目二曰遇曰如至卷十嘉禮其目四曰昏曰歸賑曰
言曰肆眚今惟存七卷而四五六三卷缺焉惟文淵
閣書目箸錄張大亨五禮例宗注曰一冊全則大典
必有全書後乃有缺耳

四庫所收爲吳玉墀家藏本亦缺此三卷安得文淵
閣本復出一補全之朱竹垞經義考雖注曰存而不
載大亨自序則亦未見此書矣

春秋通訓跋

春秋通訓六卷傳抄大典本後有崇甯九年大亨自序述與東坡論難甚詳提要所稱蘇籀雙溪集載東坡答書今見樂城遺言惟文淵閣書目春秋類祇有張大亨春秋五例禮宗而無春秋通訓然則大典所收亦有出于文淵閣書目之外者矣

春秋左氏傳續說跋

春秋左氏傳續說十二卷宋呂祖謙撰傳抄永樂大典本各家書目均未著錄惟明文淵閣書目有之注曰四冊完全當卽據以採入大典者前有綱領十八條此書雖續傳說而作與傳說體例不同傳說如比事之例先例經文之相類者數條而後爲之說此則或出經文數句或出經文一句而說之其辭如語錄與麗澤論說集錄相似當出隨時講說而門弟子錄以成書者今麗澤論說集錄羣經皆有而獨無春秋或卽集錄之一種而摘出別行者歟

春秋類編跋

東萊呂大史春秋左傳類編不分卷舊抄本書錄解題箸于錄分十九類一周二齊三晉四楚五吳越六夷狄七附庸八諸侯制度九風俗十禮十一氏族十二官制十三家臣十四財用十五刑十六兵制十七地理十八春秋前事十九議論前有綱領二十二則每類之中先列左氏後列國語與解題合議論之中又分祀典論兵土功荒政諸侯政事名臣議論六門綱領之前有年表以魯十二公紀年而以各國大事記於下張月霄藏書志箸錄之本無風俗財用官制

氏族吳越夷狄諸侯制度七門而以議論中子目七門當之似非全本也是書東萊生前未經版行至嘉定三年詹父民丞婺州求東萊未刊箸述于其猶子喬年因得觀史類編讀書記歐公本末及此書付梓見歐公本末父民跋文淵閣書目有三部一注六冊完全一注四冊完全一注六冊闕嗣後則罕見箸錄愚謂此乃東萊隨手編類以備檢閱之作非博議及左氏續說之比程端學以爲門人所編未必無因惟四庫未收阮文達亦未進呈姑以流傳之罕存之耳

春秋經解跋

春秋經解十二卷宋崔子方撰傳抄永樂大典本其里貫仕履提要考訂甚詳足以証朱竹垞經義攷之訛前有朱震劄子二道及子方自序後有後序子方畢生精力萃于本例一書此書乃本例之緒餘也子方嘗謂詩與春秋相表裏其解鄭伯克段于鄆不書弟者叔于田之詩存則段爲弟可知解蔡人殺陳陀據墓門詩序陳陀不義惡加萬民句斷弑君之賊解夫人言齊侯于祝上辭不見譏者謂敝笱之詩存則文姜之惡不患不見于後世解鄭棄其師不曰鄭伯

不曰鄭人者清人之詩存則鄭棄其師可知皆創論也子方生當春秋三傳不列學官之時而能獨抱遺經潛心纂述成一家言可謂特立獨行之士視常秩之諱其所學以趨時好者有上下牀之別漢上朱氏再爲奏請者所重亦在此乃宋史常秩有傳而子方無名未免失去取之公矣文淵閣書目有崔子方本例而無經解此亦永樂大典所採書出于文淵閣目外者

春秋讞跋

左氏讞十卷公羊讞六卷穀梁讞六卷宋葉夢得撰傳抄大典本其自序曰以春秋爲用法之君而已聽之有不盡其辭則欺民有不盡其法則欺君凡啖趙論三家之失爲辨疑劉氏廣啖趙之遺爲權衡合二書正其差誤而補其疏略目之曰讞見陳振孫書錄解題今本失載是石林此書承啖趙劉三家之論緒非創格也特讞之名爲過當耳明文淵閣書目有石林春秋傳而無春秋讞此亦大典採輯書之出于文淵閣目外者石林所著春秋讞考傳三書惟春秋傳


刻入通志堂尙是完本考三十卷乾隆中从大典本
錄出十六卷以聚珍版印行此書無刊本吳門汪氏
藝芸書舍有舊抄本三十卷尙是宋時原本今不知
所歸矣

儀顧堂續跋卷三



歸安陸心源伯剛父

影元本春秋比事跋



沈先生春秋比事二十卷影寫元刊本每頁二十行
每行二十字前有至元乙卯中興路儒學教授王顯
仁序從仕郎山南江北道肅政廉訪司管勾承發架
閣兼照磨趙君庸從事郎廉訪司知事范勿登仕郎
廉訪司經歷伯家奴朝列大夫僉廉訪司事李執中
奉政大夫僉事李世藩奉訓大夫僉事保保朝列大
夫廉訪副使李守仁亞中大夫副使木八沙中奉大

夫廉訪司圖魯刊板銜名嘉定辛未廬陵譚卿月浚明跋祇存頃得劉氏家本特表而出之且讎正三十六字乙者十有三減者六注者十有七云三行而缺其前直齋書錄解題曰春秋比事沈棐文伯撰陳同甫序曰文伯名棐湖州人嘗爲婺之校官以文辭稱而不聞其以經稱也湖有沈文伯名長卿號審齋居士爲常州倅忤秦檜貶化州不名棐也不知同甫何以云然豈別有名棐字文伯者乎然則非湖人也愚案建炎以來繫年要錄卷九十一左儒林郎新婺州教授沈長卿爲祕書正字尋不行是文伯嘗爲婺州

教官信而有徵名斐字文伯于義亦通意者長卿初
名斐而後改名歟惜無確証耳長卿靖康時太學生
元年二月二十二日曾上書數千言論諸生伏闕事
見北盟會編建炎二年進士累官臨安府觀察推官
紹興中湖南安撫使李綱辟爲屬旋除婺州教授五
年除祕書省正字不行十八年以左通直郎通判常
州三月以將作監丞改判嚴州十九年十月進左奉
議郎罷嘗與芮燠同賦牡丹詩有甯令漢社稷變作
莽乾坤之句爲隣人所告檜以爲譏訕二十五年追
兩官勒停檜死復左朝奉郎主管台州崇道觀三十

年葉義問使金辟爲書狀官比還卒于保州見繫年
要錄輿地紀勝嚴州圖經咸淳毘陵志長卿仕履大
略具是無言其治春秋者無怪同甫直齋均有疑辭
也

春秋比事跋二

都穆聽雨記談擬譚卿月序以爲劉朔撰

四庫所據本無譚序故提要著錄仍題沈棐名此本
譚序祇存末三行但以頃得劉氏家本特表而出之
二語証之必以爲劉朔作攷劉朔爲後村之祖後村
集有二大父遺文跋云麟台公歿于信安傳舍中故

遺稿尤少有春秋比事二十卷別爲書與譚卿月之言合則此書信爲劉朔作矣朔字復之莆田人與兄夙皆受業于林光朝少喜易蘄以名家以春秋久爲王介甫茅塞更治春秋紹興庚辰以春秋登第調溫州司戶累知福清縣入爲祕書省正字疾作求爲福建參議官行至信安卒于傳舍見中興館閣錄及葉水心集二劉墓誌朔旣以春秋名家又有後村集譚卿月序可証其爲朔著無疑惟文伯氣節文章卓然有以自立必非竊書以爲名者同甫所見之本並無撰人姓名序稱或曰沈文伯所爲亦未定爲文伯作

也直齋乃始誤會當改題劉朔名爲是其書卷一周
天王卷二二霸齊桓晉文卷三卷四魯十二公卷五
卷六晉卷七齊卷八宋卷九鄭卷十蒐狩築城獻捷
田邑卷十一郊祀宮室正朔卽位卷十二書盟卷十
三書會卷十四書朝書聘卷十五書侵卷十六書伐
卷十七書戰卷十八書救書平卷十九書遂書次卷
二十夷狄春秋之教比事屬辭雖著于禮經而漢唐
以來說春秋者無有依經比類合爲一書而加以論
斷者有之自此書始故水心推爲三家之外自出新
義爾雅獨至也是書初刊于同甫當在淳熙中再刊

于嘉定三刊于至元惟王顯仁所見之嘉定刊本譚卿月序不全又未細釋陳序遂題爲沈先生春秋比事其誤蓋始于陳直齋而成于王顯仁同甫不任咎也文淵閣著錄春秋比事兩部亦題文伯名蓋皆元刊惟都穆所見之本譚卿月序完全當爲嘉定刊耳安所得譚序完全者一証明之經義考亦不載譚卿月序又引吳師道說謂沈斐字文約衢人未知何據

作雇立三糸足先三

四

春秋集傳跋

春秋集傳二十二卷題曰張洽集傳前有端平二年七月朝奉郎直祕閣主管建康府崇禧觀賜緋魚袋張洽進狀後有綱領進狀後有延祐甲寅李教授捐俸補刊于臨江路學兩行未有木記五行云路學所刊集傳無綱領庭堅延祐甲寅承命校正遂以此請李廣文並刊方爲全書諸費皆廣文自爲規畫不申支不題助故事成而人不知第集註沿革未刊庭堅繼今圖之百拜謹識每葉二十二行每行二十二字影寫元刊本經頂格集傳低一格自爲之說又低一

格經宗左氏而注公穀異文于下諸家之說可以證明而不以爲主者雙行注于下原本二十六卷宋史不著錄文淵閣書目有集注而無集傳天一日同

四庫未收經義考注佚其罕見可知矣嘉慶中吾鄉嚴久能先生從杭州汪氏得元槧本缺卷十八二十卷二十三至二十六共七卷自爲之跋又屬盧抱經爲之跋後爲何夢華以十三經注疏易去久能手錄一部又爲之跋見悔庵文存卽阮文達錄以進呈者也此本乃張秋水從嚴氏元本傳錄者秋水有手跋見皕宋樓藏書志庭堅爲治之曾孫尙有後序見經

義攷此書失載蓋當時二書並行先刊集傳後刊集
注後序當載于集注後李教授名萬敵見庭堅後序
修能未見後序故惜其名不傳

春秋講義跋○

春秋講義四卷宋戴溪撰傳抄永樂大典本明文淵閣書目載有戴少望春秋講義一部注曰四冊闕當卽據以採入大典者提要云嘉定癸未五月溪長子桷鋟木金陵學舍沈光序之寶慶丙戌牛大年復刊于秦川其序稱是書期于啟沃君聽天下學士不可得而聞云云是大典本必有沈光牛大年兩序此本從文淵閣傳錄缺沈牛兩序其爲採輯時漏錄抑或願置浙江時漏錄則不可知矣安所得借善本而補完之程端學春秋或問黃東發日抄頗推重之惜不全耳

春秋集義跋

校正李上舍經進春秋集義五十卷綱領三卷次行
題後學巴川王夢應蓋李明復著而王夢應所校刊
者也前有嘉定十三年山陽度正序十四年魏了翁
序及李俞進書表諸家姓名事略俞里貫提要已詳
茲不贅所採周子二程子張子范惇夫謝顯道楊龜
山侯思聖尹和靖劉質夫謝持正胡康侯呂東萊胡
五峯李愿中朱子張南軒之說凡十七家十六家皆
有事略張子獨無不可解也其書以濂洛爲宗故胡
安定之口義孫莘老之經解經社要義孫明復之尊

王發微春秋總論劉公是之權衡意林崔子方之本
例經解王哲之王綱論蘇穎濱之集傳呂居仁之集
解蕭子荆之辨疑雖全書具存亦皆不採蓋一家之
學也

春秋說跋

春秋說三十卷宋洪咨夔撰傳抄永樂大典本前有
自序隱元年說云卽位或書或不書行卽位之禮則
書公之不書以攝自詭而禮不行焉自有天地以來
君位無代匱者堯老舜攝實則相堯周公攝政成王
已立以攝欺天下自公始世子必誓于王公非所誓
國統必屬于父公非所屬始求遜國之名終盲擅國
之利作僞日拙隱之心迹敗矣云云其說本之唐盧
仝春秋摘微未免過爲刻論我

高宗純皇帝所以特箸書事以正之乎平齋箸此書時正

爲奸臣李知孝梁成大所劾罷官家居目擊權臣竊柄國是日非其辭過激蓋有由也平齋行狀爲吳潛撰大典附錄于後惜此本已佚之矣

影宋抄春秋分紀跋

春秋分紀九十卷前有淳祐三年南充游侶序開禧
二年程公說自序淳祐三年程公許序劉後溪光祖
撰公說墓志每頁二十行行二十字每卷有目連屬
篇目尙存宋本舊式首爲例要其目曰名諱例曰說
綱領曰叙傳授年表之目十卷一至四曰周天王內
魯外諸侯年表卷五曰王后曰內夫人曰內妾母曰
王姬曰內女卷六曰魯卿卷七曰晉卿卷八曰宋卿
卷九曰鄭卿世譜之目十四卷十曰王子王族諸氏
曰諸臣名譜曰魯公子公族諸氏曰雜臣名譜曰婦

人名曰孔子弟子譜卷十一曰晉齊公子公族諸氏
卷十二曰宋衛蔡陳公子公族諸氏卷十三鄭曹燕
秦公子公族諸氏卷十四楚吳公子公族諸氏皆附
雜臣名譜卷十五十六曰世譜敘篇攷異名譜之目
五卷十七曰列國名臣曰外夫人妾曰外公女卷十
八曰古人物曰四夷書之目七卷十九至廿二曰歷
卷廿三廿四曰天文卷廿五至卅五日彊理書卷三
十七三十八曰禮樂卷三十九曰征伐卷四十一至
四十四曰職官卷四十五四十六曰周天王卷四十
七至五十二曰內魯卷五十三至五十八晉世本卷

五十九至六十一齊世本六十三宋世本六十四六
十五衛世本六十六蔡世本六十七陳世本六十八
至七十鄭世本七十一曹世本七十二燕世本七十
三秦世本七十四至七十七楚世本七十八吳世本
七十九曰杞滕薛莒八十曰邾小邾越許八十一公
爵四國八十二侯爵十二國八十三伯爵十國八十
四子男爵十七國八十五有爵無姓六國八十六有
姓無爵三十國卷八十七爵姓俱無三十國卷八十
八至九十曰四夷附錄始于驪戎而以肅慎終焉游
侶序謂其書仿史記而作年表仿十二諸侯年表世

譜仿功臣王子侯年表世本仿世家惟既仿史記則周天王宜仿本紀魯宜列世本之首次國小國亦宜爲世家乃周天王魯及次小國獨否何也彊理志每國有指掌圖頗爲詳核其所論辨如謂似褒非國名州來非兩地皆足証杜預釋例釋地之誤預之春秋世族譜爲釋例之一今永樂大典所採寥寥數條顧啟期春秋世系今已失傳伯剛皆見全書世譜攷異屢引之世族譜可補今本釋例之缺世系可藉是以見涯略其敘傳授曰以聖經爲本而事則案左氏左氏近誣則采公穀及先儒義之精文句有未安則用

啖趙例頗加刪削論述大綱本孟氏而微詞多取程
胡之論可以見其宗旨矣獨念伯剛年止三十九所
著自此書外又有左氏始終三十六卷通例二十卷
比事十卷語錄二卷訓一卷程氏大宗譜十二卷余
三十五歸田欲著之書不下數千卷年近周甲精力
日衰已成而付梓者未及千卷讀伯剛書不能無慨
然也



三

二

明抄春秋纂言跋

春秋十二卷總例七卷題曰吳澄學明抄本纂言以一公爲一卷卷首不著書名卷數惟每卷之末題春秋纂卷幾而已總例蓋仿陸淳纂例而爲之一天道二人紀三嘉禮四賓禮五軍禮六凶禮七吉禮亦不題卷數格式抄手似在嘉靖刊本以前或從祖本傳錄者其書年爲一行春夏秋冬各爲一行皆頂格月日各爲一行皆低二格經之缺文可推測而知者如桓公三年至八年十一年至十七年春首月不書王之類皆于正月上作一方格四年不書秋冬首月則

秋冬二行各于頂格爲方格七月十月則低二格爲
兩方格其不可推測如郭公之類則仍舊而爲說于
下此注春秋之創格也經文以左氏爲主公穀異文
注於下每年以大衍歷審其月大月小而推明經所
書日之干支爲月之某日所採諸家傳說左氏公穀
陸氏啖氏趙氏杜氏預張氏治高氏問爲最多胡氏
劉氏高郵孫氏襄陵許氏次之先採舊說後審已說
者以澄曰別之經下卽審已說則否直齋書錄解題
廣德軍刊古監本春秋經每事爲一行朱子于春秋
獨無論注惟以左氏經文刊之臨漳晁氏曰春秋經

十二卷以左氏經爲本其與公穀不同者注于下是書每事爲一行公穀異文注于下當本諸此每冊有張雋之印白文方印案雋字非仲吳江人一名僧願又字文通樓居積書甚富手錄者千餘卷擁列左右南潯莊廷鑑聘修明史爲作有明理學諸儒傳其稿別行名與斯集史案未發自知其非逃于僧舍年已七十後與潘耒章吳炎諸人同伏法于杭州箸有西廬詩草四卷見南潯鎮志文淵閣書目有三部一注十冊完全一注十冊殘缺一注十六冊殘缺元刻今不尋見明嘉靖間蔣若愚刊本流傳亦罕朱竹垞僅

于吳醫陸其清家見之

四庫所收乃兩淮鹽政所採進提要謂從陸本傳錄此則爲康熙初張雋所藏非卽竹垞所見之本未知與

四庫本傳自陸醫者何如也

足本春秋讞議跋

春秋讞議十二卷題曰吳郡後學王元杰集讞影寫元刊本每頁十八行每行二十字

四庫所收據浙江汪啟淑家藏本至卷九止卷十卷十一卷十二全缺此本十二卷完善無缺洵爲難得于文傳序云若夫天人相與之厚古今事物之變微辭奧義何敢窺聖學之淵微其于尊君父之大倫正人心之大義典章制度之正是非善惡之公舉而措之未必無涓埃之助云云蓋亦持平之論也

春秋魯十二公年譜跋

春秋魯十二公年譜一百四十八葉不著撰人姓氏
格心有鮎鯨亭三字蓋全謝山先生从永樂大典抄
出以貽馬曰璐者前有謝山跋其書所採杜征南釋
例長厯程伯剛分記之外尙有吳草廬春秋纂言當
爲元人所著明文淵閣書目黃俞邵千頃堂書目錢
竹汀補元史藝文志皆不著錄究出何人之手不可
攷矣

元槧春秋諸傳會通跋

春秋諸傳會通二十四卷題廬陵進士李廉輯前有
摹刊至正九年廉手書序下有印曰李氏行簡序後
有至正辛卯臘月崇川書府重刊木記兩行次凡例
十條次讀春秋綱領次杜預左傳序何休公羊傳序
范甯穀梁傳序程子序胡氏傳序胡氏進春秋表樓
鑰陳氏後傳序每頁二十四行每行二十二字小字
雙行其集諸家之說先左氏次公羊次穀梁次胡氏
次陳氏次張氏胡氏者胡安國春秋傳也陳氏者陳
傅良春秋後傳也張氏者張洽春秋傳也皆以墨質

白章別之左氏用杜注公羊用何注穀梁用范甯皆兼及疏自下已意者又低于六家說二格以案字別之程朱諸說及制度之應攷究者是非之應辨正者皆見于案語之下注疏以小字墨質白章別之或以方園圍之三傳異文注于經文之下

四庫提要稱其權衡事理得比事屬辭之旨誠篤論焉案廉字行簡安福人至正二年進士仕爲贛州路信豐令元季兵亂洞獠時出剽掠廉立伍相保守郡境以甯紅巾賊奄至以死守衆潰遇害其子敬嗣父官亦力戰死邑人爲立雙節祠見豫章書據廉自序

揭恭初刻在至正九年此本木記有至正辛卯重刊
字則又至正十一年所重刊非揭恭所刊之本也

元槧春秋屬辭跋

春秋屬辭十八卷題曰新安趙汭學前有宋濂序汭自序及識語後有洪武元年程性跋每葉二十六行每行二十七字版心有字數及刊工姓名間記刻板之月卷十五後有前鄉貢進士池州路儒學學正朱升校正學生倪尙誼校對金居正覆校三行程性跋云商山書塾刻是書自庚子訖癸卯刻版一百十片至甲辰告成案庚子爲至正二十年甲辰爲至正二十四年程性跋雖作于洪武元年版則元代所刊也字皆趙體刻手甚工卽通志堂刻本所祖

元槧春秋左氏傳補注跋

春秋左氏傳補注十卷題曰新安趙汧學每葉二十
二行每行二十四字注雙行版心有字數及刊工姓
名前有汧自序商山書塾與屬辭同刻始于至正庚
辰乙巳畢工見程性跋其書出經文一句而補注于
下雖以陳止齋春秋章旨爲宗兼採孔氏穎達劉氏
敞葉氏夢得諸家之說附益之至名物度數訓詁地
理固不若近儒之精也朱竹垞經義攷有汧門人金
居敬總序此本已缺

春秋師說跋

春秋師說三卷題曰新安趙汭編前有汭序行款字數版心皆與春秋屬辭同至正甲辰南山書塾與左傳補注同刊見程性跋附錄上爲黃澤所作思古今六經辨說補注序易學濫觴春秋指要序附錄下已缺以目錄攷之知爲黃楚望行狀耳至正庚寅迄今五百五十餘年三書完具如新可貴也

蘭雪堂本春秋繁露跋

春秋繁露題曰漢董仲舒撰前有慶厯七年樓郁序
後有崇文總目中興館閣書目郡齋讀書志六一先
生書後程大昌書後清熙乙未闕名跋每頁十四行
每行十三字版心上有蘭雪堂三字下有刻工姓名
間有活字印行四字書名題名篇名皆大字餘皆雙
行以漢魏叢書本校一過卷十三多四時之副第五
十五一篇人副天數第五十六多篇首天德施地德
化云云三百九十六字卷十六止雨第七十五皆齋
三日下多各衣時衣云云一百八十字卷十二陰陽

終始第四十八至于冬而止空虛下多太陽乃得兆
就云云二十四字皆與永樂大典本合卷十六求雨
第七十四他皆如前下秋暴巫上與神農求雨第十
九日戊巳不雨命爲黃龍又爲大龍社者舞之李立
之夕曰東方小僮舞之南方牡者西方沾未詳北方下疑
少一人舞四十餘字相連屬篇末女子欲和而樂下
接神書又曰開神山神淵積薪夜繫鼓譟而燔之爲
其旱也二十三字是宋本已如此矣續漢志注所引
無神農求雨以下四十餘字當有刪節盧抱經刊本
遂據以削之並改神書又曰二十三字爲小注未免

喧賓奪主矣此外字句之間頗有勝于大典本者如求
雨七十四其神后稷祭之以母飪五各本皆脫母飪
二字大典本亦同此本不脫與劉昭續漢志注杜氏
通典同其一端也蓋大典本雖與此本同出宋本大
典本轉輾抄錄脫譌在所不免此則以宋本摹印奪
譌自少宜乎近來藏書家與宋本同珍也大典本有
樓鑰胡桀二跋此本無之攷黃氏日抄樓攻媿校本
嘉定中胡槻刻于江東漕台其後岳珂又刻于嘉禾
郡齋或大典本出江東漕台此本以嘉禾爲祖歟文
淵閣書目有春秋繁露三部一注三冊完全其二注

三冊缺當皆宋刻不知猶在人間否

宋槧纂圖互注禮記跋

纂圖互注禮記二十卷宋槧本每頁二十二行每行
二十一字小字雙行每行二十五字格闕外有篇名
卷數葉數匡胤恒貞桓構慎讓等字皆避缺惟溫柔
敦厚之敦愷行之愷棺槨之槨不缺當是孝宗時刊
本前有篇目一葉禮記舉要圖二十三頁圖凡二十
有九曰王制商建國圖曰周制建國之圖曰天子縣
內圖曰方伯連帥圖曰王制九命之圖曰公卿大夫
士圖曰月令十二律管候氣圖曰月令所屬圖曰月
令四季昏星圖曰十二律還相爲宮圖曰袞冕裘衣

制圖曰韞制度圖曰帶制度圖曰元端冠冕制圖曰
委貌錦衣制圖曰曲禮師行圖曰玉藻雜佩圖曰童
子服圖曰三加冠圖曰冠冕制圖曰器用制圖曰深
衣圖上曰深衣圖下曰天子五學之圖曰天子大射
之圖曰天子習五戎圖曰五服之圖曰司馬溫公五
服之圖曰禮記傳授之圖篇名在前次題禮記鄭氏
注猶存唐石經舊式經文大字注雙行次陸德明釋
文凡陸有而注無者以陸曰二字別之釋文所出之
字以圓圍之次重言重意次互注凡與禮本經辭不
同而意同者謂之重意如毋不敬下引哀公問君子

無不敬之類是也文義皆同者謂之重言如坐如尸
下云坐如尸二一見玉藻第十三又見少儀尸則坐
是也文意與他經相同者謂之互注如檀弓魯哀公
誅孔子曰下引左哀十六年傳是也皆無關大義以
備場屋帖經之用而已疑爲書坊所爲惟雕刻甚精
字兼歐柳所據乃當時善本與唐石經十行本正義
大略多同如緇衣章義瘧惡不作章善瘧惡之類是
也所引釋文有與葉林宗影抄本同者如舊扶死反
不作扶允呼困反不作呼困是也余所見所藏宋刊
禮記不下四五本此本當在十行本正義之上與撫

州公庫本相伯仲所據釋文在通志堂刊之上亦與
葉林宗影宋本相伯仲阮文達作校勘記亦未得見
此本也

儀顧堂續跋卷四

歸安陸心源伯剛父

元槧禮記纂言跋

禮小戴記三十六卷題曰臨川吳文正公纂言前有目錄題曰臨川吳澄幼清敘次後有元統甲戌門人吳尙跋每頁二十行每行二十二字經頂格註低一格蓋是書初刊本也觀澄自序蓋本朱子與呂伯恭商訂之意而爲之其篇次不依舊第以一篇爲一卷曲禮一內則二少儀三玉藻四深衣五月令六王制七文王世子八明堂九喪大記十雜記十一喪服小

記十二服問十三檀弓十四曾子問十五大傳十六
間傳十七問喪十八三年問十九喪服四制二十祭
法二十一郊特牲二十二祭義二十三祭統二十四
禮運二十五禮器二十六經解二十七哀公問二十
八仲尼二十九孔子閒居三十坊記三十一表記三
十二緇衣三十三儒行三十四學記三十五樂記三
十六以大學中庸程朱表章爲四書投壺奔喪爲禮
之正不可擠之于記冠義昏義鄉飲酒義射義燕義
聘義六篇正釋儀禮別爲傳附儀禮後故皆不列凡
先列前儒之說而後下己意者以澄曰別之經下不

列舊說則否吳尙跋述澄之言曰吾于禮記纂言凡
數易彙益亦多所發明而月令檀弓尤爲精密若月
令言五時之祭所先不同天子所居每月各異檀弓
申生之死延陵季子之哭曾子之易簣子思之母死
于衛子上之母死而不喪數節是皆諸說紛紜不合
禮意研精覃思証之以經裁之于理自謂可無悖戾
云蓋草廬頗亦自喜其書危素草廬年譜謂書成于
至順三年虞集作行狀謂成于至順四年吳尙跋有
云先生親自點校未畢而捐館與虞集說合付梓時
草廬之甥周濂孫吳當及尙司校訂之役而宋元學

案不列濂尚二人之名亦缺典也卷中有毛晉字子
晉一名鳳苞字子九白文方印汲古閣三字白文方
印海虞毛氏秦叔圖書印朱文方印毛晉之印朱文
方印子晉父白文方印毛表朱文方印字秦叔白文
方印虞山毛氏汲古閣收藏朱文方印季振宜藏書
朱文長印毛晉之印白文方印字子晉朱文方印御
史之章白文方印季振宜印朱文方印滄葦朱文方
印蓋先爲毛子晉所藏分授其子表表不能守歸之
泰興季振宜道光中歸于上海郁氏余从郁氏得之
雕刊工整字皆趙體元刊之最精者

元覆宋槧本四書跋

大學一卷中庸一卷題曰朱熹章句大學或問一卷
中庸或問一卷題曰朱氏論語十卷孟子七卷題曰
朱熹集註論語版心或題晦菴註孟子等字大學版
心題晦菴大學中庸版心題晦菴中庸章句前有刻
四書凡例每卷後有音考每頁十四行行大字十五
小字雙行版心有字數凡一節之義一章之旨一篇
之凡皆有旁抹經中衍文依朱子孝經刊誤之例子
字之外加圓圈誤字加方圈主意字眼則加上下圓

左右直之圓注中宋人避諱改用之字則加方圓段則以畫句則以圓蓋元時常州刊本其圓抹之法兼取勉齋黃氏北山何氏魯齋王氏導江張氏諸本之長音攷則宣城張師曾所爲也見楊士奇東里續集卷中有周笈私印白文方印毘陵周氏九松迂叟藏書記朱文長印周良金印朱文方印案周良金自號九松迂叟嘉靖中常州藏書家也

北宋槧說文解字跋

說文解字十五卷題漢太尉祭酒許慎記銀青光祿大夫守右散騎常侍上柱國東海縣開國子食邑五百戶臣徐鉉等奉敕校定宋槧宋印本後有徐鉉進表雍熙三年牒每頁二十行每行大字二十小字雙行每行三十字不等版心有大小字數刊工姓名間有重刻之頁版心有重刻字恒貞等字皆不缺蓋真宗時刊本也後有阮文達隸書手跋云毛晉所刊卽據此本凡有舛異皆毛扆妄改愚謂平津館所刊卽祖此本行欵匡格皆同孫淵如作序謂毛刊祖大字

本與阮說不同以今証之似以孫說爲是卷中有青
浦王昶字曰德甫白文方印一字述菴別號蘭泉朱
文方印大理寺卿朱文方印經訓堂王氏之印朱文
方印阮元私印白文方印卽百宋一廬賦所云王司
寇極加寶貴者也段懋堂大令作汲古閣說文訂亦
以此本爲據其善處已詳言之矣

宋本廣韻跋

大宋重修廣韻五卷前載景德四年勅牒次大中祥符元年勅牒次陸法言序次長孫訥言箋注序次孫愐唐韻序後有雙聲疊韻法六書八體辨字五音法辨十四聲例法辨四聲輕清重濁法每葉二十行每行二十字小字雙行每行廿七八不等宋諱立朗匡胤昴禎皆缺筆徵頊佶桓皆不缺蓋仁宗時刊本版心有字數刻工姓名每卷後有新添類隔今更音和切數字以張氏澤存堂刻校一過乃知張氏所據與此本同而有增有改有缺有誤其改者如卷一東字

下齊有七友宋誤土支四江蹤短矛也宋誤打鐘鼓也之類其增者如十二齊嵩上同又子嵩鳥出蜀中張于嵩上增鶴文而以子嵩鳥出蜀中六字屬之以上同二字屬嵩六脂紙下補岷文卷三二十四緩牂下增餘文之類其缺者如辨四聲輕清重濁法宋本朱之余反朱亦也張本缺留墨釘宋本紬真流反紬布也張本亦缺留墨釘之類其譌者如辨四聲輕清重濁法朱張本譌生并補盈切補張本譌府之類愚謂張所改大抵以元版廣韻爲本宋刻有譌改之是也至嵩說文周燕也从佳少象其冠也尙聲鶴乃後

出俗字況元刻及明內府本張力臣校刊本嚮上皆無鸛字乎板本飯之俗字粹餽二字更後出有粹字矣何必更有餽字岷字見十二齋何必又見于六脂此皆增所不應增者也其他所增亦類此者多近見黎蕤齋覆刊東洋町田久所藏宋本與此本無一不同末三頁此本有刊工魏奇等名黎本失摹耳張刻頑徵恒桓皆缺筆與此本不同蓋張氏所見之本乃徽宗時印本經後人挖改廟諱此則猶仁宗時印本也惟黎所據之本桓字不缺避而敘目云避至桓字止何也

馮已蒼手鈔汗簡跋

汗簡七卷前有自序次七十一家事蹟卷七爲略敘目錄後有李直方跋及圖画見聞志潘遠紀聞周越法書後苑劉向別錄四條鄭思肖隸書跋每葉十四行後有已蒼手跋言崇禎十四年借山西張孟恭藏本歲乙酉避兵城西之洋蕩村以二十日錄畢與康熙中汪立名刊本字迹少有參差汪本出自曝書亭移目錄于首此本目錄在卷七猶存漢人舊式有虞山錢曾遵王藏書朱文長印卽敏求記所著錄後歸愛日精廬者

元槧廣韻跋

廣韻五卷前有陳州司馬孫恂廣韻序序後有木記
兩行文曰至正丙午菊節南山書院刊行每葉二十
四行每行小字二十五大字約十五六元刻元印本
也明永樂甲辰廣成書堂宏治壬子詹氏進德精舍
皆有翻本行款悉同而刻工甚劣譌謬更多又別有
至順庚午刊本每頁二十六行每行約十八九字小
字雙行每行三十字序末有至順庚午敏德堂刊本
記及辛酉菊節後十日印七字又有建安余氏刊本
行款與至順本同而板式縮小似巾箱本末有建安

余氏雙桂書堂鼎新鋟梓本記注更多刪節均不如
此本之善也以黎純齋新覆泰定乙丑圓沙書院本
校一過行款版式無一不同而此本微有奪落蓋泰
定乙丑前乎至正丙午四十二年當爲此本所祖宜
乎奪譌較少矣明內府本每頁十八行每行小字三
十三顧亭林校刊本每頁十六行每行小字廿四似
皆非元版行款是書相傳以爲陸法言原本朱竹垞
以爲卽重修本而爲明中涓所刪削提要據明德堂
刊駁之足以執竹垞之口不意元刊竟有五六本之
多也

續古千文跋

續古千文一卷題曰左朝散大夫知池州軍州事賜
緋魚袋侍其良器撰趙希弁讀書附志續千文一卷
侍其瑗字良器所箸也昔周興嗣次王逸少所書千
字爲韻語以便觀省後世謂之千文良器遷避興嗣
所用字別製千字以續之山谷嘗報以書曰引辭連
類使不相觸甚有功當與凡將急就並行也葛文康
公爲之序愚案良器名瑗一作瑋蘇州長洲人漢廣
野君之裔賜氏食其後有仕武帝爲侍中者因又合
官與氏而稱侍其家世以武顯祖憲始自建業遷長

沈良器獨習儒學皇祐二年進士調杭州富陽主簿
改開封陽武府尹包孝肅極材之檄攝右軍巡判官
有亡命卒坐剽金論棄市良器訊其情白尹平之累
知建德固始永豐縣通判全州擢化州移知池州致
仕性請退止足孤立介特以質謹自將不媚權近仕
進淹映一不綴懷嗜聚書自少迄老未嘗一日不觀
工草隸善屬文賦詩尤多製續古千文行于世崇甯
三年卒年八十三見葛勝仲丹陽集侍其公墓誌此
本佚勝仲序今據丹陽集補錄子鉉字希聲以父任
入仕官至知徽州亦見丹陽集

影宋羣經音辨跋

羣經音辨七卷題曰朝奉郎尚書司封員外郎直集
賢院兼天章閣侍講輕車都尉賜緋魚袋臣賈昌朝
撰前有寶元二年中書門下牒及昌朝自序後有康
定二年奉旨管勾雕造銜名及慶厯三年雕造進呈
平章章得象樞密使晏殊參知政事賈昌朝范仲淹
諸臣銜名紹興壬戌知汀州甯化縣王觀國後序汀
州鏤版諸人銜名及紹興九年臨安學重雕知臨安
府張澄等銜名每葉十六行每行大字十四小字雙
行不等版心有字數及刻工姓名前有毛晉之印朱

文方印子晉朱文方印希世之珍朱文方印以澤存
堂刊本互校開卷卽見張刻之謬雕印進呈諸臣銜
名稱臣乃奏進之體中書門下牒則上行下之文故
平章參知五人姓而不名宋本張章程王李諸人之
上無臣字張刊于每人官銜之下姓之上各加臣字
蓋後人見進呈名銜有臣字而妄加張氏不察遂以
付刊耳此外張本誤脫如卷一北未誤北末祭享神
也享誤亨傍失切傍誤旁薦薦子誤薦莓子藏物之
府也藏下物上行藏字居利切利誤例倚閭倚誤踣
以犴皮飾射侯也射下脫侯字必卽天倫卽誤明卷

二學覺也學教也學皆誤歟禮惟學學半禮誤書息
遺切遺誤進其俱切其誤具烏尼尼誤夷舊本作脊
脊誤臂膊磔也上脫膊肱也補各切六字以簪卹勿
軀簪上行策字勿下脫驅字卷三戎地也地下脫也
字入實切實誤質期後時也後下脫時字栗裂也裂
誤烈上旅下旅誤作上於下旅木石之怪也石下脫
之字歎怒也怒誤恕音賤誤音踐卷四古郎古誤苦
辟遵也遵誤違子惟切惟誤誰駟牡馬也牡誤壯羊
胃切胃誤胃音治誤音溢束衣也衣誤本卷五辨方
免方誤皮佛備也備誤輔婉槁滌隨槁誤橋夏后氏

之繆練繆誤綢又逋菩菩誤善絮調也調誤捕古者
諸侯出師古字下脫者字丹朱中衣誤丹中朱衣繆
縊也縊誤謚紹緩也緩誤援隋祭神食也隋誤隨注
同壤自敗也敗誤毀卷六尼据切据誤許重再也再
誤更爲調絮曰和絮誤繁徒聊切徒誤調諸侯爲天
下脫子守土曰守是以天八字卷七天子詩也詩誤
樂肌膚若冰雪下衍冰雪三字此龜屬鳴者也屬誤
胃又衍而字祁當作麋脫作字雕印進呈諸臣銜名
晏殊銜名戶字上脫一百二字後序眞奇殆絕眞誤
直海內又甯又誤又號稱難治號誤号此外筆畫之

殊更難枚舉蓋張氏所祖抄本受之朱竹垞欲借汲古南宋本子晉秘不肯出而別示以抄本張氏卽據以校改付雕蓋別本亦出宋本改易行款照錄而非影寫又經妄人屢改故脫誤如此

宋本九經補韻跋

九經補韻題曰代郡楊伯喆彥瞻集宋麻沙刊本每頁二十六行每行二十八字前有嘉定十六年伯喆自序後有淳祐四年文林郎衢州州學教授俞任禮跋案伯喆字彥瞻楊和武恭王沂中曾孫博聞彊記下筆驚人雖治郡叢劇手不釋卷嘗與竹坡呂午唱和淳祐七年以吏部郎官提點兩浙刑獄八年除樞密院檢詳文字見會稽續志紹定辛卯游九鎖山幽岩壑谷無所不歷見六帖補呂午序俞任禮跋洞霄圖志

影宋抄方言跋

輶軒使者絕代語釋別國方言十三卷前有郭璞序
慶元庚申李孟傳序朱質跋後附劉歆書每葉十六
行每行十七字注小字宋諱有缺筆蓋從慶元刊本
影寫者卷二秦有榛娥之臺不脫秦有二字顙鏤肝
揚睖雙也睖不譌睖卷三斟協計也協不訛協魯齊
之郊謂之蕘郊不譌閒諱罪也諱不譌諱卷四袒飾
謂之直衿衿不譌衿注婦人初嫁下無所箸上三字
及音袒二字自關以西秦晉之郊曰絡頭以不譌而
卷五或謂之環下不衍環字或謂之荈注今云荈筏

蓬也蓬不譌蓬卷六謂之聾注言聾無所聞知也聾
不譌耻卷八鵠音域域不譌或卷十膊兄也注此音
義未詳此不譌皆卷十一南楚之外謂之蠺蟬注亦
呼虺蛸虺蛸不譌吒咄卷十二臧臧也臧不譌臧從
肉不從日卷十三𪔐刻也𪔐不譌𪔐戴東原作方言疏証
往往以曹毅所藏宋本爲証與此多同當卽從曹毅
所藏宋本出者

影元抄平水韻略跋

新刻平水韻略五卷前有至大六年河間許道古眞序聖朝頒降貢舉三試程式二葉壬子新增分毫點畫正誤字三葉壬子新雕禮部分毫字樣二葉每頁二十六行每行大字十六小字三十二每韻後有新添重添之字以黑質白章隔之卷五後有木圖記二行其文云大德丙午重刊新本平水中和軒王宅印影寫元刊本貢舉程式內迴避廟諱據延祐元年中書省咨試期稱皇慶三年與元史選舉志合是韻略刊于大德中皇慶延祐續有增添矣點畫正誤內有宋

諱殷溝脊敬等字則所謂壬子新增者亦必皇慶壬子而非宋之淳祐壬子竹汀偶未細攷耳許道古真序云書于嵩郡隱者之中和軒而印書之王宅亦曰中和軒豈道古之序書于王宅耶抑王宅襲道古軒名耶三場程式內載章表迴避至一百八十餘字之多婦駕仙靄服布孝思過改空忽掃慕出祭饗夢缺落典憲法遷塵亢蒙隔離去辭追考板蕩荒古述師剝草睽違皆在迴避之例此則歷代所未有也考試程式蒙古與漢人皆不同鄉試二場蒙古人策限百字漢人限千字會試二場蒙古試時務策漢人辭賦

御試漢人策千字蒙古五百字皆足補元史選舉表之缺元史太宗紀八年丙午夏六月耶律楚材請立編修燕京經籍所於平陽編集經史召儒士景陟充長官以王萬慶趙著副之中和軒王宅或卽萬慶後人歟

影宋抄押韻釋疑跋

紫雲先生增修校正押韻釋疑五卷題曰廬陵進士
歐陽德隆釋疑紫雲山民郭正己校正影寫宋景定
本每頁十八行每行大字十六雙行小字二十四前
有紹定庚寅袁文靖序景定甲子郭守正序江西通
志進士表無歐陽德隆名或領鄉解而未第進士猶
孫季昭之稱進士歟紫雲山在江西安仁縣西北三
十里則守正必安仁人疑爲平水書籍王文郁錢唐
書肆陳思之類書中有錢曾之印白文方印遵王二
字朱文方印蓋述古堂舊物也

元槧韻會舉要跋

古今韻會舉要三十四卷附禮部韻略七音三十六
母通攷一卷題昭武黃公紹直翁編輯紹武熊忠子
中舉要前有劉辰翁序熊忠序字朮魯翀序余謙跋
韻例七條音例五條字例十四條義例五條以三卷
爲一冊首行書名下有甲至癸十字公紹字在軒邵
武人咸淳元年進士著有在軒集其爲韻會也蓋以
禮部韻略訓釋簡略博攷經史旁及九流百家增其
注說又採異體異義辨其正俗以爲饋貧之糧而已
其於禮部韻略九千五百九十字及續降補遺三百

四十四字之外則無增也至熊忠而刪其注說之繁
重增其韻字之遺漏其以毛晃韻增者一千七百一
十字曰毛氏韻增以平水韻增者四百三十六字曰
平水韻增以經史子集可備引用增者六百七十七
字謂之今增而後在軒原本有增有刪矣熊忠序云
在軒黃公公紹作古今韻會本之說文參以籀古隸
俗凡將急就旁行敷落之文下至律書方技樂府方
言靡不悉究而又檢以七音六書凡經史子集之正
韻次音叶音異辭與夫事物倫類制度纖悉莫不詳
載僕館公門竊承緒論惜其浩瀚四方學者不能徧

覽增以毛劉二韻及經傳當收未載之字別爲舉要
一編是則書中繁徵博引每字以五韻分清濁及以
說文本字爲正而注明古作某本作某或作某通作
某以及今刪今正今仍者皆公紹原本惟毛氏韻增
平水韻增及今增者則出熊忠手耳楊升庵以舉要
爲公紹舉書林韻會之要固謬或以韻會別爲一書
而非舉要者亦未細讀是書矣熊忠序後有陳杲識
云昨承先師架閣黃公在軒先生委刊古今韻會舉
要凡三十卷古今字畫音義瞭然在目今繙諸梓三
復校讎並無譌誤是則舉要付刊亦出在軒之命蓋

忠本在軒門客謂舉要亦在軒作亦何不可乎蓋公
紹在時已命陳杲刊版尙未經文宗御覽余謙點校
者故曰係私著之文已經所屬陳告禁約也至文宗
見葛元鼎寫本命余謙以刊本點校非未見刊本也
觀余謙跋可見字尤魯翀序所謂刊本快覩者將謂
刊余謙所校之本非謂以前無刊本也此本當是以
余謙點校本重刊者陳杲跋則以舊刊所有仍之耳
若謂卽陳杲所刊不應有字尤魯翀余謙兩序矣明
有重刊本行欵悉同惟字體小變耳


元槧說文補義跋

說文補義十二卷元刊本每頁篆文十二行約十注文小字雙行每行二十四字

四庫未收阮文達始進呈包希魯仕履已詳聖經室外集其補義頗似王荊公字說東字云東五行爲木天干爲甲乙地支爲卯乃木王之方陽谷之地日所出也故从日在木中東海有若木所謂日出樽桑蓋指事焉故日在木上則爲杲下則爲杳𨔵字曰𨔵者二曹決事在于東庭故从二𨔵指事也下从日者以言決其獄詞也工字曰上下均齊而平中直而正

規榘之象會意也有字曰从又从肉近取諸身以手
捫肉實有者也九字曰九者十之屈也申則爲十矣
降字曰申中者人之行步也自土之高者从自者由
高而至于下降之義也名字曰夕者晦昧之時也非
口自言則人不知其誰何也蓋有是人則有是名也
故从夕从口品字曰人以口計三口者其人非一也
人非一則必有等殺焉故可高下之列也二口則曰
𠂔四口則曰𠂔皆指事也諸如此類者居多其于六
書之學不如今人遠甚惟當竟尙空談之日而能研
究六書留心古籍亦可謂豪傑之士矣卷中有愛日

精廬藏書朱文方印蓋卽張月霄藏書志所箸錄者



元槧六書統跋

六書統二十卷題曰奉直大夫國子監司業楊桓明
集每葉十六行每行大約十字小字雙行每行二十
三四字不等注文多以篆體作楷頗爲古雅版心有
大小字數刻工姓名前有至大元年倪堅序門生劉
泰序及桓自序卷末有至正二年八月江浙等處儒
學提舉余謙補修一行桓之言曰許氏說文形聲最
備其餘但千百字中一字間注象形會意指事餘皆
略而不說意許氏漢人生近三代當知之其所引而
不發者欲人存心鑒飫而自求之輒不自量取古文

篆籀之存者析爲六門凡三起草而後成書以凡文字之統而爲六也故名六書統又曰小篆雖出于秦非秦勅之周室旣弱書不同文秦統一之後盡得周史載籍之正乃削諸侯之紛雜還古文之本原其言頗爲前人所未發桓元史有傳其居魯之達泉疏而爲辛泉因以自號見倪堅序則元史所不載也是書自至大元年江浙行省刊後至正時余謙補修五百餘年無重刻者明正德中其版猶存南國子監明亡始佚此猶元版元印恐此後流傳更少矣

陸師道手寫漢隸字源跋

漢隸字源五卷首有洪遵序前列攷碑分韻辨字三
例諸碑字體偏旁及當用字韻所不能載者爲附字
于後每頁十行每行約十字行欵格式與汲古閣刊
本同惟提要稱漢魏碑三百有九魏晉碑三十有一
此本碑目一卷漢魏晉并計實得碑三百有九檢之
汲古本亦同豈提要所見別一本耶抑有誤記耶附
字後有題記云嘉靖壬子十一月陸師道手錄奉衡
山先生賜覽下有師道二字朱文連珠印子傳二字
朱文長印案師道字子傳號元洲更號五湖長洲人

嘉靖戊戌進士初官工曹改禮部以母老乞歸凡十
四年後以薦起官至尙寶卿隆慶初年告歸萬厯初
卒年八十四少游文徵明之門工詩文善楷隸畫似倪
元鎮夏忠愍言稱其文賈董書鍾王見明史文苑傳
無聲詩史姑蘇名賢小紀王子爲嘉靖三十一年當
是五湖四十以後書正乞養家居時也卷中有青笠
綠簑齋藏朱文方印季振宜字詵兮號滄葦朱文方
印攷青笠綠簑齋爲雍正中長洲謝滄湄涖洲齋名
蓋康熙中爲泰興季氏所藏後歸謝滄洲者

元槧說文字源跋

說文字源一卷題曰鄱陽周伯琦編注前有至正九年伯琦自序及自述敘贊先爲篆而以楷書釋文于後每頁八行注文雙行每行二十字篆文大字每約占小字六格卷末有男宗義同門人謝以信校正十二字蓋與正譌同時所刊也

元槧六書正譌跋

六書正譌五卷題曰鄱陽周伯琦編注前有至正五年宇文公諒序十一年伯琦自序後有十二年吳當後序卷五末有男宗義同門人謝以信校正十一字每頁八行篆文約占小字六格小字雙行每行二十字元刊元印本篆文圓勁楷書遒麗蓋以伯溫手書上版者明嘉靖元年有于器之重刊崇禎甲戌有胡正言重刻本行款雖同其字迹相去遠矣
四庫箸錄之本無伯琦自序吳當後序此則元板元印之完善者

元槧六書統溯源跋

六書統溯源十二卷題曰奉直大夫國子監司業楊
桓弼集每頁十行每行篆文約占小字四格小字雙
行每行二十三四字不等版心有字數及刊工姓名
中有缺葉版心刻原缺二字恐余謙修版時已缺矣
後有自序六書統以說文爲主而益以古籀此則凡
說文所無或見于重文或見于玉篇廣韻集韻類篇
者各爲篆文分指事會意形聲轉注四門子目亦與
六書統同其意蓋以續說文自居耳天一閣書目有
六書統書學正韻而無此書似明嘉靖時已難得矣

元槧書學正韻跋

書學正韻三十六卷題曰奉直大夫國子司業楊桓
弼集與六書統六書溯源同時所刻行款字數刻工
姓名皆同卷三十六後有至正二年八月江浙等處
儒學提舉余謙補修一行元刊元印本桓旣作六書
統溯源後以二書所收之字分韻編排爲此書先篆
次隸省次譌體條理周詳字畫端整旣便檢閱亦可
正流俗之譌

儀顧堂續跋卷第五

歸安陸心源伯剛甫著

宋蜀大字殘本漢書跋

漢書蜀大字本每葉十八行每行十六字小字雙行
每行二十字版心有刻工姓名每卷有目連屬篇目
首行大題在下篇名在上題正議大夫行秘書少監
瑯琊縣開國子顏師古注玄朗匡殷敬毅竟境完桓
貞徵慎恒讓等字皆缺避桓注淵聖御名構注今上
御名與紹興初并憲度眉山重刊嘉祐七史款式同
蓋亦紹興初蜀中刊本而孝宗時修改者世所稱蜀

大字本者也存卷六十四上下六十五至六十七六十九上中以汲古本互勘知毛本錯譌極多如匈奴傳上願寢兵休士士誤事俱無暴虐俱譌居下及魚鼈下譌不輝渠侯注輝渠魯陽縣也陽譌閔案魯陽縣漢屬南陽郡晉屬南陽國北魏爲郡屬廣州今汝州魯山縣治若作閔則古今無此縣名也貳師罵曰罵譌怒欲發兵邀擊之邀譌怒死亡不可勝數亡譌于匈奴傳下願爲單于待使使譌史起亭墜注謂深開小道而行行譌而不當于匈奴稅不譌之未可以經遠也可譌必西南夷兩粵朝鮮傳西夷作南夷郎

約滿爲臣臣上衍外字重合侯得盧侯者得譌毋列
四郡四譌西外戚傳在襁褓中在譌皆王莽傳上令
天下有法令譌今王莽傳下剛卯注或用玉今有玉
玉皆譌五三年二月乙酉地震年譌月惜祇存此數
卷耳有尙寶少卿袁氏忠徹朱文方印尙寶少卿朱
文長印案袁忠徹字公達一字靜忠鄞縣人父珙精
于風鑑忠徹得其傳永樂卽位授鴻臚寺序班累官
尙寶司丞中書舍人終于尙寶少卿天順二年卒年
八十三性好學博涉多聞詩有奇氣不僅以藝名見
明史本傳及李賢袁公墓表黃潤玉袁公行狀胡儼

袁尚寶傳陳敬宗符台外集序稱忠徹退朝之暇日
與縉紳文士磨礪諷詠故其收藏亦富余所收東坡
書昆陽城賦亦忠徹舊藏也

宋槧蜀大字本後漢書殘本跋

後漢書一百二十卷首行小題在上大題在下范曄
二字居中次行題唐章懷太子賢注每卷有目連屬
正文每葉十行每行十六字注雙行構注今上御名
桓注淵聖御名與眉山刊七史行數匡格相仿當亦
紹興初蜀中所刊世所謂蜀大字者也存卷六至卷
十卷十六至十八卷二十一至二十九卷三十三至
三十六卷三十八至五十九卷六十一至六十四卷
六十至七十八卷八十二至八十五卷八十八共八
十卷以汲古閣本互勘知毛本譌奪甚多如陰皇后

傳惟予與汝與譌惟明德馬皇后傳兄廖等卽時減
削減譌滅孝仁董皇后傳爲解犢亭侯脫亭字靈帝
宋皇后傳渤海王悝譌勃以事問于羽林左監問
譌聞靈帝何皇后傳皇天崩兮后土積土積譌土積
皇女義王傳封舞陽公主舞譌武鄧騭傳連求還第
第譌弟中黃門李閏閏譌閏注況其後嗣乎下脫事
具古史攷五字寇恂傳論于寇公而見之矣脫注論
語孔子之言六字岑彭傳揚化將軍揚譌楊蓋延傳
北度泗水泗上衍泗字陳俊傳俊撫貧弱俊下衍得
字劉隆傳歲餘餘譌郡馬武傳後入綠林中後譌從

竇融傳此陽公主此譌泚馬援傳可伏牀下牀譌狀
馬嚴傳則陰盛陵陽則譌明侯霸傳與車駕會壽春
駕譌騎宋弘傳推進賢士推譌雅杜林傳嘗寶愛之
寶譌實承宮傳車駕臨辟雍脫車字趙典傳李傕之
傕皆譌僮張純傳務于無爲下脫註曹參惠帝時代
蕭何爲相國遵蕭何法無所變更十九字樂必崩下
脫注論語載宰我之言也八字曹褒傳尤好禮事事
訛士鄭玄傳禮堂寫定傳于其人定傳譌傳定賈逵
傳游情六藝情譌情張宗傳宗素多權謀素譌數度
尙傳夫事有虛實夫譌大趙咨傳大司農陳奇奇譌

稀第五倫傳體晏晏之姿晏晏譌晏然鍾離意傳所
部多蒙部譌步東海王彊傳吐血毀皆皆譌背張敏
傳徵拜司空空譌位胡廣傳政令猶汗汗譌汗袁敞
傳歷位將軍位譌爲情斷意訖訖譌其張繡傳祖文
翁文譌父矯稱卿意矯譌驕郭躬傳奉車都尉尉譌
護食邑二千戶戶譌石建寧二年甯譌武則可寄枉
直矣枉譌往楊彪傳陽球陽譌楊河間孝王開傳及
翼云翼譌儀張綱傳爲卜居宅卜譌十劉瑜傳未嘗
不投書而仰歎嘗譌敢虞詡傳出城北郭門脫城字
傳燮傳勉之下脫勉之二字張衡傳豈愛惑之能割

能譌乃周勰傳未蒙省御未譌朱荀爽傳可爲鑒戒
者爲譌謂李固傳還居黃門之官還譌遷趙岐傳箸
孟子章句孟譌要郭泰傳初泰始至南州至名聞天
下七十四字小註誤入正文許邵傳少峻名節峻譌
俊何進傳太后之妹也妹譌甥宦者酷吏方術儒林
文苑循吏逸民列傳脫目錄華佗傳病不得生得譌
能徐登傳旣而爨熟熟譌孰臨水求渡船渡譌度逢
萌傳字子康康譌慶井丹傳請丹不能致致譌制矯
慎傳少好黃老好譌學袁譚傳見憎于夫人夫譌天
任延傳造立校官造譌遣西域傳求救于曹宗下脫

宗字西夜國傳傳箭鏃傳譌傳此外注文之譌脫更
不勝枚舉也范書明刊最多有正統本有嘉靖歐陽
鐸本汪文盛本萬厯南北監本崇禎汲古閣本攷鄭
元傳爲父母兄弟所容宋景祐本紹興監本蔡琪一
經堂本元建康路本明正統本皆爲上無不字與唐
史承節所撰鄭公碑合此本作不爲父母兄弟所容
嘉靖歐汪二本萬厯南北監本毛本同則嘉靖萬厯
四本當皆从此本出汲古出于監本而譌脫更甚又
可見鄭元傳不字之妄增始于南宋矣

宋刻晉書跋

晉書一百三十卷小題在上大題在下次行題唐太宗文皇帝御撰前有貞觀二年御製序每卷版心紀志傳記各爲起訖每葉二十行每行十九字左線外有篇名匡胤恆貞桓構慎敦瞰皆爲字不成蓋南宋監本遞修至元止宋刊字體勁正版心有字數及刊工姓名元修版無且多俗體譌字明南監本謝鯤傳吾不復得爲盛德事矣句下脫去鯤曰何爲其然但使自今以往日忘日去耳初敦謂二十字此本不脫宣帝紀陸機王羲之二傳其論皆太宗自製故稱制

曰或者謂惟陸王二傳稱制曰亦不攷之甚矣音義三卷前有天寶六載天王左史楊齊宣字正衡序行款與晉書同唐東京處士何超字令升所纂齊宣之內弟也超自言仿經典釋文之例注字以朱映朱映者謂以朱勾勒之也今不可見矣所引書如字林珠叢之類今皆不傳

宋槧宋印建本北史跋

北史一百卷首行大題在下小題在上每卷有目連屬篇目自皇后列傳起每篇有目題曰某某傳低四格每葉二十行每行十八字左線外有篇名版心有字數宋諱避至敦字止蓋光宗時刊本紙白如玉字體秀勁與福建蔡氏所刊史記草堂詩箋陸狀元通鑑內簡尺牘相似當亦蔡行父文子輩所刊校讎不精譌舛所不能免在宋刊中未爲上乘然偶以毛本互校可以證譌補缺者已多如魏太武紀造新字千餘字不譌字駕次本根山次不譌自復羯兒王爵羯

不譌判今制皇族肺腑肺腑不譌師傅齊高祖紀天
柱大將軍太師師不譌史四日而至至不譌坐書背
微點背不譌皆齊文宣紀癸巳行幸趙定癸不譌發
馬子入石室馬不譌男親自臨聽自不譌身齊孝昭
紀召被帝罰者帝不譌立齊武成紀大破周軍于軹
關軍不譌宣周太祖紀歷北長城大狩大狩不譌太
守乃令蘇綽綽不譌州眾務猶歸臺閣歸不譌躍周
孝閔紀陽平公李遠李不譌子周高祖紀以應楊忠
忠不譌本周宣紀以時祭享享不譌莫隨文紀隋國
公下不奪謚曰康皇祖楨爲柱國都督十三州諸軍

事同州刺史隋國公二十四字多爲妖變妖不譌禍
陳留王傳光祿少卿不譌大夫論義感隣國不奪隣
字平陽王傳禮之明文不奪文字穆崇傳與眞撰定
碑文撰不譌選然好矜已凌物好不譌而論受事草
創之際不奪受字崔浩傳今留守舊都分家南徙都
分不譌是國聖業方隆不缺業字長孫道生傳乃切
責子弟弟不譌切長孫紹遠傳則奏黃鍾下不奪作
黃鍾三字于仲文傳回擊大破之回不譌因于宣敏
傳周祚所以靈長祚不譌士王晞傳對晞焚之焚不
譌聞鉗配甲坊坊不譌方非不愛作熱官熱不譌熱

封隆之傳子君確君靜不缺靜字封郟城子郟不譌
琰古弼傳嘉其直而有用直不譌眞張烈傳位諫議
大夫下不奪烈弟僧皓字山客歷涉羣書工于談說
有名于當世以諫議大夫二十五字袁翻傳實賴忠
良忠不譌溫祖珽傳武成于天保下不奪世字此外
形近之譌不下千餘南北監本官本大都與宋刊同
遠勝毛本惟皇族肺腑二字多爲妖變之祇撰定碑
文之撰回擊大破之回封郟城子之郟直而有用之
直諸本譌與毛本同賴此本正之每冊有季振宜藏
書朱文長印延陵宋版書目箸于錄

宋槧明修宋書跋

宋書一百卷次行題臣沈約新撰小題在上大題在下每葉十八行每行十七字版心有字數及刻工姓名紹興眉山刻七史之一有宏治四年嘉靖八年九年十年修版志第十二末有校語云聖人制禮樂一篇巾舞歌一篇按景祐廣樂記言字訛謬聲辭雜書朱鼓吹鐃歌辭四篇舊史言詁不可解漢鼓吹鐃歌十八篇按古今樂錄皆聲辭豔相雜不復可分列傳第六有云臣穆等案高氏小史趙倫之傳下有到彦之傳而此獨闕約之史法諸帝稱廟號而謂魏爲虞

今帝稱帝號魏稱魏主與南史體同而傳末又無史臣論疑非約書然其辭差與南史異故特存焉按二条北監本屢入正文官本仍之汲古本志十二連正文列傳六列于後愚謂此皆嘉祐諸臣校語也晁公武于南齊梁陳魏周各書皆言何人校上宋書獨闕今以穆等二字推之蓋鄭穆所校也穆在館閣三十年嘗編集賢院書籍見宋史本傳嘉祐校刊七史諸臣校上皆序其端此書必有穆序惟晁公武不能辨爲穆校恐紹興重刻時序已缺矣高氏小史有到彥之傳今約書仍闕則除魏書外無以小史補綴可知

更可證錢宮詹北齊攷異之非而信余言之不謬矣
約書例稱魏爲虜列傳第六張暢傳多稱魏主與南
史例同而文不同鄭穆疑非約書愚謂暢傳多與魏
臣李孝伯問答之辭非史臣之辭故言必稱魏主史
從實書不能改而稱虜未必非約原書穆說非是惟
少帝紀有稱魏主魏軍者乃約書殘闕後人以他書
補之亦非出高氏小史或取之齊冠軍錄事參軍孫
嚴宋書則不可知耳紹興周季貺太守藏有一部無
一修板有文淵閣印季滄葦印卽季氏書目所著錄
者爲明文淵閣舊物其半宋版宋印其半則元末明

初印本必有可以正今本之譌奪惜其書已歸倉父
不能借校矣

宋槧明修魏書跋

魏書一百十四卷不題魏收銜名前有臣攸臣恕臣
燾臣祖禹敘攸者劉攸恕者劉恕燾者梁燾祖禹者
范祖禹也行款格式宋諱闕避皆與宋書同眉山刻
七史之一修至嘉靖十年止卷三卷十二卷十三卷
十四卷十五卷十七卷十八卷十九上卷二十五卷
三十卷三十三卷八十二卷八十三上下卷八十四
卷八十六八十七卷九十九十一九十二卷一百一
一百二卷一百五一百六皆有校語序所謂各疏于
卷末者是也汲古本同改作雙行小字惟八十二校

語云收書列傳七十亾汲古本亾譌終卷八十七校
語云魏收書節義傳亾汲古本譌作列傳七十五終
北監本卷三卷二十七卷二十五卷八十七校語缺
餘皆同乾隆官本則列入考証矣卷十六道武七王
傳缺第十六頁嘉靖九年補刻空格一頁北監本謚
曰哀王下註闕一枚三字汲古本留黑版十行卷末
無諸臣校語嘉祐時不缺可知其缺當在宋以後嘉
靖以前矣韋閫傳末又有武功蘇湛云云者言又有
武功人蘇湛也此史家附傳通例又有武功四字宋
本在第十頁第十四行之末蘇湛二字在十五行之

首校刻北監本者誤以蘇湛爲提行別起而以又有
武功四字連屬遵弟纂傳燕郡太守下則不可通矣
卷三十八刁雍傳附其子纂遵紹獻融肅肅後復敘
遵事而後敘遵之子十三人汲古本遵傳末注云遵
字疑皆作肅謬甚然可見收書于附傳諸人本不提
行其提行者嘉祐諸人校刊之失也

魏書地形志集釋跋

魏書地形志集釋三卷題烏程溫曰鑑鐵華箸案曰
鑑字霽華號鐵華烏程監生从楊鳳苞邢典學好蓄
書並嗜金石文字收書地形志承兩漢書遺法兼載
古迹非若後代史志專載沿革曰鑑博考水經注兩
漢志晉志宋志隋志元和郡縣志太平寰宇記九域
志爲之注釋用力頗勤惟杜氏通典州郡門考訂甚
詳足與魏書相証明溫氏失收似近于陋其書初名
攷異改名攷証後乃定今名此本旁行斜上猶其手
稿也繆小山太史擬欲梓行曾錄副寄之

宋槧明修梁書跋

梁書五十六卷次行題散騎常侍姚思廉撰行款格式與宋書同眉山重刻七史之一修至嘉靖十年止惟字畫刊工均不及宋齊北齊陳魏周六書之精嘉祐崇文院本亡缺必少故每卷後無一校語然以校北監及汲古本頗有此善于彼者北監本于姚思廉銜名上加唐字可也汲古本削去姚思廉銜名不但與嘉祐校刊舊式相背與新舊唐書晁陳書目箸錄皆不合矣北監本目錄移大題在上小題在下猶可言也汲古本每卷削去大題統排卷第而于本紀列

傳之首低一格各出本紀列傳二字竟如時文目錄以學庸論孟分類可乎且毛氏所刻各史皆不如也其奪譌之甚者如卷五博覽則大哉無所與名缺博字覽譌覺卷七徐妃傳祖孝嗣大尉枝江文忠公父緄侍中文譌父緄譌他葬江陵瓦官寺下衍父字卷八昭明太子傳不使我恆爾懸心缺恆字卷三十一末頗欲綜理脫欲字綜理誤提行嗚呼下脫傷風敗俗曾莫之晤永嘉不競十二字卷三十八朱異傳遠歸本朝譌遠歸聖期賀琛傳爲歡祇在俄頃脫頃字此外一二之譌奪更難枚舉

宋槧明修南齊書跋

南齊書五十九卷次行題曰臣蕭子顯撰前有臣恂
臣寶臣臣穆臣藻臣洙臣覺臣彥若臣鞏序行欵格
式與宋書同宋諱避至構字止紹興十四年眉山重
刻七史之一也本紀策一末有校語云策文難滅星
謀疑志第十末云漆畫牽車注戍棟梁本戍作戈輿
車注戍校棟梁一本戍校作戍枝衣畫車注刺代棟
梁平乘車注刺代棟梁並疑列傳六末賴原卽大世
疑列傳二十二末云張融海賦文多脫誤諸本同列
傳三十九末云量廣始登疑案各條皆曾鞏等所記

也萬厯十年南監本仍之萬厯三十四年北監本乾隆四年官刊本崇禎汲古閣本皆無志第七缺第三頁列傳第十六缺第十頁列傳第二十五缺第六頁列傳第三十九缺第五頁嘉靖九年修板重刻第十四葉版心刻五字以補之北監南監乾隆官本所缺皆同汲古留墨版南北監及官本皆留空白其缺當在弘治以後嘉靖以前何以言之宋書有弘治四年修版此本有嘉靖修而無弘治修則弘治時不缺可知則不但嘉祐時不缺卽紹興眉山重刻亦斷無缺頁矣惟列傳第四十江南匈奴傳王士隆上空一格

北監註缺字官本同汲古本空一格若夫九種之事
有下空二格旁註缺字北監本同官本註缺二字汲
古本空二格此二處缺文恐眉州重刻已然不始于
明矣李繪傳以此久而屈沉卒毛本同惟沉譌爲況
北監本下有贈南青州刺史謚曰景九字此則必李
騰芳校勘時以北史補之耳序末列名諸臣錢竹汀
考爲錢藻孫洙孫覺丁寶臣趙彥若曾鞏而臣恂臣
穆未及愚謂穆者鄭穆侯官人字閎中曾官集賢院
校勘見宋史本傳恂疑楊恂四川人入元祐黨籍宋
史附家愿傳是本凡嘉靖八年修版六十五葉九年

修版七十一葉十年修版六十五葉宋刊尙存十分
之八

宋刊明修北齊書跋

北齊書五十卷次行題隋太子通事舍人李百藥撰
行款格式與宋書同紹興十四年眉山刊七史之一
修至明嘉靖止本紀第三末有校語云臣等詳文襄
紀其首與北史同而末多出於東魏孝靜紀其間與
侯景往復書見梁書景傳其所序列傳尤無倫次蓋
雜取以成此書非正史也本紀第五第七列傳第二
第四第六第七第二十五第二十六第二十七卷末
有云此卷牽合北史而成第二十一卷末云此卷雖
北史而無論贊尙非正史卷二十九末云此傳與北

史同而不序世家又無論贊疑非正史愚案以上各條皆嘉祐時校刊諸臣所記與陳書南齊書同曾鞏陳書序所謂特疏于篇末者是也萬厯南監本尙仍其舊至汲古閣本始盡去之錢氏竹汀廿二史攷異以卷四校語爲嘉祐諸臣所記餘皆明人所記良由未見蜀大字本故耳李延壽之撰北史百藥之撰此書皆不能憑空結撰必取材于王邵之齊志崔子發杜臺卿之齊紀百藥書又成于延壽之前愚意與北史同者難保非延壽用百藥書修其與北史大同小異者當皆本之王杜崔三家若謂殘缺之後後人以

高氏小史補綴則校魏書者既屢引高氏小史爲證校此書者何獨引北史而不及小史乎其非以小史補綴有必然者惟崔杜王三家之書北宋已亡非若宋時館本魏書有白簽可據故以非正史三字渾言之耳錢氏以書中無序贊而與北史異者爲出高氏小史愚未敢謂然文宣紀之末汲古閣本脫乘駟馳牛驢至飲酒麴蘖三百五十六字列傳二十一李繪傳未幾遂下奪通急就章至袁狎曰三百四字而驛入高隆之傳啟出爲北道行臺至冒字止三百餘字蓋毛氏所據之本與此本同而殘缺更甚卷四缺第

三十二頁卷二十一缺第三頁而以卷十八之第十
三頁當之無怪文義之不續矣毛刊十七史北齊最
爲草率惜此本亦多明修之版又多斷爛之文不能
逐一校正之耳百藥結銜之誤宋本已然錢氏蔽罪
明人冤矣

宋槧周書跋

周書五十卷大題在下小題在上次行題令狐德棻等撰前有臣燾臣安國臣希校上序燾者梁燾安國者王安國希者林希也每頁十八行每行十七字版心有字數及刊工姓名列傳第二十二二十三後有校語兩行卷數以紀傳爲起訖紹興十四年蜀眉山刊本修至明嘉靖十年止以汲古閣本校一過毛本譌奪甚多乃知宋本之善卷一韓軌韓不譌元侯景之克臺城也克不譌充出自輿阜阜不譌皇此爲上策不缺策字李賢將精騎一千騎不誤兵魏孝武帝

崩不奪武字卷二建忠王万俟卨普撥忠不譌中卷三
太史陳祥瑞史不譌師其當州租賦租不譌祖臣無
復子之請子不譌于卷四末享年不永下不脫嗚呼
二字卷五萬物不昌昌不譌長卷六十一月己亥改
置司內官員己亥改不譌庚寅曰景子陳遣使來聘
子不譌寅陳不譌友僞丞相阿那瓌瓌不譌肱口二
千萬六千八百八十六八百不譌六百卷七冬十月
歲星犯軒轅歲不譌癸巳祠太廟祠不譌祀無忘
鑒寐寐不譌昧卷九大象元年元不譌未捐婚姻之
彝序不脫彝字卷十一晉公護傳次者屬兔兔不譌

免永舉生願永不譌未馮遷傳遷本寒微不脫微字
卷十三秦王贊傳忠誠公靖智不脫公字卷十五于
謹傳親自袒割袒不譌祖卷十九達奚武傳遣武从
兩騎佔候動靜兩不譌而楊忠傳與達武援之援不
譌授卷二十賀蘭祥傳宜陽縣公下缺四字脫高祖
于并州至襄樂縣公六十字卷二十二論並遭逢興
運並不譌益二十三蘇綽傳天下之治治不譌士卷
二十五李賢傳以絕援軍絕不誤一卷二十六長孫
紹遠傳碩乃歎服歎不譌款卷二十七蔡祐傳太祖
每歎之每不譌乃田弘傳高琳琳不譌珠乃還江陵

不缺陵字梁椿傳隴東郡守上不脫出爲二字弘農
不譌弘農卷二十八權景宣傳可以計取之計不譌
討郭賢傳除迎師中大夫不奪迎字二十九王傑傳
進位大將軍位不譌爵高琳傳賜爵許昌縣公縣不
譌郡卷三十竇熾傳廣武郡公武不譌成毅字大武
大不譌天三十二盧柔傳時沙苑之後時不譌事唐
瑾傳退朝休假假不譌暇三十三楊薦傳卿歸語行
臺迎我歸不譌等趙剛傳傍乙載忿忿不譌忽趙昶
傳千遷鎮陝遷不譌還三十四元定傳遂爲度所執
下不脫所部二字楊擲傳關中貧校中不譌史豎大

木于岸木不譌水卷末前哲所難下脫趙善等或行
彰于孝友或誠顯于忠概或躬志力俱徇功名兵凶
戰危城孤援絕揚敷三十字三十五鄭孝穆傳以疾
不之部部不譌郡崔猷傳當今之要地今不譌世三
十六楊纂傳乃間行歸款間不誤問裴果傳李慶保
降不缺降字三十七張軌傳撫軍將軍撫不譌無三
十八薛寘傳諡曰理理不譌禮卷三十九辛慶之傳
凶狡狂悖狡不譌奴杜杲傳遷温州下空八格不衍
刺史二字四十一王褒傳江南燠熱燠不譌煥庾信
傳風飛雷激激不譌散四十二蕭世怡傳不尙苛察

察不譌蔡蕭圓肅傳遂不之部部不譌郡右史書事
書不譌記劉璠傳將致大禍致不誤至四十三韋祐
傳王公避難避不譌被四十四泉企傳朝廷嘉之嘉
不譌喜李遷哲傳車騎大將軍車不譌年陽雄傳頻
典二郡二不譌三四十盧誕傳營邱下不脫成周
二字沈重傳周禮音一卷下不脫儀禮音一卷五字
樂遜傳通賈服說服不譌成卷末不失守令失不譌
火四十七褚該傳人皆敬而信之不脫人字四十八
蕭登傳百姓稱而安之稱不譌撫疆土旣狹土不譌
上每誦老馬伏櫪每不譌母四十九宕昌傳殺牛羊

以祭天殺不譌役十六年年不譌千傍乞鐵葱葱不
譌忽氏傳據陰平自稱王不脫王字五十卷突厥傳
父兄伯叔不脫兄字吐谷渾傳伏乞觸拔拔不譌拔
波斯傳瑟瑟不譌琴瑟凡无不作無閤不作閤諡不
作諡均勝毛本周主之名如邕毓等字唐祖李虎之
虎皆以諱代不書其名蓋周史本有柳虬牛弘二家
蔡本二家而成書邕毓不書名用柳史而改之未淨
者太清閣本當出唐代流傳李虎不書名宋嘉祐以
唐抄付刊改之未淨者梁燾等序不言有缺失不應
紹興眉山覆刊遽以北史補之其與北史同者安知

非同採柳牛二史乎文淵閣書目有周書四部想其
時宋刊完本必多明人刊書粗莽兩監重刊並不求
善本補全北監雖較勝南監亦如唯之與阿毛氏重
雕竟以南監爲祖由是此書無完本矣

宋槧宋印蜀大字本陳書跋

陳書三十六卷小題在上大題在下次行題散騎常侍姚思廉撰每頁十八行每行十七字首目錄後有臣恂臣穆臣藻臣覺臣彥若臣洙臣鞏校上序版心有字數及刊工姓名紀傳各爲起訖弘匡稍徵敬恆貞慎皆爲字不成卷一卷三卷九卷十六卷二十八後皆有校語序所稱其疑者亦不敢損益特各疏於篇末是也汲古閣刊本亦從此出削其校語目錄卷一卷三卷四卷五卷六下各衍小注數字譌奪亦多如卷一封陳公策衣製杖戈本左氏哀二十七年傳

文製雨衣也毛刊誤作乘羽枝戈卷四慈訓太后令
嬪嬙弗隔弗隔者言不隔絕嬪嬙也毛本弗隔譌中
角卷六禎明二年有羣鼠無數自洲岸入石頭毛本
洲譌州州上行蔡字卷二十二錢道戢傳以功拜直
閣下奪將軍除員外散騎常侍假節東徐州刺史封
永安縣侯邑五百戶二十五字此外一二字之譌奪
不可枚舉詳見羣書校補陳諱如霸先禧頊等字間
或作諱蓋思廉承顧野王傳絳舊文而刪之未盡者
唐諱虎字或作獸或作武宋刻仍唐本舊文而改之
未盡者宋嘉祐中以宋齊梁陳北齊周書舛謬亡闕

始詔館職讎校曾鞏等以秘閣所藏多誤不足憑以
是正請訪天下藏書之家悉上異本久之始集治平
中鞏校定南齊梁陳三書上之劉恕上後魏書王安
國上北周書政和中始皆畢頒之學官民間傳者尙
少未幾遭靖康丙午之變中原淪陷書幾亡紹興十
四年井憲孟爲四川漕始檄諸州學官求當日所頒
本時四川五十餘州皆不被兵書頗有在往往亡缺
不全收合補綴獨少後魏十許卷後得宇文季蒙家
本偶有所少者于是七史遂全因命眉山刊行見昭
德郡齋讀書志此卽眉山所刻七史之一也世謂之

蜀大字本明洪武中取天下書版實京師其版遂歸
南京國子監遞有修補至萬厯時始亡此本宋刻宋
印絕無修版誠可寶也卷四卷十四卷二十二卷三
十六後有史西邨人白文方印子孫保之白文方印
史鑑之印白文方印間有文徵明印白文方印案史
鑑字明古吳江人號西邨隱居不仕藏書畫甚富著
有西邨集見吳文定集序爲曾鞏所作見元豐類藁

儀顧堂續跋卷第六

儀顧堂續跋

歸安陸心源伯剛甫著

重輯舊五代史原稿跋

重輯舊五代史

薛居正舊五代史一百五十卷原本久佚乾隆中

四庫館臣从永樂大典輯出主其事者餘姚邵二雲
學士晉涵也此本每冊有晉涵之印朱文方印邵氏
二雲朱文方印蓋卽學士家底本也其與官本不同
者每條皆注出處其出大典及冊府元龜者皆注明
某卷出于通鑑攷異及通鑑注者皆注明某紀卷一
太祖紀第一下有小注云案薛史本紀永樂大典所

載俱全獨梁太祖紀原帙已散見于各韻者僅得六十八條參以通鑑注所徵引者又得二十一條本末不具未能綴輯成篇冊府元龜閏位部所錄朱梁事蹟皆本之薛史原書首尾頗詳按條採綴尙可彙萃謹依前人取魏澹書高氏小史補北魏書闕篇之例采冊府元龜梁太祖事編年按日次第編排以補其闕庶幾畧存薛史之舊仍于條下注原書卷第以備參攷焉案此條今載官本凡例中而刪節過半此外案語亦比官本爲多雖半已採入考証而此較詳自元建康路刊十三史有歐史無薛史而薛史遂微文

淵閣書目著錄五代史十部其六部注十冊闕其四部或注十四或注十五或本十六缺孰爲歐史孰爲薛史究莫能辨此外范氏天一閣左氏百川書志錢氏絳雲樓毛氏汲古閣董氏延賞齋各目皆無其書惟萬厯中連江陳第世善堂書目有五代史一百五十卷至嘉慶中陳氏書始出杭州趙谷林兼金購求無所得同治中余權閩齋徧訪藏書家亦無知之者想閩地多蟲飽蠹魚之腹久矣

元槧漢書藝文志攷証跋

漢書藝文志攷証十卷題浚儀王應麟伯厚甫每集二十行每行二十字小字雙行字數同版心刊志攷幾有字數及刊工名慶元路附刊玉海十三種之一也其書雖名漢藝文志攷証而于藝文志箸錄未加攷証者甚多不箸錄者轉有所增前無序後無跋恐亦未定稿本

見子

樹藩近頗留心目錄之學擬爲續

補亦樂觀其成也後有張寬德宏之印朱文方印張

任文房之印朱文圓印

元槧宋史跋

宋史四百九十六卷目錄三卷首行大題在下小題
在上次行題開府儀同三司上柱國錄軍國重事前
中書右丞相監修國史領經筵事都總裁臣脫脫等
奉勅修前有進宋史表領三史右丞相阿圖魯左丞
相別兒怯不花都總裁脫脫總裁平章帖睦爾達世
御史大夫賀惟一翰林承旨張起巖歐陽元治書侍
御史李好文禮部尚書王沂崇文太監楊家瑞史官
工部侍郎幹玉倫徒秘書卿泰不華僉太常杜秉彝
翰林直學士宋瑩司業王思誠集賢待制干文傳司

業汪澤民翰林待制張瑾宣文閣鑒書博士麥文貴
翰林待制貢師道太常博士李齊監察御史余闕翰
林修撰劉聞太醫院都事賈魯助教馮福可御史趙
中太廟署令陳祖仁翰林應奉王儀余貞著作佐郎
譚慥編修張翥助教吳當檢討危素銜名及提調平
章納麟等銜名至正六年中書省行浙江行省刊版
咨文行省提調官達世帖睦爾等杭州府提調官趙
璉儒司提調李祁監督儒官錢惟演等銜名每頁二
十行每行二十字版心中間紀志表傳各爲卷第魚
尾上左宋史幾右字數魚尾下左寫人姓名右刻工

姓名目錄後有校勘臣彭衡倪中麥澂岳信楊鑄牟
思善卜勝李源揭模丁士恆姓名至正中杭州刻本
是書初刊祖本也孝宗紀四川制置使應下比成化
朱英刊本萬厯南北監本多黎州邊事隨宜措置云
云三百八十字蓋成化本卽以元刻翻雕行款及版
心寫手刻工姓名字數皆同間有版心無小字者或
小字墨質白章者進表咨文總裁官修史官提調官
行省提調校勘銜名皆全惟所據本卷三十五缺第
八頁以第九頁爲第八頁複出卷三十三之第十一
頁措置營砦檢視沿江守備至九月己酉楊存中之

存字止四百字爲第九頁南北監本卽據成化本付梓而去其進表咨文及總裁修史提調校勘諸人銜名行款旣改以卷三十五復出之葉楊存二字與下文不屬改楊存爲地震以泯其迹致缺文複出之處形迹更難推求若非此本僅存則文義終不可通疑團終不可釋矣朱英序稱借漳浦陳布政家抄本傳錄付梓則成化中元刊已不易得今距成化又三百餘年完善如新無一修版誠史部中難得之秘笈也

元槧遼史跋

遼史一百十六卷首行小題在上大題在下次行題
開府儀同三司上柱國錄軍國重事中書右丞相監
修國史領經筵事都總裁臣脫脫奉勅修前有至正
三年三月十四日二十八日聖旨二道及脫脫進表
及修史官都總裁脫脫總裁官鉄睦爾達世等纂修
官廉惠山海牙等提調官伯彥等銜名目錄後有紀
三十卷志三十一卷表八卷列傳四十六卷總一百
十六卷三行及校勘臣彭衡岳信楊鑄牟思善卜勝
揭模姓名每頁二十行每行二十二字版心刊工姓

名間有黑質白章者明北監本削去聖旨及總裁纂
修提調官銜名則此書似出脫脫一人之手矣殊非
事實又移目錄總紀志表傳卷數于前改大題在上
小題在下証以此本可見唐宋以來史家舊式元人
尙未改也據脫脫進表是書爲廉惠山海牙王沂徐
昂陳繹曾所分纂案海牙字公亮希憲从孫延祐進
士官至翰林學士知制誥元史有傳陳繹曾字伯敷
烏程人諸經注疏皆能成誦爲文汪洋浩博其氣偉
如官至國子監助教元史附陳旅傳王沂字思魯眞
定人延祐進士官至翰林直學士知制誥著有伊濱

集惟徐曷無攷史雖言海牙預修三史未必有秉筆之才徐曷亦素無文名是遼史之成當出王陳二人之手史無沂傳而繹曾傳亦不言其曾修遼史亦元史疏畧之一端也

明抄遼史跋

遼史四十六卷題銜行款皆與元刊同聖旨進表總裁修史提調銜名亦同惟修三史凡例六條爲元刊所無疑是元時付刊稿本後印者缺凡例耳五百餘年完善如新誠可貴也卷中有勅褒忠勤之家朱文方印東竹草堂書畫記朱文長印侯攷愛日精廬張氏藏書志箸于錄後歸上海郁氏余從郁氏得之

金史施宜生傳跋

金史施宜生傳載宜生正隆四年冬爲宋國正旦使爲度語曰今日北風甚勁又取几間筆扣之曰筆來筆來其副使耶繼闢離刺使還以聞坐是烹死愚案此言皆取之岳珂程史不足據蘇滋溪集卷三施宜生邵武人本名達宋政和間擢上舍第爲潁州教授汴陷南走建賊范汝爲作亂宜生从之賊敗復北走齊上書陳代宋之策爲議事官齊廢仕金累官翰林侍講學士正隆四年冬偕移刺闢離刺使宋宜生自陳昔逃難脫死江表誼難復往力辭不許蓋是時海

陵謀代宋故以宜生往使以繫南士之心與用蔡松生爲相之意固同宜生旣歸以闕離刺至宋不遜不卽以聞被杖五年除翰林學士次年中風疾大定二年致仕三年六月卒年七十三此見於世宗實錄及蔡珪所述宜生行狀可考岳珂作程史乃云宜生使宋漏言被誅小說傳聞不可信愚案滋溪之言確有証據元好問中州集亦不言宜生不以善終則岳珂之妄可知金史不據實錄及蔡珪行狀而反採敵國小說之言非信史矣

宋槧建本通鑑跋

資治通鑑在南宋皆刻本甚多其可考者有海陵郡齋本蜀廣都費氏進修堂本有浙江茶鹽司本見胡身之通鑑釋文辨誤有監本有建本見景定建康志學校門案集陵廣都本皆有釋文茶鹽司本每葉二十二行每行二十一字有茶鹽司邊知白及紹興府學教授等校勘銜名監本每葉二十行每行二十字與前後漢書行款同今尙有存者此本爲杭州孫氏所藏每頁二十二行每行二十六字字多破體參差不齊與麻沙刊諸書爲建康志所稱建本無疑也朗

匡殷徵敬驚恆楨貞桓構皆缺筆孝宗諱慎字不缺則紹興中所刊也乾隆中孫君景高諱仰曾者進書百種蒙賞佩文韻府其所進乾道臨安志三卷

高廟親洒宸翰題詩其上此書在乾隆嘗首尾完具目錄亦全孫君欲重刊而未果自遭兵燹僅存卷百三十三三十四兩卷目錄存二十九三十兩卷其後人仁甫廣文康侯文學抱殘守缺寶同球璧丁松生明府囑爲考訂源流因題其後而歸之

明嘉靖仿宋資治通鑑跋

資治通鑑二百九十四卷次行題朝散大夫右諫議大夫權御史中丞充理檢使上護軍賜紫金魚袋臣司馬光奉勅編集前有進通鑑表及嘉靖乙巳孔天肩題辭每葉十行每行二十字以元刊胡三省註本校一過知胡本頗多奪落而此本不奪卷四周赧王紀烈女不更二夫下不脫齊王不用吾諫故退而耕于野十二字卷五秦武安君伐韓下不脫拔九城斬首五萬田單爲趙相五十二年秦武安君伐韓二十二字是彊弱之常也下不脫好士者彊不好士者弱

愛民者彊不愛民者弱政令信者彊政令不信者弱
重用兵者彊輕用兵者弱權出一者彊權出二者弱
是彊弱之常也五十五字卷五十二漢順帝紀縱恣
無極下不脫多樹諂諛以害忠良誠天威所不赦大
辟所宜加也二十字卷七十六鄒陵厲公紀計未施
行下不脫今公輔贊大業成先帝之志十一字卷七
十七高貴鄉公紀迎瑯琊王于永昌亭下不脫築宮
以武帳爲便殿設御坐己卯王至便殿止東廂二十
字何面目見中國人乎下不脫衡曰計將安出妻曰
八字卷九十八晉穆帝紀段陵爲左將軍領左司馬

下不脫王墮爲右將軍領右司馬十字卷一百五孝
武帝紀獲秦王堅所乘雲母車下不脫儀服器械軍
資珍寶畜產不可勝計十五字帥洛陽陝城之眾七
萬歸于長安下不脫益州刺史王廣遣將軍王虬帥
蜀漢之眾三萬北救長安二十二字卷一百六王騰
迎之八晉陽下不脫王永留平州刺史符沖守壺關
自帥騎一萬會丕于首陽二十二字卷一百七何不
速殺我有早見先帝取姚長于地下治之十字卷
一百六十七梁敬帝紀五十三郡下不脫五百八十
九縣三鎮三十六戌十二字卷二百三唐紀太后命

鑄銅爲匱下不脫置之朝堂以受天下表疏銘十一
字卷二百四九龍捧之下不脫上層法二十四氣亦
爲圓蓋十一字卷二百三十五肅宗紀李元淳爲昭
義節度使下不脫夏四月癸未以安州刺史伊瑱爲
安貴等州節度使二十字憲宗紀元和十一年春正
月己巳下不奪以弘靖同平章事充河東節度使十
三字卷二百六十四昭宗紀盧光啟並賜自盡下不
脫丁丑以中書侍郎同平章事王溥爲太子賓客皆
崔胤所惡也二十六字卷二百六十七開平四年坐
承其利又何救焉下不脫趙使者交錯于路守光竟

不爲出兵十四字卷二百九十四顯德五年謨爲給事中下不脫已未先遣謨還賜書諭以未可傳位之意十六字據天庥序以唐荆川家宋本付雕故皆與宋紹興監本同此外字句脫落尙不下數千字而以周赧王五十一年缺文二十二字爲尤謬或疑所缺各字于文義無碍當爲梅磻所刪然梅磻據紹興監本作注刊本于紹興刊板諸臣銜名全載不刪豈有反刪通鑑正文之理蓋由卷帙繁重校對不易耳宋刊孤本僅存世所通行皆胡梅磻注本若非此本安知胡注竟非全本乎當與宋本同觀可也惟中間每

多剗改雙行及縮密痕迹據孔天胤序謂出唐荊州
家宋刊恐初刊時亦以胡注本繕刻後得唐氏宋本
重爲校補故不免有剗改痕迹耳

宋蔡氏家塾槧陸狀元通鑑跋

陸狀元集百家註資治通鑑詳節一百二十卷題曰
會稽陸唐老集註首載神宗序獎諭詔書司馬溫公
進表白序外紀序馮時行史炤通鑑釋文序序後有
新又新三字陽文香鑪形印桂室二字陽文爵形印
次撰序敘注姓氏姓氏後有蔡氏家塾校正六字木
記每葉二十六行每行二十二字宋諱玄朗匡殷膺
炅憬愍恆頑貞徵癥曙樹旭勛煦估梳桓完構慎惇
敦廓皆爲字不成蓋寧宗時刊本也卷一爲看通鑑
法卷二爲通鑑總例通鑑圖譜卷三四五爲通鑑舉

要厯卷六至十二爲通鑑君臣事實分紀卷十三至十六通鑑外紀卷十七起至百二十資治通鑑其書以外紀通鑑爲本而略有刪節故曰詳節所採議論有胡曰者胡致堂讀史管見也有稱呂曰者東萊大事記也有稱林曰者林拙齋通鑑論斷也有稱戴曰者戴少望通鑑抄也有稱陳曰者陳君舉止齋論祖也而姓氏中漏刊止齋名音訓則用史炤釋文每條皆注出處每卷後附考異體例尙善勝于奉綱曰爲春秋者惟每卷各列人名有一人而十數見者未免兎園冊習氣耳案陸唐老諸暨人紹熙元年進士建

安蔡氏喜刻書乾道中蔡夢弼字傳卿者曾刊史記一百三十卷又刊杜工部草堂詩箋輯草堂詩話此蔡氏不署名攷宋刊孫尙書內簡尺牘目後有蔡氏家塾校正六字前有慶元三祀梅山蔡建侯行父序見百宋一廬賦注慶元爲寧宗年號則此書亦行父所刊歟提要附存目所據之本題增節音注資治通鑑蓋與此本不同前後有芳椒堂印白文方印香修二字朱文方印張氏秋月字香修一字幼憐朱文方印元照私印朱文方印嚴氏修能朱文方印案嚴元照字修能歸安人其藏書之所曰芳椒堂張氏秋月

者修能之愛妾爲修能掌書画者

宋麻沙刻陸狀元通鑑跋

陸狀元集百家注通鑑詳節一百二十卷次行題會稽陸唐老集注三行題建安蔡文子校正卷十六以前每葉二十四行每行十九字卷十七以後每頁二十六行每行二十二字小字雙行餘皆與宋刊蔡氏家塾本同字多破體間有刪削不及家塾本之善惟舉要歷末家塾本宋興億萬斯年此本則云聖宋億萬斯年卷百二十周世宗紀下語及宋太祖皆提行宋諱有缺有不缺麻沙坊刊多如此蓋宋季麻沙坊翻刊非元刊也蔡文子字行之箸有袁氏通鑑紀事

本末撮要見百宋一廬賦注

元槧通鑑前編跋

通鑑前編三十卷舉要三卷次行題金履祥編前有
許謙序浙江道肅政廉訪使鄭允中進通鑑前編表
表不署名以許白雲序攷得之卷末有門人御史台
都事汝南郭炯校正門人金華許謙校正兩行每頁
二十行每行二十二字小字雙行版心有字數及刊
工姓名元刊元印本是書集經傳史子之文按年編
次日通鑑每年各爲表題曰舉要雖名通鑑實仿綱
目之例惟舉要低三格通鑑皆頂格此則小變乎涑
水紫陽之例者也或謂舉要卽通鑑中之綱何必別

爲一書不知舉要三卷專爲注明每條出處而作如
帝堯甲辰元載乃命羲和注曰邵氏經世歷漢晉天
文志春秋文耀鉤尙書修二載定閏法注曰用尙書
朱子小傳修餘皆仿此明人重刊不刻舉要豈以舉
要爲重複乎大失作者本旨矣或謂舉要通鑑訓釋
三者錯出其間始于明人重刻者良由未見舉要亦
未見元刻耳卷中有徐子宇白文方印婁江世家朱
文方印製書傳後朱文方印子孫寶之朱文方印輔
生堂朱文長印

元槧通鑑續編跋

通鑑續編二十四卷前有至正十年自序二十一年
鄱陽周伯琦序十八年臨海陳基序二十二年齊郡
張紳序書例十三條自序後摹刻陳桎私印白文方
印陳氏子經朱文方印隆國世家朱文方印周序後
摹刻太史氏朱文長印行中書朱文方印周氏伯溫
白文方印張序後摹刻雲門山樵朱文方印山東張
紳士行白文方印卷末有至正五十五年云云兩行
每頁十八行每行二十二字桎先爲筆記百卷後乃
取筆記中盤古至高辛爲通鑑世編一卷唐天復至

周以遼夏初事爲通鑑外編一卷宋有國至元爲通鑑新編爲二十二卷總爲二十四卷合名通鑑續編既成家貧不能脫藁海陵馬玉麟國瑞甫令長洲始令能書者錄之二十一年松江貳守昭陽顧逖思邈甫請周伯琦序而授之梓此則其初印本也其書雖名通鑑而規模綱目綱大字目雙行仍名通鑑者承金仁山前編而言之也

元餘慶堂槧續資治通鑑跋

續宋編年資治通鑑十八卷題朝散郎尙書禮部員外郎兼國史院編修官李燾經進前載通鑑長編一百八卷進表次日錄次世系圖表後有本記云建安陳氏餘慶堂刊日後有武夷主奉劉深源校定一行每葉二十六行每行二十二字眉間有標字版心有宋鑑等字提要以宋史藝文志及本傳惟載燾續通鑑長編而無此書之名定爲麻沙坊託名故附存其目洵爲篤論惟長編從大典錄出缺微欽兩朝又佚熙寧紹聖七年之事此本雖出依託多取裁于長編

徽欽兩朝記錄頗多尙可攷見于百一也

元餘慶堂槧續資治通鑑后集跋

續宋中興編年資治通鑑十五卷次行題曰通直郎
國史院編修官劉時舉前有目錄日後有陳氏餘慶
堂刊一行後有本記曰是編繫年有考據載事有本末
增入諸儒集議三復校正一新刊行宋朝中興自高
宗至於寧宗四朝政治之得失國勢之安危一開卷
間瞭然在目矣幸鑒每卷首行下有后集二字每葉
二十六行每行二十二字版心有字數或題宋鑑或
題宋鑑后等字以學津討原刊本校一過學津本卷
二軍勢復振下脫四百餘字卷四韓世忠敗下衍金

人于宿遷縣擒其將牙合字堇十三字脫偽齊兵于
淮陽云云五百餘字卷五以高閎爲國子司業下脫
五百餘字卷八及用再拜二字未得穩當下脫五百
餘字此外字句之脫譌更難枚舉據張海鵬跋以屈
振庸所遺抄本付梓屈跋自言得任陽浦氏元刊本
有漫漶有闕葉以今推之屈本卷四缺第六葉卷五
缺第十葉卷八缺第六葉卷二缺文系元版第十四
葉第一行第二十字起至第十九行止或漫漶或殘
破非缺葉也此本旣無漫漶亦無缺葉蓋元刊之初
印者

元與畊堂槧續通鑑跋

續宋中興編年資治通鑑十八卷題通直郎尙書禮部員外郎兼國史院編修官李燾經進前有通鑑長編進表目錄進表後有建安朱氏與畊堂刊八字木記行款與餘慶堂刊本同第六卷缺第三頁以后集卷六第三頁扉入曾經高銓收藏知后集爲劉時舉書而未敢決跋云深愧見聞寡陋未能悉此書之本末其言甚謙案高銓字蘋洲湖州人工詩善書尤長畫竹人品高潔惟經史之學非其所長觀其自視歉然不敢肫斷其去愚而自用者遠矣是書元代坊刻

甚多皆與劉時舉續通鑑無名氏宋季三朝政要同
刊余所見有至治癸亥雲衢張氏本有皇慶壬子陳
氏餘慶堂本及此而三劉書及政要近時有照曠守
山諸刻此書則元以後無刊本矣

元餘慶堂槧宋季三朝政要跋

宋季三朝政要五卷附錄一卷前有目錄目前有陳氏餘慶刊一行又有記云理宗國史載之過北無復可攷今將理度兩朝聖政及幼主本末纂集成書以備他日史官之採擇云日後有皇慶王子四字附錄題廣王本末陳仲微述每葉二十六行每行二十二字版心題正要等字學津討原本卷二清祐七年鄭清之下缺千餘字而以余玠斬王夔人皆冤之夔字改爲薨字接連之蓋所据元本卷二缺十二二十三兩葉而以十一頁與十四頁接寫夔字爲十四葉第一

字張見與第十一頁末鄭清之文義不續遂妄改爲
薨字豈知清之此時尙未薨乎卽薨亦有何冤乎其
謬甚矣卷六劉槃引兵出城取戰不利乃以城降下
脫通判郭君云云八十六字卷末至舍生而取義信
哉止而缺蓋死者人之所難以下三百餘字守山閣
錢氏以趙魏校本付梓缺謬較少惟卷首題識張本
過北譌過此錢本改爲載入北都衍過此二字殊謬
卷五知江陰軍鄭端道遁鄭端譌趙端王良臣迎降
其王宗洙下脫充大府寺簿續除兵部郎官奉使福
建卽非王宗洙云云二十字皆與張刊同又有據別

本妄增者蓋與張本伯仲間耳均非善本也張刻後
有屈振庸跋稱三朝政要附續通鑑後必與劉時舉
書同時印本劉書既有漫漶缺葉此本自亦難免矣

傳履寫刻正卷六

儀顧堂續跋卷第七

歸安陸心源伯剛甫著

淳熙嚴州本通鑑紀事本末跋

通鑑紀事本末四十二卷前有目錄題建安袁樞編前載章大醕序序後有待省進士州學兼釣台書院講書胡自得掌工承直郎差充嚴州府學教授章士元董局銜名兩行每葉二十六行每行二十四字版心有字數及刊工姓名卷三卷二十末有印書盛新四小字據章大醕序是書刊于淳熙乙未修于端平甲午至淳祐丙午大醕守嚴州又重修之朱諱玄懸

縣朗浪垣匡筐恒助涯肩股駢吳頌定歌憶恆恆垣
頑貞微瘕漬曙署樹佞項旭助煦胸佶姑完梲丸莞
垣邁構構溝葺妬詬穀愼蜃讓援皆爲字不成構註
太上御名存註御名桓有改爲亘者蓋淳熙時刊本
多而端平淳祐修版少耳書法秀整體兼顏柳譌字
極少遠勝大字本趙與簋以爲字小多譌殊不足信
案大醕字景孟東陽人一作永康人寶慶二年進士
淳祐五年以朝奉郎知嚴州轉朝散郎六年十月除
侍左郎官在任有惠政官至大府少卿章士元於潛
人紹定二年進士淳祐四年嚴州府學教授紹定四

年陸子適知嚴州始創釣台書院淳祐辛丑王泌知嚴州始延堂長以訓嚴氏子孫十二年知州季鏞聞于朝以教授兼山長見景定嚴州志及浙江通志講書或卽堂長歟待省進士之名前此未聞其猶鄉貢進士而未第進士者歟卷中有吳江徐氏記事朱文長印栢山張氏省軒恆用印汪士鐘藏白文長印蓋先爲徐虹亭太史所藏後歸汪聞原者張氏省軒無攷

元槧通鑑答問跋

通鑑答問五卷題浚儀王應麟伯厚甫每葉二十行
每行二十字版心或題答問或題玉海答問間有字
數及刊工姓名慶元路附刊玉海後十三種之一也
前無序後無跋其云彗見西方而軼入秦爲妖芒以
掃滅帝王之迹皆迂謬附會之言提要疑爲厚孫輩
僞託非無因也藏印與通鑑地理通釋同多上海田
耕堂郁氏攷藏書籍印朱文方印泰峰朱文方印

宋淳祐湖州大字本通鑑紀事本末跋

通鑑紀事本末前有目錄題建安袁樞編首載淳熙元年楊萬里序寶祐丁巳趙與簾序每葉二十二行每行十九字版心有字數及刻工姓名寶祐六年趙與簾刻本案與簾字德淵秀王之後嘉定十三年進士官至吏部尚書宋史有傳居湖州城內之叢桂坊見談鑰吳興志其序云淳祐王子退而里居又云嚴陵本字小且訛乃爲大字精加讎校以私錢重刊之則是書乃與簾居湖州時所刻也嚴州本爲袁樞教授嚴州時所刻寫刊精良校讎細密遠勝此本德淵

因其字小而改爲大字重刊之可也必欲証之爲訛豈公論乎今兩本具在孰精孰譌必有能辨之者此本明嘉靖中版尙存南監凡版心無刻工姓名字數者明時修版也卷中有東魯兵備使者白文長印蓋經陽湖孫淵如收藏者

通鑑長編紀事本末跋

皇朝通鑑長編紀事本末一百五十卷次行題廬陵
歐陽守道校正前有寶祐丁巳守道序及年號兩頁
每頁二十二行每行二十四字語涉宋帝皆空格影
寫宋季徐琥刊本卷五親征河東門不完卷六聖德
聖學親信趙普卷七罷節度使優禮節度使駕馭將
帥政迹上政迹下各門全缺卷八缺太宗受位篇秦
王事迹篇亦缺前數頁卷一百十四修實錄修國史
修玉牒定新歷渾天儀象玉璽改元卷一百十五獲
鬼章卷一百十六取棄河湟洲上下卷一百十七徽

宗受位皇太后同聽政御製御筆聖德政迹卷十復
孟后元符后上下一百十九用元祐舊臣各篇全缺
宋史及晁陳二家皆不著錄

四庫未收阮文達始進呈見學經室外集文淵閣書
目有宋九朝紀事本末註曰八十冊當卽此書書前
後不題楊仲良姓名歐陽序亦不及仲良一字季滄
葦書目雖有宋刊百五十卷亦不著撰人阮氏據陳
均九朝編年引用書目乃知爲仲良作仲良仕履無
攷稱理宗爲今上皇帝則亦理宗時人守道字公權
初名巽字迂父淳祐元年進士授雲都主簿調贛州

司戶入爲祕書正字遷祕書郎咸清三年添差通判
建昌軍遷著作佐郎兼崇政殿說書權都官郎中女
天祥劉辰翁皆其門人著有巽齋文集宋史有傳序
稱寶祐元年直徽猷閣謝侯守廬陵始以家藏本刻
于郡齋貢士徐琥又轉刊于家守道復借蜀大字參
校再質之于通鑑長編尋其本文初意校正千數百
字云云是此書在宋時已經三刻初刻于蜀再刻于
廬陵郡齋此則徐琥所重刻而守道以郡本蜀本校
正者也其書承袁機仲紀事本末之名而大有不同
分類尤爲繁瑣每帝各有聖德聖學政迹三類卷十

一農田類分子目三卷三十一議樂子目二四十五
茶法子目一鹽法子目四錢幣子目二四十七塞法
子目三卷六十八六十九青苗法子目八卷七十五
農田子目三卷一百至一百二紹述子目三分析繁
瑣不及袁機仲書體例之善惟今本通鑑長編既缺
徽欽兩朝又缺英宗治平四年四月至十二月神宗
熙甯元年正月至三年三月哲宗元祐八年至紹聖
四年三月元符三年二月至十二月事惟賴此書以
補之

宋槧通鑑釋文跋

通鑑釋文三十卷次行題右宣義郎監成都府糧料院史炤每頁二十四行每行大字二十一二字不等小字三十板心有大小字數前有馮時行序宋刊宋印本卽百宋一廬賦所謂見可釋鑑音訓是優被抑身之耽與闡幽行明字繡終卷無修者也書錄解題宋史藝文志皆著于錄紹興三十一年上進見玉海明文淵閣書目有三部則明初印本尙多至中葉而遂微四庫未收阮文達始進呈案宋有三史炤一爲仁宗時人治平三年官少卿某州轉運使見華岳題

名一爲度宗時人咸淳中官利州路統制見宋史本
紀一則箸此書者據馮時行序炤字見可眉山人曾
祖清卿東坡兄弟以鄉先生事之見可箸此書精索
粗用深探約見積十年而後成年幾七十好學不衰
序題紹興三十年則見可之生當在元祐末年下距
咸淳一百八十餘年上距嘉祐三十年阮亨瀛洲筆
談誤讀馮序以炤之曾祖清卿爲炤謂蘇軾兄弟以
鄉先生事之抑知軾卒之日炤尙未生乎常熟瞿氏
藏書記以爲卽咸淳時利州統制之史炤無論統制
武臣未必通文學以紹興三十年年幾七十推之至

咸淳時將近二百歲矣有是理乎皆未免癡人說夢耳范太史集司馬公休墓誌述所著書不言有通鑑釋文故馮序云通鑑之成殆百年未有釋文海陵郡齋本乃或竊史炤書託公休名以欺司馬倂倂信之遂於乾道二年丙戌刊于海陵郡齋直齋謂史本公休書而附益之已誤阮亨謂炤書本是康作譏胡三省以詆史者詆康幾于黑白不辨矣卷中有南書房史官白文方印海甯查慎行字夏重一曰愧餘白文方印得樹樓藏書方印得樹樓查初白齋名也

元槧通鑑地理通釋跋

通鑑地理通釋十四卷題浚儀王應麟伯厚甫每葉
二十行每行二十字小字雙行首目錄後接連書後
一首題上章執徐歲橘月子王子左線外有篇名毛
子晉津逮秘書張海鵬學津討原皆从此出惟因書
後二字移其文于後亦淺之乎爲丈夫矣前有張寬
德宏之印朱文方印徐氏家藏白文印後有張任文
房之印朱文圓印子孫寶之朱文方印

宋槧東都事略跋

東都事略一百三十卷卷一卷十三卷十八次行題
承議郎新權知龍州軍州兼管內勸農事管界沿邊
都巡檢使借紫臣王稱上進前載洪邁奏進劄子及
稱告詞稱進表次目錄後有木記曰眉山程宅刊行
已申上司不許覆版兩行每葉二十四行每行二十
三四五字不等語涉宋帝皆空格板心或題東幾或
僅有數目字而無東字或留墨釘間有字數及刊工
姓名宋諱避至信字止蓋光宗時刊本也是本爲蘇
州汪士鐘零星湊配而成有初印者有後印者有以

明覆本配者內有十卷爲黃堯圃舊藏堯圃有二跋
敘得書之由甚詳八十七卷末有□□圖書官印又
有瑞卿二字朱文方印亦似元人印記明覆本亦刊
甚精幾與宋刻莫辨惟版心則一律皆作東幾與宋
本之參差者較異耳元修宋史北宋事不盡藍本此
書提要已詳言之事略有計用章而宋史無之摹一
証也稱之名提要作傳此本及明覆本皆作稱侯攷

元板通志跋

通志二百卷題右迪功郎鄭樵漁仲前有樵自序及至治二年吳繹手書序摹刊印文二二曰可堂一曰吳繹之印後有至治二年九月印造一行又有至治元年吳繹募疏或以爲進書疏者非也每葉十八行每行二十一字版心有字數及刊工姓名每卷有目與正文不連尙仍宋人舊式而微變之是書雖于淳熙中經進宋時並未板行故郡齋讀書志直齋書錄解題皆不得見至宋季而二十略始有刊本亦不分卷見馬端臨文獻通考元有南服始牒行省刊板福

州郡庠而流傳未廣至治二年知福州吳繹捐俸摹印五十部散之江北諸郡明初板歸南京國子監而後書乃通行修至萬厯中止此本爲萬厯十七年所摹印修板不過十分之一餘皆元刊實是書祖本也明惟二十略有刊本全書無重刊者乾隆中始與通典通考同刻雖祖元本而吳繹序疏均不存矣繹字思可號可堂信都人泰定二年自杭州移守吉州政有三善累官福州總管兩拜行省參政以廉明稱嘗自著可堂說虞道園跋其後稱爲孝子

元槧逸周書跋

周書十卷題晉孔晁注自度訓至器服七十篇序一篇居末與陳直齋書錄解題合與京江本以序散在諸篇者不同前有至正甲午黃玠序嘉定十五年東徐丁黼序每卷有目連屬篇目每葉二十二行每行二十字注雙行版心有字數及刊工姓名是書南宋以前無刻本寧宗時丁文伯得李巽巖家本脫誤頗甚後得陳正卿本參校修補遂于嘉定十五年序而刊之至正中劉廷幹覆刊于嘉興學宮黃玠爲之序卽盧抱經學士所據以校正時本者也程寤秦陰九

政九開劉法文開保開八繁箕子耆德月令十一篇
原缺鄴保鄴謀大開小開文儆度邑武儆五權嘗麥
本典官人周月時訓武紀銓法器服周書序十八篇
無注脫簡尤多以空圍識之觀文獻通攷引李巽巖
說則自宋已然矣案丁黻字文伯其先徐州人南渡
後大父執中遷石埭嘗从平陽徐忠文公誼永嘉錢
宗正文子學淳熙十四年進士嘉定壬申知餘杭縣
十三年除直秘閣知夔州上急務十策力修備禦爲
政寬大崔清獻與之方帥四川嘉其操尚寄詩有同
志晨星少孤愁暮雨多之句以逸周書越絕書世鮮

善本刊板置郡齋理宗初以爭濟邸事忤史彌遠被逐彌遠死召爲軍器監端平初知信州眞西山爲江西安撫薦其學有師傅修身立朝物論推許遷提刑三年以四川制置副使知成都府元闊端率汪世顯入蜀黼先遣妻子南歸自誓死守及曹友聞敗績于陽平關冬十月元兵自新井入詐張宋將之旗黼以爲潰卒也以旂榜招之旣知其非夜出城南進戰至石簡街兵敗死之贈顯謨閣待制諡恭愍賜額立祠于其鄉宋史忠義有傳而不知其里貫不詳其仕履又誤以端平三年爲嘉熙三年宋元學案亦仍其誤

余故參攷宋史元史宋季三朝政要眞西山集江南
通志安徽通志夔州府志越絕書跋詳著之以補宋
史之缺而訂其譌劉廷幹名貞海岱人至正中以中
朝貴官出爲嘉興路總管嘗刊大戴禮記蓋亦好古
之士黃玠字伯成慈溪人東發之曾孫寓居湖州嘗
爲西湖書院山長著有卞山小隱吟錄

元槩吳越春秋跋二

徐天祐字受之山陰人景定三年進士父耜知惠州
天祐初以父任爲將仕郎銓試詞賦第一註歸安尉
地近事煩試以吏事眾皆驚服及第進士爲大州教
授日與諸生講經義聽者感發德祐二年以國子監
書庫官召不赴宋亡退歸城南杜門讀書與人交終
始不變四方學者至越必進謁天祐高冠大帶議論
卓卓見者咸以爲儀型見萬姓統譜書成于元故署
日前四庫提要稱其旁核眾說不徇本書有劉孝標
注世說遺意誠爲定論明程榮何鏗刻漢魏叢書吳

琯刊古今逸史皆削其名若非元本及鄺璠翻本尙
存不將湮沒不彰乎甚矣明人刻書之謬也此本卷
末有周靖手跋案靖字枚寧號訥菴吳江人周忠介
諱順昌之曾孫著有篆隸攷異八卷

明仿宋汪綱本越絕書跋

越絕書十四卷前有嘉靖二十四年田汝成序後有無名氏跋東徐丁黼跋新安汪綱跋都穆跋每葉十八行每行十六字黼先得許氏本後得陳正卿本嘉定庚辰以秘閣本參校刊于夔州嘉定壬申汪綱得丁文伯本覆刊于紹興郡齋正德己巳吉水劉恆字以貞者知吳縣以都穆家藏本重刻于吳田汝成爲之序卷十三故天倡而見符地下缺一葉卷七兵強而不并弱下缺兩葉皆留空白常熟瞿氏以爲田汝成刻者蓋未細繹田序都跋耳

雙柏堂仿宋丁黼本越絕書跋

越絕書十四卷後有無名氏跋丁黼跋每葉十六行
每行十七字版心有雙柏堂校三字缺字與趙恆仿
汪綱本同而無缺葉蓋趙恆刊出汪綱本此則出丁
黼刊也丁黼死節成都宋史忠義有傳無名氏跋有
倦倦于復仇語或亦丁黼所爲歟是書明刊甚多此
本之外有趙恆本有張佳允本有吳琯古今逸史本
程榮漢魏叢書本何鏗漢魏叢書本論者以田汝成
序本爲最善愚謂以此本爲最善耳

元槧文獻通攷跋

文獻通攷三百四十八卷次行題鄱陽馬端臨貴與
箸前有至大戊申李謹思序延祐六年王壽衍采進
表饒州路達魯花赤總管府准江浙行中省劄付轉
行公文端臨自序目錄後余謙分書跋每葉二十六
行每行二十六字版心有字數間有刊工姓名自壽
衍進書之後泰定元年江浙行省始刊版于杭州之
西湖書院尙有譌缺至元初余謙爲江浙儒學提舉
乃命貴與之婿楊元就其子馬志仁家借本與西湖
山長方員同校俾葉森董工始成完書其後有明司

禮監刊禮部刊及建寧慎獨齋刊轉輾翻摹不無譌舛此則其祖本也王壽衍字眉叟錢唐人家世以武顯壽衍少好道年十五張道陵後裔留孫之弟子陳義高爲梁王文學見而器之度爲道士从至上京備受艱苦成宗時屢與張留孫建醮受賞賚延祐甲寅授弘文輔道粹德真人領杭州道教居開元宮壽衍屢辭真人之號戊申表上戴侗六書故及此書移疾居餘不溪上自號溪月山人至正十年卒年八十一見忠文集王真人碑觀元仁宗詔云尋訪行法錄有本事的好人其意蓋在神仙方士之流壽衍不此之

進而進以儒家之書在彼教中可謂加人一等惟儒者閉戶著書將待後王之取法乃未聞謁者之旁求而因倖臣以進獻當時不譏其失後世傳爲美談此固世道遷流之慨也特不知元之秉國者讀壽衍進表能無厚顏乎余謙里貫無攷元刊六書統六書溯源詩學正韵後皆有謙校補銜名卽此一端可見其職事修舉惜他無可攷耳葉森錢唐人字景修嘗以賞鑒游趙子昂之門與王壽衍張雨薛元曦諸道士相酬唱見元詩選小傳西湖書院本元文類亦有森校正銜名

元槧漢制攷跋

漢制攷四卷題浚儀王應麟伯厚甫前有辛巳夏五子王子自序下有方印二曰伯厚甫曰深寧居士每葉二十行每行二十字左線外有書名版心漢制幾有字數及刊工名辛巳爲至元十八年宋亡二年矣慶元路學刊附玉海十三種之一也康基田刊多缺文津逮學津本無缺蓋學津出于津逮津逮爲汲古閣所刊子晉藏書甲于明季當亦見元印本耳藏印與通鑑地理通釋同

影宋本建康實錄跋

建康實錄二十卷題曰嵩陽許嵩撰前有嵩自序卷二十末有江寧府嘉祐三年十一月開造建康實錄並案三國志東西晉書並南北史校勘至嘉祐四年五月畢工凡二十卷總二十五萬七千五百七十七字計一十策三行後有知軍府事梅摯等校正銜名七行紹興十八年荆湖北路安撫使重別雕印一行王瑋等銜名九行每葉二十行每行二十字間有每行二十一二字者宋諱嫌名皆爲字不成構字注今上御名或注御名影寫宋紹興刊本以張海鵬仿宋

本校一過知尙有不盡照宋本者如卷四缺第十第十九兩葉計各二十行張本第十葉留空白十九行十九葉留空白十八行卷八第十二葉小注石勒滅劉氏張本劉譌趙璽入僞趙冉閔入下衍屬字又缺第十六葉計二十行張本留空白十八行卷末龍神衛四廂都指揮使永州防禦使荆南軍軍府事兼管內勸農營田使主管荆湖北路安撫使公事馬步軍都總管王瑋張本龍下缺神字使下缺永州二字荆譌關軍下缺軍府事三字勸下缺農營田三字事下缺馬步軍三字王下缺瑋字蓋張氏以顧千里校汲

古宋本付梓宋本有每行二十一二字者張本統改
每行二十字又未得影宋本勘對故雖留空白而行
數不合汲古宋本有破損有模糊處見顧千里跋故
王瑋銜名不全此本所據當較勝汲古藏本故銜名
無缺

宋槧衢州本古史跋

古史六十卷小題在上大題在下轍自序及後序皆缺卷十六晉世家後有右修職郎衢州錄事參軍蔡宙校勘並監鏤版一行卷一至七版心有甲字卷八至十二有乙字卷十七至二十三有丙丁字二十四至三十七有戊己字三十八至四十八有庚辛字四十九至六十有壬癸字以紀冊數又有刊工姓名其無刊工姓名者皆元時修版宋諱有缺有不缺蓋宋季衢州刊本也舊爲杭州振綺堂汪氏所藏有汪魚亭藏閱書朱文方印

影宋淳熙本太常因革禮跋

太常因革禮一百卷題曰推忠協謀佐理功臣光祿
大夫行尙書吏部侍郎參知政事上柱國樂安郡開
國公食邑三千三百戶食實封八百戶臣歐陽修奉
勅編前有提舉編纂臣歐陽修龍圖閣直學士尙書
兵部侍郎兼侍讀同判太常寺兼禮儀事臣李東之
龍圖閣直學士左諫議大夫兼侍講崇文院檢討官
同判太常事兼禮儀事臣呂公著工部郎中知制誥
兼同判太常寺兼禮儀事臣宋敏求屯田員外郎充
集賢殿修撰同判太常寺兼禮儀事臣周孟陽度支

員外郎直秘閣充史館檢討同知禮院兼丞事臣呂
夏卿祠部員外郎充秘閣校理同知禮院臣李育秘
書丞充集賢校理同知禮院陳繹太常博士禮院編
纂姚闢守霸州文安縣主簿禮院編纂蘇洵等上進
序後有淳熙十五年李壁序缺卷五十一至六十七
四庫未收阮文達始進呈昭德郡齋讀書志曰太常
因革禮姚闢蘇洵撰嘉祐中歐陽修言禮院文書放
軼請禮官編修六年用張洞奏以命闢洵至治二年
乃成詔賜以名李清臣云開寶以後三載輯禮書推
其要歸嘉祐尤悉然繁簡失中訛闕不補豈有拘而

不得騁乎何擅釀之甚也其言與序合阮氏以爲讀
書志書錄解題不載誤矣淳熙十五年錢大虛守眉
州盡刻蘇氏書于學宮此卽從淳熙本傳錄者惜所
缺十七卷與書中缺文無可校補耳

舊抄大唐郊祀錄跋

大唐郊祀錄十卷題朝散郎前行河南府密縣尉太常禮院修撰臣王涇上前有涇進表新唐藝文志王涇大唐郊祀錄十卷貞元九年上崇文總目書錄解題文獻通攷文淵閣書目皆著于錄

四庫未收阮文達亦未進呈其書攷次歷代郊廟享祀及唐代因革故事一至三郊祀凡例四至七日記禮八日祭祀九十日饗禮遇有異同隨文注釋所引唐以前諸儒說禮諸書今皆不傳尤足以資攷證涇里貫未詳憲宗元和元年爲太常博士

宋槧陸宣公中書奏議跋

陸宣公中書奏議存卷五卷六兩卷每葉二十四行
每行二十二字版心有字數及議五議六等字下有
宋字疑卽刊工之姓避諱至慎字止當是孝宗時刊
本百宋一厘賦所謂敬輿中書者也百宋有奏艸二
卷奏議二卷今祇有此二字耳前後有中吳毛敬叔
攷藏書畫印朱文長印毛表庸叔白文方印稽瑞樓
三字白文長印案毛表字庸叔子晉之子陳子準常
熟人嘉慶中藏書與張月霄埒稽瑞樓其藏書之所
也

元槧政府奏議跋

范文正公政府奏議二卷前有韓魏公序元槧本每葉二十四行每行二十二字版心有字數首爲目錄日後有元統甲戌褒賢世家歲寒堂刊篆文方長木記分治體邊事薦舉雜奏四類凡七十九篇或作八十五篇者非元本也魏公序稱公有奏議十七卷政府論事二卷論事卽此書奏議十七卷今佚凡見于宋刊諸臣奏議永樂本歷代名臣奏議通鑑長編而爲此書及文集別集所無者皆十七卷中之文也

儀顧堂續跋卷第八

歸安陸心源伯剛甫著

影宋抄元和郡縣志跋

元和郡縣圖志四十卷題金紫光祿大夫中書侍郎
同中書門下平章事兼集賢殿大學士監修國史上
柱國趙國公臣李吉甫撰首吉甫自序後有程大昌
洪邁張子顏跋每葉二十行每行二十二字每卷有
目連屬正文卷十八缺下半卷卷十九卷二十卷二
十二三十三三十五三十六全缺聚珍本仿宋人刻
不全水經註之例編爲四十卷以原本卷三之鄜坊

丹延四州卷四之靈會鹽三州爲卷四以卷四夏州
以後爲卷五以卷五爲卷六卷六爲卷七卷七爲卷
八卷八爲卷九卷九爲卷十卷十爲十一卷十一析
爲十二十三卷十二析爲十四十五卷十三之太原
府爲十六汾沁儀三州及卷十四之嵐石兩州爲十
七忻代蔚朔雲五州爲十八卷十五爲十九卷十六
爲二十卷十七爲二十一卷十八爲二十二卷二十
一析爲二十三二十四卷二十二爲二十五卷二十
五爲二十六卷二十六爲二十七卷二十七爲二十
八卷二十八爲二十九卷二十九爲三十卷三十爲

三十一卷三十一爲三十二卷三十二爲三十三卷
三十三爲三十四卷三十四爲三十五卷三十七爲
三十六卷三十八分爲三十七三十八削去每卷之
目字句之間亦多增損更易此則猶照宋本傳錄者
是書南宋以前無刻本淳熙中張子顏帥襄陽欲刊
古書商之程文簡大昌文簡因錄祕閣所藏元和郡
縣志寄之而圖已缺子顏遂于淳熙三年刻之襄陽
子顏字幾仲秦人父俊封循王爲中興四將之一宋
史有傳子顏以蔭入仕累知信州襄陽終于敷文閣
學士知隆興府見江西通志

宋本毘陵志跋二

毘陵有志創始于教授三山鄒補之宋慈守常州欲重修而未果咸淳四年能之始踵成之曰重修者繼鄒志言之也延祐丁巳教授李敏之重刊于尊經閣此則猶是咸淳初刊本也

四庫未收阮文達亦未見乾隆己酉趙味辛得抄本缺十一卷至二十卷復从吳枚菴俗殘本抄補其卷十一之第一頁第二十卷仍缺屬李申耆兆洛校訂而付之梓此本卷十一缺首頁及卷二十全缺或卽吳枚菴所藏歟余从唐鵬安明府得之

馮已蒼校宋本水經注跋

水經四十卷次行題桑欽撰酈道元注經頂格注低
一格每葉二十行每行二十一字道元自序不能不
猶下注明缺二百二十字餘與大典本同明藍格抄
本崇禎十五年馮已蒼用柳僉大中影宋抄本校正
後以謝耳伯所見宋本增改每卷以朱筆藍筆記校
畢日月間用已蒼父白文方印馮已蒼白文方印已
蒼朱文方印馮舒之印白文方印馮氏已蒼白文方
印癸巳人朱文方印長樂朱文腰圓印卷一崑崙虛
上不衍河水二字此樹名娑羅樹娑不誤婆上我置

樓上不作置我樓上父母作是思維父母不譌二父
王布效心誠不譌怖懼心伏作父抱佛像父不譌佛
送物助成送不譌迸九流分逝逝不誤遊浮沫揚奔
奔不譌望卷十八長安人劉終于崩下校諸本多四
百字已蒼于卷末題云卷中一葉各本俱無獨此完
善皆與永樂大典本同其餘字句之間不勝枚舉卷
十後即接卷十一不別紙起宋本往往如此尤爲從
宋本傳錄之一證又經馮已蒼以柳謝兩宋本校正
誠二百年前善本也

影宋抄輿地紀勝跋

輿地紀勝二百卷題東陽王象之編前有曾治鳳復
象之劄子嘉定辛巳象之自序寶慶丁亥李塉序每
葉二十行每行二十字小字雙行版心有字數右線
外有路名左線外有府名缺卷十三至十六卷五十
至五十四卷一百三十六至一百四十四卷一百六
十八至一百七十三卷一百九十三至二百卷二缺
第一第二第三第三十六三十八共五葉卷五缺第
五至第十六葉卷二十三缺第二葉卷二十七缺第
二葉卷三十九缺第十五葉及十九葉至末卷五十

九缺第一葉卷八十二缺第四第五第二十一共三
葉卷八十五缺第六葉卷九十一缺第一葉卷一百
五十一缺第十八葉卷一百八十三缺第十七至二
十二共六葉卷一百八十五缺第一葉卷一百八十
七缺第二葉卷一百九十缺第一葉之後半葉及第
二葉一百九十二缺第七葉至末曾治鳳劄子系照
治鳳草書手迹勾摹上版其官銜爲朝奉大夫直寶
章閣江西置制新除直煥章閣知廣州廣東經略張
月霄藏書志劄首治字鳳下伏被二字拜上再字皆
作空圖拜下一字不辨誤釋作涵帥上大字在下治

字亦作空園此下且字誤作具直寶章閣下誤作口
口口制口口口口事同知洪州口口口會口鳳想
所見抄本不精耳案曾治鳳福建晉江人開禧元年
進士歷知富陽縣通判潭州漳州知廣州端平二年
進直徽猷閣知建甯府其爲江西置制江西通志福
建通志皆失載可以補其闕錢竹汀養新錄亦不知
鳳之爲治鳳又謂王象之之父不可攷案王象之父
名師古字唐卿金華人紹興甲戌進士嘗爲南劍州
學教諭刊龜山遺書知九江建拙堂于濂溪祠側官
至廣東提刑著有資治通鑑集義八十卷子謙之益

之觀之象之有之渙之節之謙之字吉父淳熙甲辰
進士益之字行父淳熙丁未進士官至大理司直箸
有職源五十卷觀之字中甫象之字肖父慶元丙辰
進士皆見敬鄉錄

影宋景定建康志跋

景定建康志五十卷題承直郎差充江南東路安撫使司幹辦公事周應合修纂前有馬光祖序進書表獻皇太子牋景定二年九月諭旨次日目錄次周應合修志始末記每葉二十行每行十九字小字雙行語涉宋帝皆提行影寫宋刊本朱述師開有益齋讀書志言孫淵如刻本卷十三表缺宣和九年至七年乙巳事二十一卷先後紊亂二十二卷王荊公營居半山園文未完卷二十九儒學志二建明道書院云云迥然不同今以此本推之孫所據宋本卷十三缺第

三十二葉卷二十一之四十一葉與四十九葉誤倒
三十二卷缺五十二葉之後半葉卷二十九第一葉
斷爛前數行孫氏不考遂妄連妄補之耳此本爲王
西莊光祿舊藏凡孫本所缺皆有當出宋本之完善
者每冊有王鳴盛印白文方印西莊居士朱文方印
甲戌榜眼朱文方印光祿卿章朱文方印開有益齋
所據之本二年庚子誤丙午三年辛丑誤丁未四年
壬寅誤戊申五年癸卯誤己酉六年庚辰誤庚戌七
年乙巳誤辛亥亦不如此本之善

元槧至正金陵志跋

金陵新志十五卷題曰前奉元路學古書院山長張
鉉輯首載索元岱序次修志文移次臺府提調官掾
御史中丞董守簡等集慶路總管府判周垚等銜名
次臺府官掾御史大夫脫歡等銜名次集慶路總管
府達魯花赤帖兒等銜名次修志本末次引用古今
書目次目錄每頁十八行每行十八字小字雙行版
心有字數及刊工姓名卷三世年表分上中下三卷
十三人物志分上上下下三卷分卷殊未允當體例多
本景定志而刪留都文籍兩門改儒學爲學校武衛

爲兵防風土爲風俗城闕爲古蹟尙無關於出入惟書旣不名續志官守志宋以前職官題名不應改爲遊宦別爲世譜卷二所載數條疆域志歷代沿革足以該之不應別爲通紀卷十三世譜一門分郡姓封爵遊宦三類有乖紀述之體耆舊增入秦檜尤失是非之公是皆體例之可議者鉉本北人素無文名不及景定志遠矣惟攷元代金陵事迹者舍是無所資耳其版明時尚存南監後印者缺數十葉此本有斷爛而無缺葉當是元末明初印本朱述之師讀書志謂卷三分上之上上之中上之下中之上中之下下

不分子卷卷四卷五卷六卷十一卷十二皆分上下
卷十三亦分上之上上之中上之下下之上下之中
下之下連子卷數之得三十一卷此本卷三上一百
二十八頁中一百二十頁下二十頁卷四七十三葉
卷五八十四頁卷六九十七頁卷十一九十頁卷十
二一百五頁卷十三上世譜四十三頁又列傳八十
一頁子卷之中並不又分子卷與述師之言不
合疑述師所見是抄本而非元刻或抄胥見葉數過
多妄爲分析不然此書無第二刻何以歧異如此耶
述師又稱孫淵如藏本闕江甯縣圖溧水州圖台城

古蹟圖曹南王祠堂圖錢天樹藏本差勝孫本亦闕
曹南王祠堂圖此本皆全洵不易得也

類編長安志跋

類編長安志十卷題京兆路儒學教授駱天驤纂編
開成路儒學教授薛延年校正首爲元貞丙申天驤
自序大德戊戌安西路儒學教授賈鹹文裕序大德
戊戌前翰林學士安西路總管山木老人王利用序
次安西路州縣圖次日目錄次引用書目

四庫未收阮文達亦未進呈影寫元刊本卷一之類
二曰雜著曰管治州縣卷二之類二曰京城曰宮殿
室庭卷三之類四曰園邱郊社曰明堂辟雍曰苑囿
池臺曰館閣樓觀卷四之類二曰堂宅亭園曰市里

第卷五之類七曰寺院曰廟祠曰山水曰川谷曰泉
渠曰陂澤曰潭泊卷七之類十曰橋渡曰原邱曰關
塞曰鎮聚曰堡塞曰驛郵曰陂坂曰堆堰曰城闕曰
古跡卷八之類四曰山陵冢墓曰紀異曰辨惑曰數
目故事卷九之類二曰勝遊曰雜題卷十之類一曰
石刻每類又爲子曰體例旣未盡善考訂亦未詳贍
惟宋元舊志南則四明臨安吳郡三山嚴州會稽赤
城鎮江建康新安毘陵嘉禾存者尙多北則宋敏求
李好文長安二志外惟此書耳天驤字飛卿號藏齋
遺老長安人官京兆路學教授

洪武本蘇州府廬志跋

蘇州府廬志五十卷圖一卷題郡人盧熊輯每葉二十六行每行二十三字前有洪武十二年宋濂序明洪武刊本卷首一十八圖圖各有說卷一沿革分野疆域卷二山卷三水水利卷四城池鄉都卷五城市卷六橋梁卷七園第卷八九官宇卷十戶口稅賦漕運卷十一賑貸廩祿卷十二學校卷十三貢舉題名卷十四兵衛營寨烽燧卷十五祠祀社稷祭典靈應卷十六風俗氏族卷十七封爵卷十六至二十牧守題名卷二十一至四十一人物卷四十二土產卷四

十三古蹟寺觀卷四十四冢墓卷四十五異聞卷四十六考証雜志卷四十七四十八集文卷四十九五十集詩案熊字公武其先武寧人宋季徙家于吳少從學于楊維禎博學工文尤精篆籀元季爲吳縣學教諭洪武初起爲工部照磨尋以善書擢中書舍人遷兗州知州爲政愷悌不務赫赫名嘗上疏言州印篆文譌謬忤旨俄以簿錄刑人家屬坐累死箸有說文字原章句鹿城隱書兗州志孔顏氏世系譜蓬螭集憂幽集石門集清溪集及此書見姑蘇志白范石湖成吳郡志五十卷趙節齋有續志章哲病其未完

作吳事類補元總管趙鳳儀嘗集諸儒論次遺闕而
未成公武採眾芟訂爲此志最爲詳贍有法其後王
文恪修姑蘇志原本此書而益以明代事蹟世稱善
本惟宋代牧守題名盧志紀述甚詳除而未任如辛
若渝張諷張洸章衡楊級呂惠卿李仲權皆列其遷
除明其未赴可與史傳相參証王志意在求簡刪其
未赴者可也而于閻象梁周翰柴成務宋璫陳省華
裴莊張去華黃震秦義孫冕王驥林維蔡抗裴煜沈
扶葉均潘夙程師孟王誨孫覺晏知止章帖吳居厚
賈青呂公雅盛章諸人或刪其字贊或刪其家世或

刪其官位或刪其考証則簡所不當簡矣不若此書之善也

四庫未收阮文達亦未進呈張月霄僅有抄本而無洪武刊本則流傳之罕可知此本每冊有曾在蔣辛齋處朱文長印絕無斷爛是明初印本當與元刊同觀也

嘉慶湖南通志跋

湖南通志二百十九卷嘉慶二十五年修主其事者
湖南布政使紹興翁鳳西元圻也金石門爲布政使
理問嘉定瞿中溶纂餘則湖南副貢黃本驥所纂居
多湖南通志創于乾隆中陳文恭宏謀以湖廣通志
爲藍本疏漏特甚是本凡分詔諭星野輿圖沿革疆
域山川城池關隘津梁隄堰公署戶口田賦蠲租積
貯礦賦錢法鹽法學校典禮祀典兵防驛傳兵事苗
防藩封職官選舉名宦人物列女流寓仙釋方技風
俗物產雜異古蹟陵墓祠廟寺觀藝文金石叢談四

十四門金石爲瞿木天中溶所纂最爲精密其餘各門成于眾手補遺訂謬用力頗深明以前傳補至二百有餘職官姓名所補亦夥且各注所引原書人物之後附以義役義僕搜採不可謂不勤體例不可謂不善惜乎三楚少藏書之家所見祇近時板本不但宋以後集部罕見卽繫年要錄北盟會編通鑑長編宋大詔令宋會要太平治迹統類等書皆未寓目不及陳公甫先生福建通志之詳核也

田通

藝勝

阮修廣東通志跋

廣東通志三百三十四卷道光二年兩廣總督阮元等重修奏進其書倣謝蘊山廣西通志之例以明嘉靖中黃佐所修通志爲藍本益以輿地紀勝等書亦未博攷羣書也主纂輯者爲江南監生江鄭堂藩浙江舉人吳虛石蘭修鄭堂深於經而史學非所長蘭修通史學長于校讎而短于博覽故其書大體雖善而疏舛尙多如方希覺字民先莆田人紹聖間知英州嘗築眾安齋于南山李修爲之記磨崖今存舊志名宦譌作連希覺阮志于金石畧據石刻證爲方希

覺是矣而宦績錄職官志仍作連猶仍舊志之譌宋
俊甫莆陽比事載知韶州阮僑知循州宋煜知肇慶
林元忠知新州顧天鈞知德慶州吳庭秀王進之留
洪知南恩州余祖奭阮中知梅州方次彭薛珩游輔
陳希輿張熊徐橋知英州阮鵬葉元汴知高州李悅
仲知雷州陳啟期知廉州龔嗣昌陳祐之知瓊州陳
大和薛元肅知昌化軍薛景黃球林叔坦葉元澣知
萬安軍龔嗣宗諸人職官志皆失載陶岳知端州與
包孝肅齊名見明一統志名宦不爲立傳職官表亦
無其名

嘉慶廣西通志跋

廣西通志二百八十卷嘉慶六年兩廣總督吉慶奏
進主其事者原任廣西巡撫江西謝啟昆也凡爲典
一曰訓典爲表四曰郡縣沿革曰職官曰選舉曰封
建爲畧九曰輿地曰山川曰關隘曰建置曰經政曰
前事曰藝文曰金石曰勝蹟爲錄二曰宦績曰謫宦
爲列傳六曰人物曰土司曰列女曰流寓曰仙釋曰
諸蠻類文難于合併者又分爲子目經政子目六曰
疆域圖曰分野曰氣候曰戶口希姓附曰風俗曰物
產建置子目十九曰城池曰廨署曰學校曰壇廟曰

津梁曰銓選曰祿餉曰田賦曰鹽法曰權稅曰積貯
曰祀典曰土貢曰學制曰兵制曰馬政曰郵政曰鼓
鑄曰船政勝蹟子曰四曰城址曰署宅曰冢墓曰寺
觀傳之目五曰列傳曰列女曰流寓曰仙釋曰諸蠻
廣西通志創自郝浴李紱續于雍正金鉉修于乾隆
皆未盡善蘊山中丞發凡起例別開生面深合史裁
其後阮文達修廣東通志翁元圻修湖南通志皆用
之誠通志之正軌也至其攷訂精審于諸蠻傳則削
安南一國列女則改某氏爲某人妻于藝文則專載
粵西人箸述仿吳郡志之例而附詩文于各條之下

于謫官則刪周利貞姚琦宋之間竇羣趙良嗣程松
丁大全諸人于流寓則刪漢桓華三國許靖劉巴譚
口之在交趾與廣西無與者于仙釋方技則刪葛洪
賓公之流俗譌傳皆足以正舊志之失又仿張用鼎
金陵新志通記之例別爲前事略仿朱長文吳郡續
記碑版之例而推廣之爲金石略備載全文皆可爲
修志法式惟輿地紀勝所載人物昭州之覃冲黃葆
光貴州之俞仲昌柳州之甘翔賀州之毛塤揚攝官
王翰宣州之李安廖世安李寶人物傳無其名慶元
元年李訖爲廣西經略嘉定中胡長卿累官廣西提

刑轉運見于石刻題名職官表無其名賓州僧得之
融州戴道者昭州僧道光象州之黎彥明梧州之李
上座盧耽仙釋亦無其名乾道間王翰趙持知橫州
賈成之通判橫州見夷堅乙志卷十九莆陽比事所
載廣西監司吳贊范勳知雄州田涇薛世清知梧州
陳端知貴州鄭東知橫州林發職官表皆無其名此
由僻在偏隅見書不多未可以一眚掩也

新福建通志康執權傳跋

案執權字平仲見四六談塵開封人靖康時官國子祭酒鴻臚寺卿見繫年要錄卷二鴻慶居士集外制高宗立召爲起居郎二年四月試給事中八月試中書舍人權工部侍郎五月充顯謨閣學士奉祠十八年抗章請老詔進一官二十七年落致仕知泉州其誥詞曰材全肅艾學造精微早魁上舍之羣英晚作西清之放老見海陵集外制及要錄卷十三卷十七卷二十五卷一百尋以執權年老勉勞以事除龍圖閣學士提舉江州太平興國宮見要錄卷一百七十

七此執權里貫仕履也康與之字伯可濟陽人居宛丘見廣東金石略風雷雨師殿記及周南山房集父倬紹興初知臨江軍高宗在揚州與之上中興十策不用監杭州太和樓酒庫坐盜庫金免官見鶴林玉露山房集起爲承務郎紹興八年彗星見與之上書言彗不足畏秦檜大悅改京秩監尙書六部門十七年擢軍器監丞稱秦檜命往鎮江市王帶又從都統王勝借金上聞出之外爲福建安撫使主管文字檜死湯鵬舉劾之二十五年除名編管欽州二十八年坐與土人交爭移雷州見繫年要錄此與之里貫仕

履也今以伯可爲執權字又云以樂府擅名待詔金馬門兩宮宴集皆仰其歌詠則誤以與之爲執權矣惟官至侍郎則不誤耳公甫先生修此志時閱書千餘種爲近來各省通志之冠而尙有此失信乎著書之難也

兩浙金石志跋

兩浙金石志十八卷

國朝阮元輯卷六載有宋張南軒手書孝經碑款題
熙寧壬子八月壬寅書付姪慥時寓鄧之廢寺居東
齋南軒書案張南軒名栻字敬夫廣漢人卒于淳熙
七年年四十八見朱文公集右文殿修撰張公神道
碑據此當生于紹興三年上距熙寧壬子六十二年
不但南軒未生卽南軒之父張浚亦尙未生耳文達
疏甚矣

同治烏程縣志跋

周密傳據齊東野語癸辛雜識附見其曾祖秘祖某父晉事蹟然祕歷官奏疏建炎以來繫年要錄及嘉泰會稽志所載甚詳觀其勇于進言急于請外其人似非庸流雖好與道學諸公爲難亦猶洛蜀分黨未可以此定賢奸程志僅稱其寓居鐵佛寺絕不敘其事蹟晉字明叔見絕妙好辭而程志亦缺今補輯其事以待後之重修者紹興五年五月吏部員外郎周秘面對十二月壬子守監察御史乙丑守殿中侍御史六年二月言江淮屯田誠財用之本然使民並耕

不能無侵擾之患臣以爲必無願耕之民然後使揀退之兵則軍民兩得其宜三月尚書省言婺州積米之家射利遏糴詔浙東州縣勸誘上戶出糴補官頑猾閉糴亦仰斷遣秘言發稟勸分古之道也但聞勸分矣未聞其迫之也今止令州縣勸誘猶懼其抑勒若許斷遣則將何所不至恐姦貪之吏因濟其私而善良之民或有被其害者矣乘時射利閉糴待價富民好利固多如是然而爲守令者苟能宣布德意感以至誠動以利害使各以不費之惠周其鄉里宜無不從者其或不從亦守令之教不素行于民也望戒

約守令多方勸誘或因斷遣指揮輒有騷動令提舉
官奏勘從之又論四川漕司注授不遵法令孤寒之
人無緣得祿宜絕弊源詔嘉納七年有旨禁伊川學
禮部郎官黃次山欲鏤版頒行錄黃權侍郎董葵欲
少俟以已意請對郎官申御史台謂葵沮格詔令祕
入見言在廷之臣以一家之學誘天下而使之同已
士大夫靡然從之風俗幾爲之變葵沮格詔令無所
忌憚葵出知嚴州秘尋遷御史中丞八月詔張浚輕
而無謀愚而自用德不足以服人而惟恃其權誠不
足以用衆而專任其數若喜而怒又怒而喜雖本無


疑貳者皆有疑貳之心予而陰奪奪而後予雖本無
怨望者皆使有怨望之意無事則揚威恃勢上下有
睽隔之情有事則甘言美辭將士有輕侮之志浚之
才術止于如是而已又論浚二十大罪又論浚僥倖
功名勞惑聖聽乞削奪官爵重加譴責詔責浚永州
居住秘亦累乞外任十月以徽猷閣知秀州九年正
月改知紹興府十年四月奉祠尋起知衢州罷爲提
舉江州太平觀十六年卒

同治烏程縣志跋二

同治八年上元宗湘文源瀚權知湖州邀余及汪謝城廣文丁寶書處士同修湖州府志以三年之久謝城僅認蠶桑一門餘皆余與寶書任之及府志成郡人議修縣志謝城籍隸烏程隨以烏程志屬之其各傳皆取材于府志而于宋寓賢增秦九韶傳考九韶之爲人有不孝不義不仁不廉之目先有議幕之除首遭駁論又除農丞措置平江米餉後省再駁其命遂寢後村謂其人暴如虎狼毒如蛇蝎非復人類方其未出蜀也潰卒之變前帥藏匿某所九韶指示其

處使凶徒得以甘心守和販口抑買于民寓居雪川之關外凡側近漁舟每日抑令納錢有差否則生事誣陷大爲閭里忠苦李曾伯帥廣委備瓊管僅百許日郡人莫不苦其貪暴作卒哭歌以快其去有子得罪于九韶折其兩脛見劉後村集卷八十一繳駁九韶知臨江軍狀與周密癸辛雜志所言大略相同周密與九韶同寓湖州或有鄉里私怨後村氣節文章名重當世且見之奏駁必非無影響者故余修府志于寓賢不爲立傳而謝城矜爲獨得不免變亂是非矣九韶爲潼川守樞之子見寶慶三年四川石魚題

字樵普州安岳人紹熙四年進士嘉定十七年官秘書省校書郎除秘書少監寶慶元年除直顯謨閣知潼川府謝城以博洽負時譽竟不知九韶爲四川人而沿周密之誤以爲秦鳳間人殊可笑也




儀顧堂續跋卷第九



歸安陸心源伯剛甫著

明刊子彙跋



子彙二十餘種明萬厯四年刊本頗爲近世好古者所重鬻子晏子子華子劉子闕尹子亢倉子文子孔叢子有丁丑夏日潛菴子識語收藏家無知其人者愚案孫繼臯宗伯集有吏部侍郎諡文恪微菴周公行狀公名子義字以方微菴其自號也嘉靖乙丑進士改庶吉士公故嗜書旣入選則多購求書窮日夜讀不休隆慶六年升南國子司業攝祭酒事萬厯六

年升北祭酒十一年晉禮部侍郎改吏部萬厯十四
年年五十六所訂正書梓在南雍者有周禮史記五
代史而子彙則所自編輯者也則子彙爲周子義所
刊無疑矣丁丑爲萬厯五年正子義爲南京司業兼
攝祭酒時也行狀不言其又號潛菴子者略之也惟
所据雖多善本墨子晏子有刪併移易處則不免明
人習氣耳

宋槧纂圖互注荀子跋

纂圖互注荀子二十卷題曰唐大理評事楊倞注前有楊氏序及篇目欹器之圖天子大路龍旗九旂圖一行欹字數皆與互注重意重言道德經同每頁格闕外有篇名勸學篇青出之藍不作青取之於藍聖人循焉不作聖人備焉玉在山而木潤不作草木潤君子如嚮矣不作如響矣賦篇請占之五泰不作請占之五帝注有五泰五帝也一句與唐與政重雕監本不同而與王伯厚困學記聞所稱建本合他如勸學篇螾無爪牙之利螾上不衍蚓字注有蚯蚓也三

字目不兩視而明耳不兩聽而聰兩不字上不衍能
字謹順其身與呂氏讀書記所引同順不誤慎修身
篇詩曰噏噏些些與詩攷合不誤滄滄訛訛保利弃
義弃不誤非不苟篇小心則搖而傾搖上不衍流字
故君子不下堂堂上不衍室字榮辱篇危足無所履
者者下不衍也字政法令不作政令法注有當作政
令法或曰政當爲正十一字糧食大侈不作太侈注
有大讀爲太四字非相篇注形法不誤刑法二十四
篇篇不誤卷節族久而絕注節奏久則絕節不誤宗
儒效篇人之所道也下不衍君子之所以道也一句

外闔不閉閉不作問人無師法則隆性矣有師法則
隆積矣性不誤情積不誤性注厚性謂恣其本性之
欲厚于積習謂化爲善也不誤厚于情謂恣其情之
所欲厚于性謂本于善也積土謂之山積水謂之海
與下數句一律兩謂之不誤而爲王制篇不待須而
廢須不誤頃小節一出焉一入焉一出上不行非也
二字承強大之敝下不衍也知疆大之敝六字王霸
篇不攷而得甲兵甲不誤用君道篇勝斛敦槩者勝
不作升百吏乘是而後鄙不奪鄙字天論篇勉力不
時則牛馬相生六畜作殃五句不錯在禮義不修之

上解蔽篇注王之所罪盡不善者也罪不善善者故
爲畏王欲羣臣之畏也不若無辨其善與不善不誤
作王罰不善者善者何爲畏王少羣臣之畏也不若
無辨其善成相篇高其臺榭不奪榭字大略篇是弃
國捐身之道也捐不誤損宥坐篇闕龍逢逢不誤逢
皆勝宋本王伯厚謂監本未必是建本未必非則此
本在宋時亦稱善本矣

宋槧纂圖互注揚子法言跋

纂圖互注揚子法言十卷題曰晉李軌唐柳宗元注
聖宋宋咸吳祕司馬光重添注每葉二十二行每行
二十二字小字雙行每行二十五字前有宋咸序及
進廣注法言表司馬溫公序篇目渾儀圖五聲十二
律圖宋咸序後有木記云本宅今將監本四子纂圖
互注附入重言重意精加校正殆無謬誤膽作大字
刊行務令學者得以參攷互相發明誠爲益之大也
建安□□□謹咨六行宋刊本案司馬公法言注十
三卷本名集四家注見宋史藝文志故直齋書錄李

軌注法言解題有建甯四注不同之言振孫寶慶時
人是理宗初建甯已有刊本至景定時龔士高刊入
六子全書改題纂圖互注而集四家注之名遂不可
見矣提要未及李宋吳三人仕履里貫案李軌字弘
範晉尙書祠部郎中都亭侯撰周易尙書音春秋公
羊音小爾正音各一卷泰始泰甯咸和起居注共六
十七卷又撰齊都賦一卷集八卷及法言注十三卷
見隋書經籍志柳宗元注法言十三卷見新唐書藝
文志宋咸字貫之建陽人天聖二年進士官至都官
郎中著有易訓毛詩正紀外義朝制要覽及法言廣

志十卷吳祕福建甌甯人景祐元年進士累官司封
員外郎侍御史以不劾呂公綽濫刑出知濠州提點
京東刑獄後以老乞閒改知舒州著有周易通神太
玄箋及揚子注見閩書

至書跋

至書二卷前有嘉定戊辰建安蔡沈自序宋史藝文志箸于錄遠取堯舜禹湯孔子曾子子思之言近述周程張朱之言又采諸家訓釋爲之注以虞廷十六字傳心爲首而以張子西銘終焉以其皆極至之理故曰至書

四庫未收阮文達亦未進呈此从明泰府刊本錄出前有嘉靖丁巳秦王五友軒序

元槩傳道四子書跋

傳道四子書顏子二卷曾子二卷子思子二卷孟子二卷題吳郡後學徐達左編次有達左總序四子各有達左自序下有印三日徐達左印曰良夫曰耕漁軒及會溪蔣直儒刻一行至正庚子辛丑刊本每書各立內外篇目內篇載經書附以周程張朱之言外篇載傳記附諸子百家之論顏子子思子孟子篇目皆十曾子篇目十四曾子全載孝經而有分析移易孟子僅取二十餘條入內篇去取聖經殊近于妄惟搜羅采輯亦頗廢苦心乾隆間開

四庫館無進呈者其流傳不多可知此猶元刊元印
本也案達左字良夫號耕漁子吳縣人少受易于鄱
陽邵弘道又受書于天台董仁仲隱居光福山與倪
瓚王行周砥爲文字交洪武初鄉人施仁守建甯請
爲其學訓導六年卒于建甯見俞貞木撰傳箸有耕
漁軒詩

宋槧朱子語類跋

朱子語類一百四十卷題導江黎靖德類篇前有黃
幹池州刊本序李性傳饒州刊續錄序蔡杭刊後錄
序吳堅建安刊別錄序黃士毅分類語錄序及鈐木
跋魏了翁眉州刊本序蔡杭徽州刊版序王泌刊續
錄序次姓氏次門目日後有黎靖德景定癸亥書咸
淳庚午再書次攷訂每葉二十八行每行二十四字
版心有字數宋咸淳刊本間有元修之頁石門呂氏
刊本所从出也

元槧黃氏日鈔跋

慈溪黃氏日鈔分類九十七卷題慈溪黃震東發編輯每葉二十六行每行二十四字語涉宋帝皆空格蓋仍宋本舊式前有至正三年廬江沈達序下有印曰肩吾子是書原本百卷東發身前已梓行元初兵燬至正中孫禮之搜緝補刊僅存九十七卷卷八十一八十九注曰原官版無文字則元以後版片殘缺也乾隆中有覆本行款悉同匡格字形皆縮小矣中有楊繼宗朱文方印西齋朱文方印案楊繼宗明史有傳

折獄龜鑑跋

折獄龜鑑八卷宋鄭克撰錢氏守山閣刊本前有至
元元默敦牂奉訓大夫湖南儒學提舉陵陽虞應龍
序宋史藝文志晁公武讀書志馬端臨文獻通考皆
著于錄作二十卷惟陳直齋書錄解題作三卷原書
久佚館臣从大典錄出而錢氏據以刊行者也提要
未載克字里仕履愚案克字武子開封人累官承直
郎湖南提刑司幹官紹興三年下詔恤刑戒飭中外
俾務哀矜克因閱疑獄集分類其目爲此書見書錄
解題隱居通議宋時與春秋分紀朱子四書昌黎文

集黃陳詩注廉吏傳南陽活人書和劑局方同刊于
宜春郡齋歲久殘缺至元辛巳同知郝居正補完應
龍爲之序通議摘錄龜鑑十餘條辨誣門李端爲岐
州刺史議罪門邢州有盜鉤厯門王基戍邊章舉爲
句章令南方有僞裝歐傷者五條今本失收可據以
補其缺惟諸書皆作鄭克隱居通議作鄭克明豈克
又字克明歟然莫可攷矣

宋槧傷寒總病論跋

傷寒總病論六卷修治藥法一卷題蘄水龐安時撰
前有元符二年黃山谷序蘇東坡答安常札卷六後
有政和歲次癸巳門人布衣魏炳編十三字每卷有
目連屬篇目每葉二十行每行二十字宋諱皆爲字
不成丸不改圓蓋政和中刊本卽士禮居刊本所祖
也黃序蘇札其名皆空蓋徽宗崇甯時黨禁甚嚴蘇
黃文字皆毀版故刻其文而隱其名蘇札後有咸淳
時名伯忠題字兩行冊中有士禮居朱文方印黃丕
烈印朱文方印蕘圃朱文方印袁氏尙之朱文方印

王韻齋圖書印朱文方印有竹居朱文方印汪士鐘
名號珍藏印尤多

元槩傷寒百証歌發微論跋

新編張仲景註解傷寒百証歌五卷傷寒發微論二卷題曰翰林學士許叔微知可述每葉十六行每行十七字註雙行每行二十字直齋書錄解題許叔微傷寒歌三卷凡百篇皆本仲景法又有治法八十一篇仲景脉法三十六圖翼傷寒論二卷辨類五卷皆未見案傷寒歌卽百証歌三與五字形相近而譌翼傷寒論卽發微論

四庫未收阮文達未進呈張月霄亦未見惟錢遵王敏求記箸于錄今每冊有虞山錢曾遵王藏書朱文

長印蓋卽敏求記箸錄之本也案叔微少孤力學于書無所不讀而尤邃于醫建炎初真州疾疫大作知可遍歷里門十活八九仕至徽州杭州教官遷京秩見影宋本乾道庚寅張郊序而不言京秩爲何官提要云宋代詞臣率以學士爲通稱觀于此本結銜叔微曾官翰林故醫家謂之許學士也前後有惠棟之印白文方印惠定宇手定本朱文方印海陽孫氏藏書印朱文方印新安孫從添慶增藏書白文長印末有蕘圃手跋孫從添字慶增常熟人善醫術乾隆時人

宋槧大觀本草跋

經史証類大觀本草三十一卷間有題經史証類大
全本草者次行題唐慎微纂前有大觀二年艾晟序
卷三十後有補註本草詔勅及所引醫書十六家撰
人姓名義例卷三十一後有圖經本草奏勅卷一二
序例三至五玉石部六至十一草部十二至十四木
部十五人部十六至十八獸部十九禽部二十至二
十二蟲魚部二十三果部二十四至二十六米穀部
二十七至二十九菜部三十有名未用三十一本經
外草木每葉二十四行每行二十字小字雙行每行

二十四字宋諱多爲字不成語及宋帝或提行或空格此書有大觀二年孫氏刊本有宋紹興二十七年王繼先校定國子監刊本有金泰和甲子晦明軒刊本有元大德壬寅宗文書院刊本大德丙午許氏刊本金泰和本名重修政和經史証類備用本草附寇宗奭衍義元大德丙午本亦附衍義此本不附衍義非紹興官刊本卽麻沙書坊翻大觀本也所採書二百四十六種今存者不及五十種耳

宋槧史載之方跋

史載之方二卷上卷後有跋不全每葉二十行每行十七字宋諱枯字不缺丸不改圓蓋徽宗以前刊本直齋書錄解題指南方二卷蜀人史堪撰凡分三十一門門各有論今此書自四時正脈起至治疫毒痢止却得三十一門門各有論蓋卽直齋箸錄之指南方也

四庫未收阮文達始進呈案載之名堪四川眉州人政和進士官至郡守彭師古得異疾食已鼻中必滴血堪曰疾在素問正經名曰食卦投一方服之宿恙

頓除見分類夷堅志辛集眉州進士題名碑蔡元長
病便秘堪末紫苑以進須臾遂通見北窗輟炙錄卷
中有張氏字香修一字幼憐芳椒堂元炤私印嚴氏
修能黃丕烈印蕘圃蕘翁更號復翁諸印後有黃蕘
圃手跋二通並錄宋稗類抄北窗輟炙錄兩條宋稗
類抄所採出分類夷堅志辛集堪爲政和進士皆蕘
圃及阮文達所未聞也

宋槧本草衍義跋

本草衍義二十卷次行題通直郎差充收買藥材所
辨驗藥材寇宗奭編撰前有政和六年十二月二十
八日劄付劄付後有宣和元年月本宅鏤板印造姪
宣教郎知解州解縣丞冠約校勘兩行每葉二十四
行每行二十一字宋刊宋印本宗奭萊公曾孫箸有
萊公勲烈一卷見郡齋讀書後志以衍義劄付通鑑
長編二百八十三証之知其曾官杭州順安軍永耀
各處熙甯十年爲思州武城縣主簿政和六年由承
直郎澧州司戶進書轉通直郎添差充收買藥材所

辨驗藥材所辨驗藥而已宗奭以嘉祐証類二部失
于商較因攷諸家之說參以實事有未盡者衍之以
臻其理如東壁土倒流水冬亥之類隱避不斷者伸
之以見其情如水自菊下過而水香鼯鼠溺精墜地
而生子之類文簡脫誤者証之以明其義如玉泉石
蜜之類避諱而易名者原之以存其名如山藥避宋
朝諱及唐避代宗諱之類郡齋讀書志直齋書錄解
題文獻通攷皆箸于錄金泰和刊散附唐慎微証類
本草明刊仍之此則猶宋時單行本也

腳氣治法總要跋

腳氣治法總要二卷董汲撰提要云汲字及之東平人始末未詳其著書在元豐元祐之間愚案晁補之有董汲秀才真贊云鵲實非脈假脈而言太子可起和實以脈遺脈而知良臣將死故鵲不能死生而和不能生死既有制之者矣亦有知之者矣術兼于道是謂醫理誰其知之惟汶陽董子見雞肋集卷三十二與箸此書者里貫時代皆合當卽其人也

濟生方跋

濟生方八卷宋嚴用和撰原本久佚此則館臣從永樂大典輯出者日本尙有原書爲楓山秘府所藏前有寶祐癸丑用和自序又有濟生續方一卷爲日本醫官湯河氏藏有咸淳丁卯自序此本雖有用和自序而缺寶祐紀年亦無續集故莫辨爲何時人以日本宋本證之用和蓋宋季醫家也

元槩濟生拔萃方跋

濟生拔萃方十九卷小名在上大名在下卷一鍼經
節要卷二潔古雲岐鍼法寶太師流注指要卷三鍼
經摘英卷四雲岐脉訣論治卷五珍珠囊卷六醫學
發明卷七脾胃論卷八潔古家珍卷九此事難知卷
十醫壘元戎卷十一陰証略例卷十二十三傷寒保
命卷十四癰論萃英十五田氏保嬰集十六蘭室秘
藏十七活法機要十八衛生寶鑑十九雜方每葉二
十四行每行二十四字版心各刊書名亦有字數延
祐中杜思敬致政家居集張元素張壁李杲王好古

羅天益諸家醫書選其精要爲此書蓋醫書之選本亦醫家之叢書也潔古珍珠囊醫學發明雲岐之癰論萃英脉訣論治田氏保嬰集東垣之活法機要今皆不傳藉是以存梗概

四庫未收阮文達亦未進呈杜思敬銅鞮人自號寶善老人元時曾官中書省退居沁上延祐二年八月十一

元刊傷寒直格方跋

新刊河間劉守真傷寒直格方三卷後集一卷續集一卷附張子和心鏡一卷題臨川葛雒仲穆編校後集題瑞泉野叟鎬洪緝編臨川華蓋山樵葛雒校正續集題平陽馬宗素撰述臨川葛雍校正心鏡題門人饒陽常惠仲明編前有無名氏序序後有建安虞氏刊行一行目錄前有陳氏書堂刊本記五行續集後癸丑歲仲冬陳氏刊八字前三卷名習醫要用直格後集名傷寒心要續集名傷寒醫鑑傷寒心鏡本各自爲書合而編之者葛雒也每葉二十六行每行

二十四字吳勉學醫統正脉本手少陽三焦病次指
不能爲用下脫一行其餘亦頗有不同心要醫鑑心
鏡

四庫不收附存其目

元槧御院藥方跋

新刊惠民御藥院方二十卷前有高鳴敘次目錄目
後有南溪書院香爐印及鐘形印卷末有南溪精舍
鼎新綉梓八字木記每葉二十四行每行二十二字
每方別以黑質白章凡分十七門卷一二諸風卷三
至六一切疾卷七八痰飲卷九至十一虛損十二積
熱門泄瀉門十三十四雜病十五十六咽喉口齒十
七眼目門洗面藥門十八瘡腫折傷門正骨藥門十
九婦人諸疾二十小兒諸疾御藥院先有壬寅刊本
至元丁卯太醫提點許某正其訛補其缺求遺亡而

附益之翰林學士河東高鳴爲之序各家書目皆未
箸錄始見于明文淵閣書目註曰一部三冊闕此本
首尾完具紙墨如新卽愛日精廬所箸錄者也

元槧素問圖解要旨論跋

新刊圖解素問要旨論八卷題曰劉守真編馬宗素重編前有劉守真序馬宗素序序後接總目守真序後有書坊刊板木記四行卷一彰釋元機篇卷二五行司化篇卷三六化處用篇卷四抑沸鬱發編互用勝負篇卷五六步氣候篇卷六通明形氣篇卷七法明標本篇卷八守正防危篇守真原本三卷宗素編爲八卷故曰重編凡內經素問所有者注曰舊經凡守真所撰者注新添皆以黑質白章別之每葉三十行每行二十八字阮文達以爲金刊者也

四庫未收阮文達始進呈案守真名完素金史方技
有傳馬宗素平陽洪洞人每冊有王惟顯氏白文方
印展臣氏白文方印爲袞朱文方印湯質元素印記
朱文方印汪士鐘名號兩印

明仿北宋本太元經跋

太元經十卷說元五篇釋文一卷太元題晉范望字叔明解贊說元題唐宰相王涯字廣津纂釋文注曰自侯芭虞翻宋衷陸續互相增損前有陸續述元每葉十六行每行十七字註雙行版心有萬玉堂三字說元後有右迪功郎充兩浙東路提舉茶鹽司幹辦公事張寔校勘一行明嘉靖甲申郝梁覆宋本攷熙甯本外臺祕要亦有張寔校勘銜名與此同則是本當从北宋本翻雕者卷十後有無名氏跋云宋衷解詁陸續釋元共爲一註范望采二君之業折衷長短

或加新意就成此註仍將元首一篇加經贊之上元
則一篇附逐贊之末餘自元衝以至元告九篇列爲
四卷三家義訓互有得失以待賢者詳而正焉云云


影宋易通變跋

易通變四十卷前有張行成自序每葉十六行每行十六字版心有通幾等字

提要云此本流傳甚少外間僅有宋本及明費宏家鈔本費宏本作皇極經世通變宋本但題通變而無易字此本每卷首行亦但題通變二字而無易字與提要所云宋本合字畫工整匡格濶大與眉山刊七史相似當從南宋蜀本影摹者案行成字文饒四川臨邛人紹興二年進士學易子譙定官右迪功郎紹興九年五月獻芻蕘書二十篇又獻七引一篇託晉

元帝以寄意不報丐祠歸杜門十年成述衍十八卷以明伏羲文王孔子之易翼元十二卷以明楊雄之易元包數義三卷以明衛元嵩之易潛虛衍義十六卷以明司馬光之易皇極索隱二卷以明邵雍之易通變四十卷取陳搏至邵雍所傳先天卦數十四圖以通諸易之變尋起爲成都府路鈐轄司幹辦公事二十二年王孝忠謀叛成都帥曹筠閉閣不敢出官僚往往逃避行成排闥入見邀筠出聽事整兵授甲指畫擒捕尋卽平定乾道二年進呈易書七種除直徽猷閣出知漢州號令嚴明盜賊屏息豪強退聽倉

庫充實以汪應辰薦知潼川府以終自號觀物先生
有觀物集二十卷見宋史譙定傳繫年要錄魏鶴山
集朝野雜記汪文定集二百家播芳大全姓氏自序
首稱先生曰中間屢稱先生之意蓋述其師譙定之
說也杭州文瀾閣亂後此書僅存數冊細審皆皇極
經世之文丁松生明府經理
文瀾閣書已借此本補足矣



作展全系品ナ

三

儀顧堂續跋卷第十

歸安陸心源伯剛甫著

元槧晏子跋

晏子八卷前有總目目後有劉向奏每卷有目連屬篇目每葉十八行每行十八字與吳山尊重摹影元抄本同惟吳刊版心分八卷此本卷一至卷四版心刊晏子上卷五至卷八刊晏子下稍有不同卷八末章公曰章下此本注缺吳本有吾失晏子未嘗聞吾不善章曰君好臣服君嗜臣食尺蠖食黃身黃食蒼身蒼君其食諂人言乎公曰善賜弦章魚五十乘弦

章歸魚車塞途章撫其僕曰曩之唱善者皆欲此魚也固辭不受與御覽九百三十五引同吳勉學本分七篇二百三章缺十二章萬厯子彙本以卷七重而異者雙行注于內篇各條之下卷八至第十七章止缺第八章經訓堂本出沈啓南校刊本分爲七卷以外篇七八兩篇合爲一卷卷八第十八章公曰章下多百餘字與御覽所引及吳刊不同與治要同外篇每章皆注其箸于此篇之故當是劉向舊文各本無之均不如此本之善子彙本有潛菴子識云今刻本分諫問雜上下六篇重而駁者二篇每章復括大義

爲標目甚有次第云云則周氏刊子彙時所見亦此本也卷四後有徐燧惟和識云萬厯戊戌中秋購于閩門肆中下有徐燧私印白文方印惟和朱文橫長印每冊有徐燧私印朱文方印幔亭峰長白文方印鄭燕之印白文方印人燕朱文方印注韓居士白文方印鄭氏注韓居珍藏記朱文長印案徐燧字惟和福建閩縣人萬厯戊子舉人著有幔亭詩集鄭燕字人燕侯官人乾隆貢生其藏書之所曰注韓居藏書數萬卷分二十厨貯之以東壁圖書府西園翰墨林誦詩聞國政講易見天心爲誌是書元本流傳尙多

孫淵如作音義時所見盧抱經作羣書拾補時所見
皆與此本同卷八第十八章公曰章下皆注缺字何
以淵如所贈山尊影抄本獨全與御覽一字不異竊
疑點者以御覽補完僞作影元本以愚淵如淵如以
贈山尊山尊遂以梓行耳然其文固見御覽非僞也

元槧呂氏春秋跋

呂氏春秋二十六卷次行題十二紀八論六論篇名
三行題百六十篇篇名四行題呂氏春秋訓解下題
高氏前有鄭元祐序高誘序總目後有鏡湖遺老跋
每葉二十行每行二十字小字雙行版心有青字上
有大小字數北宋時餘杭有刊本亡三十篇脫漏三
萬餘言元豐初東牟王氏奉詔修書于資善堂取太
清樓藏本校定元祐壬申鏡湖遺老賀方回得此本
于京師手爲校定元初其本歸于海岱人劉克式字
居敬號節軒者其子名貞字廷幹至正中爲嘉興路

總管刊之嘉禾學宮此則嘉禾刊之初印者畢氏經
訓堂刊祖弘治李瀚本李本及嘉靖許宗魯本亦從
此本出每冊有元本二字朱文長印張月霄印朱文
方印愛日精廬藏書朱文方印

元槩大字白虎通跋

白虎通德論十卷題臣班固纂前有大德乙巳中奉
大夫雲南諸路行中書省參知政事東平嚴度恪齋
題下摹刊度字陽文方印恪齋陽文方印魯台陽文
方印大德九年克齋張楷序下摹刻東平張楷陽文
方印衛甯陽文方印克齋陽文方印後有缺名兩跋
每葉十八行行十七字每篇文相連屬不分章卷一
爵號諡卷二五祀社稷禮樂卷三封諸侯京師五行
卷四三軍誅伐諫諍鄉射致仕辟雍災變耕桑卷五
封禪巡狩考黜卷六王者不臣著龜聖人八風商賈

卷七文質三正三教三綱六紀卷八情性壽命宗族
姓名天地日月四時衣裳五刑五經卷九嫁娶卷十
紼冕喪服崩薨凡四十四篇與崇文總目郡齋讀書
志直齋書錄解題合爲宋以後相傳之本闕名跋所
謂監本者也是本爲大德九年無錫學者儒李顯翁
晦借州守劉平父藏本所重雕嘉靖傳鑰本雖從此
出間有改易併爲二卷盧抱經校刊是書初亦未見
元刊後始于蘇州朱文游家借得箸其說于補遺然
如爵篇比爵爲質故不變下元本複出爲質故不變
五字進賢達能爲下無卿字大夫下無王制云上大

夫卿七字士冠經下元本有日字所以繫臣民之心
下無也三年三字然後下無受字盧校皆未及此外
異文之未校者尙百十處或以刊成在先雖借文游
元本並未詳校耶元本于逆子劍之誤爲迎子劉尙
存其舊特著其說于跋可謂慎之又慎餘皆仍舊斷
無改易可知盧校盡依羣書所引增改且有諸本所
無羣書無證而改易者未免篤于信旁証果于疑原
書矣毛氏秘本書目大字元板白虎通三本今仍訂
三冊蓋猶毛氏舊裝每冊有毛晉之印毛氏子晉朱
文兩方印毛辰之印斧季朱文兩方印宋本朱文橢

圓印甲字朱文方印毛晉朱文連珠印毛晉私印子
晉朱文兩方印宋筠朱文方印蘭揮白文方印張楷
序前有顯親王府圖書之印白文方印案宋筠爲商
邱宋瑩之子汲古閣祕本書目爲潘稼堂開值議價
不諧其書多爲商邱宋氏所得故有蘭揮兩印此流
傳源委之可攷者平父名世常許衡弟子收書不啻
萬卷

明仿宋槧東觀餘論跋

東觀餘論二卷題左朝奉郎行祕書省祕書郎黃伯思撰前有萬厯甲午項篤壽重刊引後有紹興丁卯黃訥跋嘉定 年樓鑰跋後有莊夏跋無名氏跋每葉十八行每行十八字語涉宋帝皆提行學津討原本分卷略同而刪削奪譌甚多卷下御書閣記跋下半登閣敬視美成就章因覽是碑愛其文辭遂躬錄之二十二字誤連杜正獻草書跋其退也直下而以真誥書秦漢間事跋右此前十條云云三十五字連接御書閣跋任大師弟下又以杜正獻草書跋心勁

氣云云十九字爲真誥跋舛謫幾不可讀又移祕閣
續帖跋杜正獻草書兩跋于前而移崇甯書真誥二
跋及真誥秦漢間事標目于後卷末少大丞相李公
序校定杜工部集觀文葉公跋索靖章草急就篇許
翰祭長睿文翁挺讀許公祭文四篇李忠定所撰墓
誌銘則改爲附錄又缺莊夏跋無名氏跋其他小注
刪削猶多不及此本遠甚莊夏序少前一葉首行存
莊夏書于籌思堂一行後跋云是書刊于庚午之秋
明年正月得公書又校示一百五十餘條塗者一百
五十一注者三百一十七乙者四貼改四百四十六

字并以邵資政攷次瘞鶴銘文附于卷後云樓跋後有跋云川本去三十一篇皆在可刪之域若跋師春書後一篇後已有校定師春序又跋千祿碑後及跋鍾虞二帖後皆是重出當刪其餘二十八篇不若存之以全其書云云與攻媿序書法彷彿疑亦攻媿作案莊夏字子禮泉州永春人淳熙八年進士知興國縣開禧三年除祕書郎嘉定元年除著作佐郎四月爲江東提舉二年除江東運判四年除尙右郎官官至兵部侍郎敷文閣待制見中興館閣錄景定建康志福建通志攻媿所謂著作莊子禮欲求善本傳後

者也庚午爲嘉定三年子禮時爲江東運判景定建
康志書版門有東觀餘論二百一十版當卽莊所刻
也書中小注有伯思自注者有攻媿校注者莊跋所
謂注三百一十七是也毛子晉跋以爲出項篤壽者
因謬或以爲皆伯思自注者亦非也攻媿之跋爲子
禮詳校是書而作莊跋所云明年正月得公書者公
卽指攻媿也紹興丁卯黃訥刊本十卷今不得見其
以川本校補併爲二卷刪師春書跋疑皆攻媿所定
或子禮所爲惜跋缺前一葉未敢臆決耳

朱竹垞手抄賓退錄跋

賓退錄十卷題曰大梁趙與峕朱竹垞手抄本每半
頁十行每行十八字前有與峕自序半頁五行行七
字是摹與峕手書凡遇本朝國朝皇朝國初聖旨禁
中上諭至尊聖世及太祖太宗真宗仁宗光獻英宗
宣仁后神宗徽廟哲宗欽宗郭皇后高宗孝宗太上
皇太子等字皆空一格蓋照宋本摹寫者第十卷末
有臨安府睦親坊南陳宅經籍舖印一行蓋从宋板
照錄者後有與峕續記張燕昌手跋稱爲竹垞早年
手錄有譌字而無俗體驗之信然嘉慶間刊本卽从

此本出惟中間空格皆連寫矣

宋槧夢溪筆談跋

夢溪筆談二十六卷題曰沈括存中首括自序連屬目錄後有乾道二年湯修年跋每葉二十二行每行二十字語涉宋帝皆空格每條首行頂格次行低二字卷七登明下注曰登字避仁宗嫌名卷十二十三瑋字慎字卷二十六完字皆爲字不成是書揚州公庫先有刊本乾道二年周某知揚州復刊版置郡庠此其初印本也卷中有許元方印朱白文方印季誦氏朱文方印曾在李鹿山處朱文長印礎卿二字朱文長印當湖小重山館胡氏珍藏朱文長印毛氏津

逮祕書本卽從此出惟語涉宋帝不空格商氏稗海
本及馬氏單刊本有補筆談續筆談所據當別一本
張氏學津討原本筆談二十六卷卽津逮舊板其補
筆談二卷續筆談一卷則據稗海本補入非毛刊所
有也許元方字季誦蘇州人胡爾壩號笛江道光中
海甯人其藏書之所曰小重山館與錢警石友善蓋
明初爲沈民則所藏後歸許季誦道光中爲胡邃江
所得

元刊冷齋夜話跋

冷齋夜話十卷目後有跋云是書僧惠洪所編也洪本筠州彭氏子祝髮爲僧以詩名聞海內與蘇黃爲方外交是書古今傳記與夫騷人墨客多所取口借舊本訛謬且兵火散失之餘幾不傳于世本堂家藏善本與舊本編次大有不同再加訂正以繡諸梓與同志者共之幸鑒至正癸未暮春新刊後有三衢石林葉敦印一行每葉十八行每行十七字元刊元印本其標題之謬

四庫提要已痛詆之他如東坡廬山偈分爲兩條標

曰廬山老人亦謬之甚者觀此刊跋恐原本無標題如玉壺清話之例其標題乃元人所增故荒謬如此學津討原本出津逮秘書津逮本似卽從此本出惟標題又有刪節而其大謬處仍未改正葉敦無攷自署石林當爲夢得之裔疑元時坊賈耳

會通館本容齋五筆跋

容齋隨筆十六卷二筆十六卷三筆十六卷四筆十六卷五筆五卷明無錫安氏會通館照宋紹定元年周某刊本以活字印行初筆前有何異序二三四筆皆有自序五筆後有丘橐跋洪級跋周某刊板跋每半頁十八行每行十七字語涉宋帝或提行或空一格宋諱多缺筆蓋悉照宋刊摹寫者板心有會通館活字銅板印及弘治歲在旃蒙單闕等字以宏治李瀚刊本互校隨筆卷十一小貞大貞条若齊鬱林王知下奪五十餘字詩以見意以下乃唐詩戲語條之

下半段脫去上半二百一字誤連爲一四筆卷八前
後藝文下奪六十餘字其或疾疫連數州以下乃承
天寺塔條之下半段脫去上半二百餘字誤連爲一
想安氏所藏宋本有關頁故有此誤兩本皆刊於弘
治中皆以宋本重雕李本似以宋本上板故少奪落
此本以活字擺印略更行欵故奪誤較多而丘橐洪
級周某三跋則爲此本所獨皆不失爲善本兵燹之
後李本固稀如星鳳此本則尤爲江南藏家所珍耳

履齋示兒編跋

新刊履齋示兒編二十三卷題曰廬陵鄉先生孫奕
季昭撰顧千里校宋胡楷刻本目後有嘉定癸未胡
楷重刊跋提要云其歷官無考第十卷中稱紹熙丁
巳三月侍讌春華樓聞大丞相周益公議論考之宋
史紹熙元年爲庚戌至五年甲寅卽內禪丁巳實慶
元三年殆甯宗時嘗官侍從傳寫誤爲紹熙歟愚案
履齋仕履除提要所述外別無可攷勞格雜識至以
北宋之孫奕當之尤爲張冠李戴惟元蘇天爵滋溪
集有題孫季昭上周益公請改修三國志書稿稱宋

鄉貢進士孫季昭嘗三上書益國周公請改修三國史志以正漢統五世孫義方藏其稿于家云云則亦留心史學者曰鄉貢進士則僅登鄉解而未第進士矣胡楷廬陵人淳熙四年鄉解見江西通志遍檢江西通志紹興至慶元鄉解題名並無奕之名楷跋自稱晚學則奕之發解必在楷之前惟紹興二十二年有孫逢年淳熙元年有孫遜功孫光宗皆廬陵人奕或發解後改名惜無確証耳

考古質疑跋

考古質疑六卷宋葉大慶撰原本久佚此則館臣從永樂大典錄出以聚珍版印行者也提要云宋史無傳亦不見於藝文志其里貫則序文不具莫能詳也愚案大慶字榮甫處州龍泉人嘉泰三年進士當時以詞賦知名嘗官建州州學教授見處州府志前有葉武子序武子字成之邵武人受學於朱子嘉定甲戌進士調彬州教授歷國子正知處州有善政見宋景濂集葉氏先祠記及八閩通志序作于寶慶丙戌殆武子官處州時作歟

密齋筆記跋

密齋筆記五卷續一卷宋謝采伯撰其書久佚乾隆中館臣始从永樂大典錄出提要云宋史無傳其事迹不甚可考官爵名字僅見於陳耆卿赤城志中愚案采伯紹定間知徽州郡與衢嚴接壤前歲盜發常山采伯獻言于朝調精兵遏其衝賊不敢出因萃兵四境平之嘗禱雨感應虎豹遁迹民立生祠祀之後轉中奉大夫見徽州府志是采伯學問政事均有可觀未可以戚畹輕之

元槧困學紀聞跋

困學紀聞二十卷或題浚儀王應麟伯厚或題浚儀王應麟伯厚甫前有至治二年秋八月壬辰隆山牟應龍序其下印文三曰牟應龍印曰牟伯成父曰儒林世家泰定二年門人袁桷序目前有深甯白識二十卷後有孫厚孫甯孫校正一行慶元路儒學學正胡禾監刊一行末有泰定二年十二月癸卯慶元路儒學教授吳郡陸晉之後敘每葉二十行每行十八字蓋是書初無刊本泰定中馬勿速爲浙江廉訪副使保定孫揖爲僉事分治慶元以袁桷等呈請始命慶

元學以學儲刊行而梅倡助刻資學官陸晉之等繼之乃始有成蓋初刊祖本也

隱居通議跋

隱居通議三十一卷題曰南豐劉堽起潛著案堽聰敏好書博覽古今宋末與同里譙祐以詩文鳴年三十七而宋亡又十八年薦署州學正年七十受朝命教授延平年七十八卒見江西人物志堽自云開慶元年年二十則祥興二年宋亡年當四十延祐己未重題梅氏海棠詩周甲重開年八十與卒年七十八不合若宋亡之歲年三十七則延祐己未當年七十七與卒年七十八合與開慶元年年二十延祐己未年八十又不合矣未知孰是李義山字伯高江西豐

城人修己之子嘉定進士授大宗正兼金部輪對言
爲善不可有疑心去惡不可有悔心並陳進善不能
無疑者三去惡不能無悔者三由是出知吉州後以
湖南提刑攝漕帥楚俗尙鬼有妖覲譚法祖假禍福
惑人義山曰此張角孫恩之漸也斬法祖毀其祠厯
階中正大夫著有後林遺稿思過錄見江西林志厲
樊榭宋詩紀事非但不詳義山仕履誤以豐城人爲
嘉魚劉壘以爲江東提刑守池州疑亦有誤

秦西岩影宋寶慶本類說跋

類說五十卷前有紹興六年曾慥序寶慶丙戌葉時序子卷與清思軒本同每卷有目連屬篇目書名下間不箸撰人每條之目接連本文以墨線隔之每葉二十行每行十八字書錄解題卷數同郡齋讀書志作五十六卷明天啟六年岳鍾秀刊本分爲六十卷刪削羈亂甚多非足本

四庫著錄之本亦分六十卷蓋皆以子卷隨意分析耳是書先有紹興麻沙刊本寶慶中葉時知建州思得大字善本徧令搜訪知併小字版亦不存因以所

藏是正鈐板郡齋此卽从葉本傳錄者其序尙摹時
手書也與清思軒本互勘分卷旣不盡合去取微有
參差想皆葉時所更定者

提要云麻沙坊本其板亡佚葉時重鈐亦不可復見
則舊本之罕見可知余旣有傳錄麻沙小字本又得
影寫寶慶本何快如之卷一有西岩山人藏書朱文
長印卷四末有姑蘇吳岫珍藏白文方印蓋先爲秦
西岩所藏後歸吳方山者

傳錄宋麻沙本類說跋

新雕類說五十卷前有總目卷一卷十四卷十九卷
二十七卷三十卷三十六卷三十七卷四十二卷四
十六卷四十七分上下卷卷二十六卷四十分上中
下三卷實六十四卷每卷有目連屬篇目采書二百
五十九種拾遺總類所采四十餘種不與焉書名低
二格有撰人者各注撰人每條有目低三格每葉二
十二行每行二十二字版心有清思軒三字是書紹
興庚申始刊于建陽之麻沙字小而刊不精見寶慶
本葉時序余見宋刊殘本每葉二十行每行十八字

書名大字本文雙行小字如蘭雪堂蔡中郎集春秋
繁露會通館本容齋隨筆之式當卽葉時所謂紹興
麻沙本也此本似从麻沙本傳錄以秦西岩傳錄寶
慶本互勘此本較有條理而羈奪較多卷一穆天子
傳天子之弓條後脫造父三百一條計二十餘字飛
燕外傳冷元自序在前無荒田野草之目卷二王老
條前奪續仙傳標目及漁父詞踏踏歌掘枸枸三條
計二百五十餘字兩塵条後奪李八百一條計二十
五字蓋麻沙本雙行小字此旣一律改寫大字所據
本又有缺葉有錯訂之葉故羈奪較多耳

影宋酒經跋

酒經三卷卷一文隱翁自序卷二麴法卷三酒法每
葉十行每行十六字版心有字數及刊工姓名桓字
缺筆蓋從北宋末刊本影寫者後有某氏手跋云酒
經一冊乃絳雲樓未焚之書五車四部盡爲六丁下
取獨留此經天殆縱余終老醉鄉故以此轉授遵皇
令勿遠求羅浮鐵橋下耶余已得修羅採花法釀仙
家燭夜酒視此經又如餘杭老媪家囊俗譜耳辛丑
初夏戲書觀其辭義當出錢謙益乎蓋絳雲火餘後
歸錢遵王也是園者鮑渌飲知不足齋刊本每葉九

行每行十六字與此本行款不同其餘多同據鮑跋
借之吳枚菴枚菴得之玉峰徐瓚蓋與此本同出一
源卷中有鄭杰之印白文方印昌英珍秘朱文方印
鄭氏注韓居珍藏記朱文長印

元槧考古圖跋

考古圖十卷前有呂大臨序大德己亥茶陵陳才子
陳翼子題識每卷有目題默齋羅更翁考訂據才子
序書本巨編翼子屬更翁臨刻始縮小証以

提要所舉卷一卷四卷六卷八卷九卷十缺文顛倒
皆同蓋明泊如齋寶古堂本皆從此出也遵王明季
人藏有完善宋刻大德在遵王前幾四百年完本必
易求乃以不全之本付梓殊爲可惜繪圖亦不及明
刻之精惟葉數缺處皆留空葉尙有形迹可尋明刻
連屬以泯其迹則謬矣

續攷古圖跋

續攷古圖五卷始見于讀書敏求記不著撰人四庫及

天祿琳琅所著錄卽遵王藏本余借潘伯寅尙書藏本付梓僅據翟耆年籀史知釋文爲趙九成所撰心疑續圖或亦出九成而無証據近讀李邴嘯堂集古錄序有云鼎器欵識絕少字畫復多漫滅及得呂大臨趙九成二家攷古圖雖有典刑辨識不容無外據此則續圖亦九成所輯也

元槧宣和博古圖跋

至大重修宣和博古圖三十卷每葉二十行每行十七字版心間有字數及刊工姓名其圖依樣製者旁注依元樣製四字縮小者旁注減小樣製四字明嘉靖七年黃景星刊本與元刊本同泊如齋寶古堂本版既縮小而依元樣製減小樣製等字皆削去矣書爲徽宗時撰元人不加一字至大重修之名殊不可解蓋靖康之亂金人盡輦汴京圖籍書版而北見靖康要錄及北盟會編自金入元版已殘缺竊意前後必有王黼等進表及纂修校勘銜名元人修補刊完

惡其人而去之故改題至大重修之名其版則猶宋刊居多也首行至大二字或小或大或疏或密與重修宣和博古圖錄卷第幾各字氣既不貫字之工拙懸殊亦以宋刊挖補之一証也據蔡條說書成于大觀初容齋隨筆又稱政和中置局疑宋本已有政和重修字樣元人改政和爲至大惜無確證耳卷中有漢唐齋印白文長印馬玉堂印白文方印笏齋二字朱文方印海鹽馬笏齋孝廉舊藏也

元槧藝文類聚跋

藝文類聚一百卷次行題唐太子率更令弘文館學士歐陽詢撰前有詢自序後有無名氏跋每葉二十八行每行二十八字明嘉靖陸采本行款皆同疑卽從此本出無名氏跋有云今書坊宗文堂購得是書卽便命工葉行溥傳海宇售播四方賢哲士夫以廣斯文幸鑒愚案元刊劉靜修集卷一後有墨記云至順庚午宗文堂刊本記則宗文堂必元代麻沙書坊是書亦至順中刊本也書中有徐氏興公白文方印曾在李鹿川處朱文長印鄭燕之印白文方印注韓

居士白文方印一名人燕字昌英朱文方印侯官鄭氏藏書印朱文方印注韓居珍藏記朱文方印劉氏小墨莊藏朱文方印侯官劉筠川藝文金石記朱文方印曾經筠川讀朱文方印徐興公名勛字惟起閩縣人萬厯間與曹能始狎主閩中詩盟聚書至數萬卷或題其端或書其尾見明詩綜李鹿川鄭燕劉筠川皆雍乾間福建藏書家是書明凡四刊有蘭雪堂活字本有聞人銓本有陸采本有大字本元刊則惟見此一種耳

宋槧白孔六帖跋

唐宋白孔六帖存卷一至卷三十八止每葉二十行每行十九字小字雙行左線外有篇名先白後孔以黑質白章白孔二字別之每類子目亦以黑質白章爲別白孔本別行白帖名白氏六帖類聚余藏有之孔續六帖三十卷前有乾道丙戌韓仲通序今歸

內府此爲南宋合刊本字體與陸狀元通鑑蔡氏草堂詩箋相仿宋諱或缺或不蓋南宋光甯以後福建刊本也卷中有宋本二字朱文橢圓印東海二字朱文長印傳是樓朱文長印徐仲子朱文長印章仲二

字朱文連珠印徐氏章仲朱文方印別號自疆白文
方印壬戌二字朱文方印臣炯二字朱文方印花谿
二字朱文方印徐章仲所讀書朱文長印陳氏秋鴻
朱文方印友鞠軒朱文長印汪士鐘印白文方印閻
源真賞朱文方印

儀顧堂續跋卷第十一

歸安陸心源伯剛甫著

明抄職官分紀跋

職官分紀五十卷前有元祐七年秦觀序次引用書目注曰凡三百二十書次目錄明綿紙館抄本每葉二十四行每行二十二字小字雙行每卷有目連屬篇目書錄解題著錄題曰富春孫逢吉彥同撰秦觀序之元祐七年也

四庫提要以逢吉隆興元年進士紹熙五年代朱子講討距元祐一百三年駁其誤謬是矣愚攷淮海集

亦無此文惟所採各書及所敘官制均至神哲時止
徽宗以後無一字頗疑爲北宋人作因而遍攷各書
知宋時孫逢吉有三一蜀人孟昶時爲國子毛詩博
士附宋史勾中正傳一吉州龍泉人字从之隆興元
年進士官至權吏部侍郎諡獻簡宋史四百四有傳
生紹興五年卒慶元五年著有靜閣居士集七十卷
外集三十卷樓攻媿撰神道碑不字彥同亦不言著
有職官分紀一杭州富春人字彥同浙江通志有傳
卽箸此書者所採五代史職官志爲薛史舊文邵二
雲輯薛史時僅校內職一條其餘尙未詳校其採宋

代事迹頗有出宋史外者亦攷宋史者所當攷也余又藏有舊抄本每葉二十行每行二十二字較此本脫譌極多卷一摠序後魏百官志主受詔令後脫二十行卷二太宰門脫宋百官志一行以三公攝冢宰後脫四行大司馬門春秋運斗樞末脫一行又脫管子二行吳志後脫晉職官志晉公卿禮秩宋百官志齊百官志齊職儀四條計二十行羣入後一葉卷三缺目錄與此本同而行二行此外各卷羣奪大略相同是書宋以後無刊本傳抄多譌余所見所藏亦祇三本當以此本爲最善也

舊鈔職官分紀跋

職官分紀五十卷前序引用書目目錄每卷有目皆與明鈔同惟改每葉二十四行爲二十行耳書中有謙牧堂藏書記白文方印某會里朱氏潛采堂藏書朱文長印小長蘆朱文長印朱彝尊錫鬯父白文方印葢曝書亭舊藏後歸謙牧堂者順德李石農侍郎从南書房借鈔半部光緒己丑典試浙江攜其所鈔屬爲校正補完行款與此同余命兒子樹藩爲之校對李抄尙多脫落葢以此本較明抄則抄爲勝以李抄校此本則此亦尙爲善本耳

元槧山堂攷索跋

山堂先生羣書攷索前集六十五卷後集六十五卷
續集五十六卷別集二十五卷題山堂宮講章如愚
俊卿編前集目後有延祐庚申圓沙書院新刊木記
每半葉十五行每行二十四字標目別以黑質白章
以明正德戊辰劉洪慎獨齋刊本互勘明本頗有刪
削移易處如卷五中庸大學元本經下有注明本存
經刪注卷八六經門卷三十二文章門明刊先後顛
倒後集續集別集如此類者亦多此爲初刊祖本不
久卽毀于火故流傳甚少見慎獨齋鄭京敘勝慎獨

本遠甚中有趙賢白文方印藤蔭館白文方印胡爾
壩印朱文方印豫波朱文方印胡氏豫波家藏圖書
朱文方印胡爾壩字籙江平湖人嘉道中藏書家也

宋槧書判清明集跋

名公書判清明集前有景定辛酉日長至幔亭某孫
序祇存末葉似卽幔亭所編也今存戶婚一門分二
十二類曰立繼曰戶絕曰歸宗曰分析曰檢校曰孤
幼曰女承分曰遺囑曰別宅子曰義子曰取贖曰爭
業曰違法交易曰僞冒交易曰墳墓曰屋宇曰庫本
曰爭財曰婚嫁曰離曰接脚夫曰雇妾計二百三十
六葉不分卷每葉十八行每行十六字前有各家名
氏

四庫未收各家書目皆未著錄所收陳抑齋

韓徐意

一清叟王留耕伯大蔡久軒抗史滄洲彌堅范西堂

應銓章翼之良肱馬裕齋光祖宋自牧慈吳雨岩勢

卿翁丹山合王去非遂胡石壁穎翁浩堂甫陳廬山

塤劉桃菴希仁姚立齋瑞葉息菴武子諸人著述今

皆不傳藉是可見涯略有浦玉田藏書記白朱文方
印留與軒浦氏珍藏朱文方印二酉齋朱文長印

足本歷代制度詳說跋

新刊歷代制度詳說十五卷題曰東萊先生呂祖謙
伯恭編影元抄本每頁二十八行每行二十五字卷
一科目卷二學校卷三賦役卷四漕運卷五鹽法卷
六酒禁卷七錢幣卷八荒政卷九田制卷十屯田卷
十一兵制卷十二馬政卷十三考績卷十四宗室卷
十五祀事較

四庫所收多宗室祀事二卷考績門之首及錢幣荒
政兩門亦無缺頁乃是此書完本考績列卷十三不
列第三其分卷亦不同矣

明抄名賢氏族言行類稿跋

歷代名賢氏族言行類稿六十卷前有嘉定己巳章定手記明藍格抄本每頁二十六行每行二十二字提要云定建安人仕履無考愚案福建通志職官志章定嘉泰四年以承務郎知仙遊縣嘉定己巳上距嘉泰四年僅五年時代相合當卽其所載多五代以前事迹宋以後採錄寥寥自序謂文籍不備多所遺缺良不誣也

元刊元印玉海跋

玉海二百卷詞學指南四卷題浚儀王應麟伯厚前有胡助李桓序至元三年宣慰使公文阿殷圖塾堂序王介跋薛元德後序伯厚自序王厚孫跋每葉二十行每行二十字目錄後有慶元路儒學正范桂克忠學正虞師道薛元德學錄汪興王壽朋直學陳眉壽學吏岑立道銜名五行校正對讀伯厚孫王厚孫王甯孫一行書寫王秉王陞楊德載一行刊字生張周士等三十人一行翁洲書院山長曹性之重校正一行紹興路高節書院山長金止善監督一行至元

三年乞里不花爲浙東道宣慰使提國子學博士趙承德呈請刊于慶元路學至正九年阿殷圖爲總管修補六萬字始成完書明初版歸南京國子監正德元年缺五十餘版正德二年缺二百餘版續修至萬厯止而元刊十不存一其存者多模糊不能辨又缺二百餘葉亦未補完乾隆中康基田爲江甯布政使以萬厯本重刊缺葉如故世不得見全本者久矣此本元刊元印無一缺葉字皆趙體無一斷爛誠天地間有一無二之本杭州書局重刻姚蓮槎主政就詒宋樓校對補完三百年後復見完書賴有此耳有張

寬德宏之印朱文方印張任文房之印朱文圓印士
峰張氏世恩堂圖書朱文方印徐氏家藏白文方印
張任蓋崑山人後歸傳是樓者先是道光中上海郁
泰峰茂才松年以六百元得書于揚州鹽商家同治
初豐潤丁雨生日昌開府江蘇余過其官舍出以相
誇並載入澹靜齋書目所稱墨光燭天者也及余自
閩中罷歸有以郁氏書求售者余閱其目是書在焉
因以善價得之詢其何以仍歸郁氏之由知雨生介
紹應敏齋廉訪至郁氏閱書自取架上宋元刊本五
十餘種令材官騎士擔負而趨時泰峰已故家已中

落諸孫尙幼率其孀婦迫及于門雨生不能奪取其
卷帙少者自置輿中其卷帙多者僅攜首帙而去後
經應敏齋調停以宋刊世綵堂韓文程大昌禹貢論
九朝編年毛詩要義儀禮要義金刊地理新書等十
種爲贈餘仍返璧余始恍然因念同治元年余隨李
筱泉制府權務廣東始與雨生共事時方以廬陵令
失守免罪尙未開復也及余備兵南韶雨生亦權蘇
松道篆余奉諱歸田則渠已開府矣余以訪書至蘇
雨生必先屏車騎過訪相見若平生後竟以爭搜古
書成隙念古人懷璧之戒因並識于此

元槧元印小學紺珠跋

小學紺珠十卷題浚儀王應麟伯厚甫前有大德庚子方回序大德辛丑牟應龍序及伯厚自序每葉二十行每行二十字版心刊紺珠字有字數及刻工姓名左線外有書名亦至元三年慶元路學刊本也康基田刊本黑釘缺文甚多此猶元時印本一無斷爛可以補諸本之缺

元槧元印姓氏急就篇跋

姓氏急就篇上下二卷題浚儀王應麟伯厚甫末有伯厚自跋署曰浚儀遺民蓋入元後所作也每葉十行每行大字二十小字雙行每行二十二字版心刊姓字有字數及刻工姓名左線外有書名行密字小俗本謬譌尤甚此本元時初印字字清晰自序雖有韻語在卷下後別爲一葉版心刊姓氏急就篇題辭五十一上十一字未知何故俗本連屬正文尤非

宋槧啟劄截江網跋

新編通用啟劄截江網甲集八卷乙集八卷丙集八卷丁集八卷戊集八卷己集六卷庚集六卷辛集六卷壬集五卷癸集五卷不著撰人前有歲在乙未正月元旦前進士陳元善序下有穎川二字鼎印建陽陳氏方印每葉二十八行行二十三字小字雙行四庫未收諸家書目亦未著錄蓋宋末元初麻沙坊刊也序稱熊晦仲哀集是書凡古今前輩之事實近日名公之啟劄皆網羅而得之自甲至癸分爲十集甲集則專舉諸式之大綱乙至癸則旁分品類之衆

目云云案熊晦仲無攷陳元善建安人開慶元年已未進士自署前進士者元延祐六年己未作也所採表箋奏狀書啟稟劄贊頌序記賦文箴銘歌詩詞曲皆載全文宋人詩集之不傳者如丁黼黃定朱湛盧翁溪園黃順之江萬里戴植哀長吉吳申黃革余日華李石才丁持正朱子厚徐霖楊長孺胡德芳張南卿周申趙福元祝穆卓田歐陽光祖牛子蒼程東灣任希夷羅子衍張家瑞劉樞張薄陳濬王容鍾將之尹德鄰劉光祖黃竹坡羅永年梁大年阮文卿李居厚劉浩范一飛吳申甫陳夢協葉實夫葉寘黃埒劉

閩風葉巽齋劉子襄史千劉省齋富偉蕭崱包日齋
蕭仲景林橫舟林子晦張仲殊余去非嚴敦常張進
彥翁九万徐逢年劉子實潛放熊伯詩謝勉仲李子
清吳季子王大烈高子芳熊太經陳克王紹程節楊
補之李肯堂范炎程正同戴翼陳士豪趙汝恂石麟
章斯才李仲元鄭碩支子蒙程宣子劉鎮熊竹里江
成叔劉常軒程光遠龔九万蘇南疆熊克楊炎正林
觀過傳達傳壽傳大詢熊德修熊以甯吳景仲周丙
正大發孫德之宋壺山蘇囿山徐清叟游慈譚去疾
張樵劉仲行張無隅葉夢鼎林霆龍僧不輕陳郁黃

少師女吳氏左瀛翁甫宋漁趙愚齋彭止劉恭甫黃
元壽張申子王桂陳韓葉明馬子嚴王伯丈李遇嚴
少魯黃宙李梅礪趙善得張幼杰丘驛陳煒劉石菴
鄭暉老魏順之丁幾仲莫養正呂季已施子中游穉
仙劉澗谷林駟歐世昌祝洙錢之紀趙必愿陶璿趙
紹夫江仲容儲用盛勛商飛卿張汝明陳應行劉渭
董洪汪立中翟公英方雲翼朱廷瑞陳晉卿楊申徐
子元李顯卿辛桎厲模陳讜余崇龜王九万方信孺
李桂潘子高陳子文劉韜仲應鏞黃濤吳淇韓補高
吉邢凱趙恬齋蕭仲才章立菴鄭覺齋黃魯安劉煒

叔林宋偉于定國游清夫劉崇卿孟點朱南疆危科
牟子才張實甫丁仁吳順之李寅仲方味道汪相如
李敬則游志甫王其吳同山趙孟僖趙灌園陳若水
曾寓軒吳勢卿張輯之類今皆不傳可藉是以得其
梗概每卷有太原叔子藏書記白文長印子孫寶之
朱文方印案王聞遠號蓮涇蘇州人藏書極富有孝
慈堂書目

宋槧詩律武庫跋

東萊先生分門詩律武庫前集十五卷後集十五卷
目錄次題東萊呂氏編于麗澤書院前集目前有書
坊刊行木記四行卷一次行題呂氏家塾手編

四庫不收附存其目每葉十八行每行十九字前編
分十一門後集分十八門宋季麻沙坊本也中有高
子敬圖書記朱文方長印高麒朱文方印汲古祕本
書目延陵季氏宋元板書目江氏藝芸書舍宋元板
書目皆著于錄

永樂槧事林廣記跋

纂圖增新羣書類要事林廣記前集二卷後集二卷
續集二卷別集二卷新集二卷外集二卷前集題西
穎陳元靚編餘皆不著撰人元靚仕履無攷當爲福
建崇安人廣寒先生之裔廣寒先生名字無攷墓在
崇安其子名遜紹聖四年進士元靚必遜之裔也餘
詳歲時廣記序前集目錄後有永樂戊戌孟春翠岩
精舍新刊木記外集末有吳氏玉融書堂刊人形木
記每葉三十八行每行三十二字前集雖題元靚名
卷下地理類有大明混一圖郡邑類有直省布政司

則已爲明人羣入增新之名蓋由于此前集分天象
厯候節序地輿郡邑方國勝迹仙境八類後集分人
紀人事家禮儀禮農桑花卉果實竹木八類續集分
帝系紀年厯代聖賢先賢文籍辭章字學八類別集
分儒教學校幼學書法文房翰墨道教雜術修真佛
教圖畫十一類新集分官制俸給貨寶算法醫學卜
史選擇文藝武藝伎術十類外集分宮室衣服器用
音樂音譜閨妝茶果酒麴飲饌麪食牧養禽獸十二
類續集聖賢類有大元褒典帝系類記年類至元順
帝止字學類有蒙古字百家姓新集官制俸給兩類

皆明代制度蓋此書在當時取便流俗通用自元而明屢刻屢增矣中有毛晉二字朱文連珠印汲古主人朱文方印汲古閣三字朱文長印東吳毛氏圖書朱文長印子晉朱文方印毛氏子晉朱文方印毛晉私印朱文方印子晉書印朱文方印書雖明刊流傳極少各家書目皆未箸錄汲古閣祕本書目有其名注曰明硃格抄本當卽從此本抄出者

元槧氏族大全跋

新編排韻增廣事類氏族大全分甲至癸十集不分
卷癸集末夾谷姓下注曰大金支裔其爲元人所撰
無疑前爲綱目一東至十虞爲甲集十二齊至二十
七刪爲乙集一先至九麻爲丙集十陽爲丁集十二
庚至二十七咸爲戊集一董至九慶爲己集十一薺
至五十三謙爲庚集一送至五十四闕爲辛集一屋
至三十二洽爲壬集覆姓爲癸集與
簡明目錄合每葉三十行每行二十八字元代麻沙
本也所採宋事比章定書爲多

書癸辛雜識後

余友莫梅士孝廉謂周密所著癸辛雜識齊東野語多污鱗正人之辭其人疑非端人余笑曰此渠家學也其曾祖祕厯城人從高宗南渡常居湖州鐵佛寺紹興五年吏部員外郎守監察御史擢殿中侍御史七年有旨禁伊川學董莽不刊行錄黃祕劾莽沮格詔令見繫年要錄胡文定安國請从祕邵張二程祕劾文定學術頗僻行義不修見道命錄文定遂罷爲提舉太平觀祕尋遷御史中丞十月再疏劾張魏公尋乞補外除徽猷閣直學士知秀州九年知紹興尋

罷爲提舉江州太平觀十六年十一月卒見繫年要
錄嘉泰會稽志宏治衢州府志秦檜主禁程氏之學
陳公輔發之祕與石公揆助之至檜死而始解祕之
劾董棻胡文定也在檜初罷相之後其劾張魏公也
未幾而檜復相其人如非黨秦必與檜臭味相契者
是則密之詆譏道學蓋亦家學也獨怪河間紀文達
後道學諸公幾千年好拾密之唾餘以爲口實何也
密爲似道客紀依埒和珅所謂方以類聚者耶

宋槧夷堅志跋

夷堅甲志二十卷乙志二十卷丙志二十卷丁志二十卷宋刊元印本前有古杭一齋沈天祐序每葉十八行每行十八字版心有刊工姓名夷堅志四百二十卷或刊于蜀或刊于婺或刊于杭此八十卷則刊于建甯學者至元而蜀浙之版已亡惟建版尙存缺四十三版張紹先爲福建提學命天祐尋訪舊本因從周宏羽借得浙本補刊完全此則元修後印本也四庫未收阮文達始從嚴久能借錄進呈卷中有季振宜藏書朱文長印芳椒堂印白文方印竹塢二字

朱文長印玉蘭堂白文方印辛夷館印朱文方印元
照之印白文方印嚴氏久能朱文方印張氏秋月字
香修一字幼憐朱文方印香修二字朱文方印梅溪
精舍白文方印阮元之印白文方印阮元伯元朱文
方印錢唐嚴燕借閱白文方印何元錫借觀記白文
方印江左二字朱文長印厚民二字朱文方印元照
私印朱文方印嚴氏修能朱文方印陸師道手錄寶
退錄一條于日後及卷一末小楷極精案竹塢辛夷
館玉蘭堂皆文衡山印江左季振宜印芳椒堂嚴久
能印香修張氏久能姬人之印也

宋槧釋氏通鑑跋

歷代編年釋氏通鑑十二卷次行題括山一菴本覺
編集首爲採摭經傳錄次目錄起周昭王甲寅至五
代周世宗止每條各注所出書每葉二十二行每行
二十二字宋諱有缺有不缺宋季麻沙刊本宋史藝
文志元史補藝文志皆不著錄惟見于明文淵閣書
目季滄葦宋元板書目

四庫未收阮文達亦未進呈案本覺龍泉人博學能
詩文士大夫多與之游見兩浙名賢外錄其書始于
佛生之年既不若釋氏稽古略之侈談邃古遠引洪

荒唐昭宗後亦不妄增濮王紉一代記載頗爲核實
又不若釋念常佛祖通載列楊璉僧伽于禪宗去取
亦尙平允卷中有朱文石象玄氏陰陽文方長印案
朱大韶字象玄又字文石松江華亭人嘉靖二十六
年進士官至南國子司業家有文園收藏異書法書
名畫彝鼎壘洗甚富又有季振宜藏書朱文方長印
汪士鐘印白文方印與延陵季氏書目藝芸精舍書
目合

宋槧纂圖互注老子道德經跋

纂圖互注老子道經一卷德經一卷題曰河上公章
句注釋每頁二十二行每行二十一字小字雙行每
行二十五字宋景定刊本前有景定改元龔士高六
子全書序葛元道德經序初真之圖金丹之圖老氏
聖紀圖混元三寶圖蓋南宋國子監先有荀揚老莊
四子小字本建安書坊加以纂圖互注寫作大字爲
此本號四子見楊子序後本記景定中龔士高又加
文中列子爲六子耳其書先河上公注次解解曰二
字以黑質白章小字別之次互注互注二字以黑質

白章大字別之次音釋以圓圍之次重言重意以黑
質白章小字別之音切皆本陸氏釋文而不全錄所
稱解曰者不著作者姓名徧攷王弼蘇子由王雱林
希逸各注乃知出林希逸膚齋老子口義希逸福建
人士尚亦福建人書亦建甯書坊所刊也士尚字子
質號石廬子

元槧道德經集解跋

道德經集解二卷上卷次行題道經下篇下卷次行題德經下篇三行題曰清源圭山董思靖撰四行題章貢淵然道者劉若淵校刊前爲序說序說後題淳祐丙午臘月望清源天慶觀後學圭山董思靖書案思靖生平無可攷惟清源圭峰皆福建泉州山名今泉州之元妙觀宋爲天慶觀元貞元間改名元妙由是推之則思靖乃理宗時泉州天慶觀道士也劉淵然贛州人祥符宮道士呼召風雷有驗洪武二十六年召至京師賜號高道館朝天宮洪熙初封沖虛至

道元妙無爲光範演教光靜普濟長春真人宣德中
卒年八十二見江西通志書題淵然道者不題賜號
未入明時所刊其爲元刻無疑吾友魏鹽尹錫曾用
諸本互校中有絕異他本與影龍石本合者蓋所據
猶古本也所採司馬溫公王荊公葉石林程文簡諸
家之說今皆不傳賴是書存其涯略各家書目皆未
箸錄

四庫未收阮文達亦未進呈亦罕覲祕笈也

老子口義跋

老子膚齋口義二卷題膚齋林希逸老子頂格口義
低一格前有發題

四庫未收阮文達亦未進呈此明正德戊寅胡旻活
字本大旨謂老子借物以明道因時世習尙就以諭
之而讀者未得其所以言前後注解皆病于此獨賴
濱得其近似而語脉未能盡通自謂推究得其初意
云經文衆人熙熙如春登臺不作如登春臺與唐石
刻同所見猶善本也

列子口義跋

列子膚齋口義上下卷題膚齋林希逸行欵與老子口義同亦正德活字本前有劉向奏謂穆王湯問失之迂誕力命楊子義亦乖背不似一家之言其言實爲中肯奏後有希逸序謂向奏鄭繆公同時繆爲繻字傳寫之訛書果出景帝時太史公不應不見見之不應不列傳其奏未必出于劉向書爲晚出或因其不完模倣莊子以附益之然真僞亦不可亂云云無注家回護之習視江遁之附和方士者相去遠矣

宋槧南華真經跋

纂圖互注南華真經十卷題曰晉郭象子元注唐陸德明音義前有郭象序莊子太極圖行欵字數皆與道德經同釋文皆全錄于郭注之下以小圓圈隔之凡釋文所標之字皆以圈圍之互注重言重意欵式與道德經同世德堂本雖從此出已多別風淮雨之訛書貴舊本良有以也


道藏本同或从元刊抄出或从宋藏抄出雖不可攷其非从明刊抄出則無疑也平津館本大略多同惟削別旨一篇間有據他書增補處明盧舜治本亦用魯藩道藏兩本校惟上不篇各并爲四卷以別旨一篇附內篇末亦間有貳增一二字處雖無刪削要不如此本之善外篇卷四十九有姑蘇吳岫塵外軒讀過朱文方印卷五十有吳岫朱文方印堯圃手校朱文方印及朱筆題字前後有嘉慶丁丑癸酉堯圃兩跋吳岫字方山嘉靖時蘇州藏書家與沈辨之與文友善

儀顧堂續跋卷十二



歸安陸心源伯剛甫著

南宋書棚本江文通集跋



梁江文通集十卷首有總目每葉二十行每行十八字案隋書經籍志江淹集九卷後集十卷註曰梁二十卷新舊唐書皆云前集十卷後集十卷崇文總目郡齋讀書志直齋書錄解題文獻通攷皆云十卷與今本同晁氏曰文通著述百餘篇自撰爲前後集今集二百四十九篇今此本二百六十九篇四字恐六字之譌當卽晁氏所見之本

宋諱如殷博士殷東陽之殷許徵君陶徵君王徵君之徵構象臺之構鏡論語之鏡宮朝禮哀敬之敬粉邑尙嚴玄之玄咸告忠貞之貞皆爲字不成行款字數匡格大小又與臨安睦親坊陳宅本孟東野集浣花集同當亦宋季臨安書鋪所刊爲北宋以來相傳舊本其題梁江文通者必所刊晉唐六朝人集尙多非一集故耳較汪士賢本多知已賦一首較張溥本多蕭讓大傳揚州牧表一首此外字句之間勝汪張兩本處甚多

七閣箸錄未見此本可見流傳之少矣余又有梅鼎

祚刊本名江光祿集亦分十卷編次前後缺文墨釘
皆與此本同增遂古篇詠美人春遊征怨三首爲補
遺不羈八十卷之內亦善本也此本每冊有太倉王
氏藏書朱文長印弇州山人舊藏也

張青芝手鈔陶隱居集跋

貞白先生陶隱居集題昭臺弟子傅霄編集大洞弟子陳桷校勘鏤板前有隱居傳後有梁元帝昭明太子邵陵王綸陶隱居碑司馬子微碑陰記蘇庠像贊又集外兩文隱居集久亡王欽臣始裒遺文三十二篇南豐曾惻益以寒夜愁胡笳二詩難均聖論傅霄爲之編次附殘文于後紹興中有刊本嘉靖甲辰文休承錄于崑山周氏崇禎戊辰葉林宗奕從文本傳錄此則乾隆元年張青芝位借葉本所手錄者四庫未收阮文達始進呈此本比阮本較爲完善

元槧李太白詩註跋

分類補註李太白詩二十五卷次行題春陵楊齊賢
子見集註章貢蕭士贊粹可補註前李陽冰樂史序
劉全白碣記宋敏求曾鞏毛漸序次關中薛仲邕編
年譜次目錄每葉二十四行每行二十字小字雙行
每二十六字目後有建安余氏勤有堂刊篆文本記
元刊元印本其分賦古風樂府歌吟贈別送酬答遊
宴登覽行役閒適懷思感遇寫懷詠物題詠雜詠閨
情哀傷二十類與晏知止本同惟晏本賦列二十五
此列卷一餘亦少有參差宋次道有云沿舊目而釐

正其彙次使各相從南豐亦云次道以類廣白詩今諸本皆分二十類則分類實始于次道非楊蕭兩家所爲也兩家所註有詩無文明郭雲鵬刊本增雜文爲三十卷註則刪削過半有全章削去者有一章削去四五百言而留一二句者又增以禎卿曰云云使古書面目幾無一存殊爲謬妄曾鞏序云李白集三十二卷舊歌詩七百七十六篇今千有一篇雜箸六十五篇晏本作李白集三十卷餘同咸淳本作李白詩集二十卷七百若干篇今九百若干篇與元豐類藁同與此本及晏本不合

咸淳本李翰林集跋

李翰林集三十卷次行題翰林供奉李白前有李陽
冰樂史魏淵曾鞏序李華撰墓志劉全白撰碣記范
傳正裴敬撰墓碑後補司空山瀑布五古一首有紹
熙元年七月趙汝愚題後有咸淳己巳刻版戴覺民
跋每卷有目連屬篇目每葉二十行每行二十字晏
知止本歌吟在第六七兩卷此本在第十七卷餘亦
前後參差曾鞏序首數句與元豐類稿合與晏殊本
元刊補註本不同或此出曾南豐本而彼出宋次道
本歟

元槧黃鶴註杜詩跋

集千家註分類杜工部詩二十五卷次行題東萊徐
居仁編次三行臨川黃鶴補註首爲杜工部傳序碑
銘次杜工部年譜題臨川黃鶴撰次集註杜工部詩
姓氏次目錄卷二十五後有至正戊子潘屏山刊于
圭山書院一行每葉二十四行每行二十字小字雙
行每行二十六字居仁仕履未詳杜詩分門編類始
于居仁故首題居仁名見姓氏建安蔡氏夢弼亦在
姓氏中集註曾採及惟郭知遠註不及一字耳

宋槧九家注杜詩殘本跋

新刊校定集註杜詩存卷六至十一凡六卷每卷後有寶慶乙酉廣東漕司鋟板一行卷七卷八後又有朝議大夫廣南東路轉運判官曾噩承議郎前通判韶州軍州事劉鎔潮州州學賓辛安中進士陳大信同校勘四行每葉九行每行大字十六小字雙行版心有字數及刊工姓名百宋一廬賦所謂九家註杜寶慶漕鋟自有連城蝕甚勿嫌者祇存五十五葉此本尙存六卷可以壓倒百宋矣所採王洙宋祁王安石黃庭堅薛夢符杜田鮑彪師尹趙彥材九家之註

而趙註尤多噩字予肅福建閩縣人紹熙四年進士尉上高轉監行在惠民局嘉定戊辰上書言積弊未易革人心未易服公道未易行下言未易通皆切中時弊改知晉江縣嘉定乙亥用從臣薦通判建寧府入監左藏東庫是歲夏旱應詔言六事在職二年除軍器監遷大府寺丞辛巳遷大理正出知潮州治最擢廣東運判寶慶二年卒七歲能屬文至老未嘗一日廢書箸有義溪集十卷班史錄二十卷見陳宓復齋集運判曾公墓誌萬姓統誼以爲字噩甫固誤書錄解題以爲閩清人亦誤

元槧陸宣公集跋

唐陸宣公集二十二卷前有權德輿翰苑集序次蘇軾等進奏議劄子次至大辛亥厲一鶚序卷一至十制誥卷十一至十六奏草卷十七至二十二中書奏議目錄後有記云至大辛亥秋教官厲心齋奉總管王公子中命重新繡梓詳加校訂任其責者學正四明陳沆學錄毗陵蔣鵬孫路掾廬陵易偉也監督直學張天祐馬天祺學吏程泰孫施去非七行案是集宋時嘉興學有版歲久漫漶至大辛亥盱眙王子中來守以推官胡德修家藏善本重刊此其初印本也

每葉二十行每行十七字一至卷十版心刊苑幾十一至廿二版心刻奏幾皆有字數刊工姓名卷中有朱文石氏朱文方印華亭朱氏白文方印忠宣第三十七世孫朱文方印香園所藏白文方印三間草堂朱文方印張載華印朱文方印佩兼朱文方印芷齋圖籍朱文方印蘇東坡等所進劄子題曰本朝名臣此從宋本翻雕之証也

宋槧宋印韓昌黎集跋

昌黎先生集十卷前有李漢序每葉二十二行每行二十字版心有字數及刻工姓名每卷末葉版心有此卷若干版計若干字卽百宋一厘賦之小字本所謂字畫方勁尙未有註北宋槧本者也今考粗敘所經觀之觀或密若昏媾之媾央央叛還遶之遶或弛而不穀之穀或復斷若妬之妬結構麗匪過之構投棄急哺穀之穀雷電怯呼詬之詬月明御溝曉之溝凡高宗御諱嫌名皆爲字不成他如融液煦柔茂之煦殷其如阜之殷窗前兩好樹之樹曙光青睞睞之

曙恩澤完穢狻之完厥大誰與讓之讓懸樹垂百尺
之懸耿耿水蒼佩之耿方愬不懲創之懲祖軒而父
頊之頊大勾幹玄造之玄皆缺避甚謹惟慎字不缺
當爲紹興中刊非北宋本也蕘圃誤矣每冊有張敦
仁讀過朱文長印陽城張氏省訓堂經籍記朱文長
印古餘珍藏子孫保之朱文長印枚菴流覽所及朱
文方印

米麻沙槧柳集跋

增廣註釋音辨唐柳先生集四十三卷年譜一卷別集二卷外集二卷附錄一卷次行題南城先生童宗說註釋三行新安先生張敦頤音辨四行雲間先生潘緯音義前有劉禹錫序乾道三年吳郡陸之淵序行款格式與韓文考異同當爲一家所刻亦宋季麻沙坊本也有花笑廬藏朱文長印劉松所藏朱文長印瞋琴山館珍藏朱文方印述古堂圖書記朱文長印劉松號疏雨烏程縣南潯鎮人其藏書之所曰瞋琴山館

宋麻沙槧韓文考異跋

朱文公校昌黎先生文集四十卷外集一卷集傳一卷遺文一卷次行題晦菴先生考異留耕王先生音釋前有朱子序次寶慶三年王伯大序次凡例次日錄每葉二十六行每行二十三字小字雙行凡各本異同各家註釋皆以黑質白章別之凡例後有云本宅所刊係將南劍州官本爲據併將音釋附正集焉乃宋末麻沙坊賈識語明覆本譌奪甚多此本字畫圓整譌字亦少宋季麻沙善本也卷中有周良金印朱文方印毘陵周氏九松迂叟藏書記朱文長印

舊抄沈亞賢集跋

沈亞賢文集十卷前有元祐丙寅無名氏刊版序次
總目每卷有目後有葉石君手書跋每葉十八行每
行二十字當從元祐刊本鈔出者是書宋以後無刊
本鈔帙流傳脫譌甚多此本譌較少如卷首夢遊仙
賦星被曉以淡白淡不譌談襲烈蕙之芳風蕙不譌
董羸吹旣調憂湘絃羸不譌羸菱結帶兮荇含絲不
奪兮字皆勝諸本至秦夢記湘中怨解列卷第二異
夢錄列卷第四則北宋已然矣

影宋孟東野集跋

孟東野詩集十卷題山南西道節度參謀試大理評事平昌孟郊後有宋敏求題題後有臨安府棚前北睦親坊南陳宅經籍鋪印一行前有目錄每葉二十行每行十八字版心有字數汲古閣影宋精抄本前有宋本甲毛晉私印子晉汲古主人毛扆之印斧季七印後有虞山毛晉子晉書印汲古得修綆三印與明翻景定國材本互勘大略多同惟結銜平昌二字改爲武康二字此本目錄微有減字耳

新刻李衛公集跋

右李衛公集三十四卷江蘇新刻本後附補遺一卷不知何人所輯首載新授太子太師杜衍制制詞有云往以時事來還宰旅及深惟元老等語則其人必宰相也查唐世宰相杜姓十一人曰如晦曰淹曰元穎曰審權曰讓能曰黃裳曰佑曰悰曰正倫曰鴻漸曰暹無名衍者惟宋宰相杜衍曾爲太子太師李燾資治通鑑長編有云皇祐五年八月壬子太子太傅致仕杜衍爲太子太師以二府舊臣特遷之是則此文乃宋杜衍遷官制也安得出衛公手是刻所據乃

黃堯圃家影寫宋本勝于明萬厯嘉靖諸刻補遺之
刻未免畫蛇添足耳

宋槧浣花集跋

浣花集十卷題曰杜陵韋莊前有癸亥年六月九日
莊弟韋藹序宋諱有缺有不缺每葉二十行每行十
八字與臨安睦親坊陳宅本孟東野集行款匡格皆
同當亦南宋書棚本也宋刊存卷四至十前三卷黃
蕘圃以影宋本抄補每卷有葉陽生白文方印後有
陽生跋每冊有士禮居朱文方印前後有蕘圃三跋
陸損之跋陽生蘇州人天士之父與汪鈍翁酬唱工
詩能醫

高麗刊桂苑筆耕跋

桂苑筆耕二十卷題都統巡官侍御史內供奉崔致遠撰前有大匡輔國崇祿大夫議政府左議政豐山洪奭周序及達城徐有渠序次中和六年致遠表進序每卷有目連屬篇目高麗活字仿宋本唐書藝文志箸于錄阮文達亦未進呈案致遠字海夫號孤雲高麗妖溝人年十二從商舶入唐十八舉進士調溧水尉高駢帥淮南辟爲都統巡官凡文告皆出其手後東歸仕高麗爲翰林學士兵部侍郎以終道光中廣東潘仕成有刊本脫譌甚多不如此本之善

宋嘉定永州槧范忠宣集跋

范忠宣公文集二十卷前有樓鑰序後有嘉定辛未
范之柔跋王申沈圻廖視陳宗道跋每葉二十四行
每行二十字是集南宋以前未經板行嘉定王申吳
興沈圻知永州始从公之元姪孫之柔得家藏本命
教授陳宗道校正刻于永州語涉宋帝皆提行卷二
十行狀內章惇惇字皆註光廟諱宋嘉定中永州刊
本也若因字體不工疑非宋刊不知永州地居偏僻
刊工不精無足怪者有季振宜藏書朱文長印滄葦
朱文方印季振宜印朱文方印

宋麻沙本陳簡齋詩註跋

須溪先生評點簡齋詩集註十五卷前有劉辰翁序
卷一賦卷二至十三詩卷十四雜箸卷十五無住詞
年譜散入詩題之下續添正誤散入每卷之後與張
月霄所箸錄阮文達所進呈之三十卷本分卷不同
編次亦異或卽辰翁所合併歟註爲胡穉作又有增
註以黑質白章別之不知出自何人今不可攷有汲
古閣稽瑞樓方氏若衡曾觀貽典姚婉貞芙初女史
諸印目錄後有文文肅題字卷六後有張丑題字蓋
經毛子晉陸敕先陳子準方芙初諸家收藏者

宋淳祐建州槧朱文公集跋

晦菴先生朱文公文集一百卷目錄續集十一卷別集十卷前有朱子小像及慶元庚申自題後有成化黃仲昭補刊跋續集前有淳祐五年王遂序淳祐庚戌徐幾跋別集前有咸淳元年黃鏞序每葉二十行每行十八字版心有字數及刻工姓名朱子集爲朱在所編王潛齋所刊續集爲王實齋遂以蔡覺軒劉文昌兩家所抄掇付劉叔忠所編卷九以下徐幾從浦城尉劉觀光得與劉韜仲札數十通增爲十一卷別集爲建安通守余師魯所編咸淳元年建安書院

山長黃鏞序而刊之是集宋時有浙閩兩本浙本明
洪武初取版置南雍不知編自何人此乃閩本明初
版存福建藩廨成化中黃仲昭以浙本勘訂補刻劾
奏唐仲友數狀又修補缺數百葉此則成化後印本
也凡明補之葉匡格較高字形較小一望可知約不
過宋刊百分之一二耳卷中有敬業軒白文方印張
履祥印白文方印曾爲桐鄉張楊園先生所選讀每
有朱文選字印其圈點亦楊園筆也

金陵雜詠跋

金陵雜詠十九首題曰左朝請郎天章閣待制知江
寧軍府事武陽黃履江寧府溧水縣尉周沔書案履
字安中邵武人宋史有傳沔字會宗蘇州人元祐三
年進士其刻石本在江寧府治元時刻夫子像於碑
陰因移江寧縣大成殿陰轉向外而正面倚壁世遂
罕有知之者厲樊榭輯宋詩紀事亦未得見僅錄安
中詩一首嘉慶中江寧嚴觀始訪得之刻以行世亂
後刻本極少余所藏乃从嚴刻傳錄者邵武徐小勿
明府留心鄉先輩著述遺書譚芷佩明府請借錄副

將付梓人因命小胥錄一本貽之邵武鄉先生箸述
余家所藏尙有黃公紹在軒集世間亦罕流傳明府
倘能合梓行世亦古人之知己也

舊抄建康集跋

建康八卷舊抄本每頁十六行每行二十字廓字
注御名桓字注欽宗廟諱惇字注光宗廟諱蓋從寧
宗時刊本影寫者末有二十代孫萬又名樹蓮跋案
樹蓮字林宗明諸生國亡棄去改名萬世居洞庭山
嘗游虞山樂其山水因家焉所至必多聚書會鼎革
獨身走還洞庭已復居虞山購書倍多於前每遇宋
元抄本收藏古帙雖零缺單卷必重購之世所常有
者勿貴也得書分別部居精辨真贋手識其所由來
見徐乾學澹園八葉林宗傳此本蓋從毛子晉借錄

子晉則得之金陵焦弱侯後人者中間朱筆校補數
十字皆林宗筆也卷三書李弼告後書肩李氏告後
蘇秦論范增論養生論上中下七篇仍缺當求葉調
生藏本補全之

宋槧友林乙稿跋

友林乙稿一卷題曰四明史彌寧後有名域者跋不
署其姓每葉十六行每行十六字版心有字數及刻
工姓名百宋一厘賦所謂流麗娟秀兼饒古雅之趣
在宋槧中別有風神者也序稱乾道癸巳文惠帥閩
域以庠序諸生蒙眊昧則域蓋閩人乾道癸巳下距
嘉定六年癸酉四十年序稱後四十年乃得親炙春
坊領閣公之幕下與郡齋讀書志所云彌寧以國子
生蒞春坊事帶閣門宣贊舍人嘉定中知邵陽合則
彌寧之知邵陽在嘉定六年集中有丁丑歲中秋日

勸農城南詩系在邵陽作丁丑爲嘉定十年則彌寧
嘉定十年尙未去邵陽任序當作于此時集中有謝
鄭中卿惠蝻蟬詩案中卿名域閩縣人號松窗淳熙
十一年進士慶元中曾隨張貴謨使金箸燕谷剽聞
二卷累官幹辦諸軍糧料院見宋詩紀事福建通志
選舉表則序爲鄭域所作無疑也序之書法與全書
同當以域手書上版者已開林吉人書鈍翁文鈔漁
洋精華錄之先路矣

宋槧劉後村集跋

後村居士集五十卷宋槧本前有淳祐九年林希逸序二十卷後有門人迪功郎新差昭州司法參軍林秀發編次一行每葉二十行每行二十一字語涉宋帝皆空格卷一至十六皆淳祐庚戌臘月以前作卷十七十八詩話卷十九二十詩餘卷二十一以後皆文也

四庫所收卷數與此本同惟

四庫本有賀賈相啟及復相啟再賀平章啟及詩話後集此本無之豈別一本耶後村居士大全集一百

九十六卷余家藏有之又有抄本五十卷爲虞抱經舊藏似卽從此本出余初疑五十卷本從大全集選擇及以大全集校對詩凡四十八卷今祇有庚戌以前十六卷詩話分前後續別新五集祇有前集二卷詩餘五卷記六卷序四卷題跋十三卷今各得兩卷啟十一卷今祇得四卷墓志十八卷祇得五卷祭文五卷書七卷行狀五卷今各得三卷表牋四卷祇得一卷而內制外制奏議油幕箋奏神道碑駁狀判狀書易講義進故事各類則不登一字考洪天錫撰後村墓志稱後村早負盛名晚掌書命每一制下人人

傳寫號真舍人達官顯人欲銘先世勲德必託其文以傳江湖士友爲四六及五七言往往祖後村氏于是前後續新四集二百卷流布海內歸然爲一代宗云云是後村集宋時刊行已有前後續別四集二百卷此本當爲四集之一以不收淳祐庚戌以後詩証之其爲前集無疑也千頃堂書目載後村居士集五十卷註曰詩文當卽此本又六十卷註曰皆文又詩集十五卷今雖不可見要皆在大全集中矣老妓老將老馬三詩乃淳祐庚戌以前作故列入前集其餘七詩今見大全集二十二卷乃庚戌以後作當在後

人

影抄陳復齋集跋

龍圖陳公復齋先生文集二十三卷附錄一卷前有
淳祐戊申鄭性之序卷一卷二歌賦雜詠古風卷三
四五言卷四五七言卷六奏劄卷七雜說策問卷八
銘贊箴戒卷九記卷十序題跋卷十一至十六書劄
卷十七送序贈序送行詩壽詩挽詩卷十八祭文卷
十九祝文青詞上梁文卷二十勸諭文卷二十一二
十二墓誌銘二十三行狀別以翰墨大全所載仰止
堂規約等爲拾遺附錄則宋史本傳及遺事十一條
仰止堂記黃幹陳淳書劄方大琮與其子書劄門人

劉克莊祭文眞德秀兩跋黃績劄鄭至記蔡沈劉克莊高九萬戴復古詩也案宓字師復以父俊卿任厯知安溪縣入監進奏院擢大府丞知南康軍改劔州廣東提刑直秘閣乞祠事蹟詳宋史本傳是集爲其子圭字表夫者所編各家書目未見箸錄惟福建通志經籍志有之史稱宓嘉定七年封事九年轉對劄子慷慨盡言指陳剴切嘗爲朱墨銘辨理欲分寸之多寡今具載集中所附宋史列傳與今宋史同宋史脫脫所修非宋人所得見當是八元後所增四庫未收阮文達亦未進呈誠罕觀之秘笈也

影宋抄永嘉四靈詩跋

永嘉四靈詩甲乙丙丁四卷汲古閣影寫宋刊本每卷首行題曰永嘉四靈詩旁注甲乙丙丁等字甲乙丙三卷次行題曰徐照道暉旁注上中下等字版心有徐上徐中徐下等字丁卷次行題曰徐幾版中旁注上字版心徐幾上三字各有字數每葉二十行每行十六字直齋書錄解題載徐照△三卷徐幾△二卷與此合惜幾△祇存上卷耳照△存詩二百六十七首較石門願修羣賢小集本名芳蘭軒△者多詩一百六十二首願本多莫愁曲三峽吟李夫人何所

歸四首越魚吟後半多十六字蓋影宋本卷下缺第
六葉第十葉祇存十餘字當卽在缺頁之中璣公存
詩一百零兩首其六十四首爲顧刻名二薇齋集者
所無李丹士一首題誤作自覺其七十二首爲影宋
本所無當在下卷之中耳翁卷葦碧軒集有送徐璣
赴龍溪丞因過泉南舊里詩趙師秀清苑齋集有送
璣赴永州掾詩此致中仕履卽宋元詩會之所本也
紙白如玉墨光如漆烏絲精整書法秀美毛斧季所
謂每葉費銀一錢許者此類是也前後有毛子晉父
子藏印十餘方席玉照藏印二方玉照名鑑亦常熟人

山房集跋

山房集二十卷宋周南撰宋史藝文志直齋書錄解題皆著于錄原本久佚乾隆中館臣始从永樂大典錄出編爲山房集八卷後集一卷南雖以駢體擅場頗留心於史事題跋一卷考訂羣書原原本本不在晁公武陳直齋之下雜記一卷足補宋史之缺康與之傳述其貪淫奸惡陷害蘇師德父子諸事厯厯如繪洵足誅奸邪於已死發潛德之幽光余已採入補宋史佞倖傳矣

宋槧指南錄跋

新刊指南錄四卷附一卷前有德祐元年自序景炎改元後序次日錄每葉十六行每行十六字序中北兵虜帥呂師孟北虜誤吾國之誤字陷吾民之陷字罵逆賊之逆賊字及文天祥三字皆挖空詩中挖空處亦甚多當是景炎中刊本入元後挖去者此則元時印本也凡重字皆刻又字如日又悠又漫又慘又之類爲宋刊所罕見卷中有竹塢眞賞朱文方印毛晉二字朱文連珠印汲古主人朱文方印毛氏子晉朱文方印蓋經明文文肅毛子晉兩家收藏者

[G e n e r a l I n f o r m a t i o n]
书名 = 国家图书馆藏古籍题跋丛刊 第 1 8 册
作者 =
页数 = 7 7 0
S S 号 = 0
出版日期 =

封面页	
书名页	
目录页	
仪顾堂题跋	卷十二至卷十六
仪顾堂续跋	卷一至卷十二
附录页	